

Istisnā

Mūsā Isrāīliyoṇ se Muḥkātib Hotā Hai

¹ Is kitāb meñ wuh bāteñ darj hain jo Mūsā ne tamām Isrāīliyoṇ se kahīn jab wuh Dariyā-e-Yardan ke mashriqī kināre par bayābān meñ the. Wuh Yardan kī Wādī meñ Sūf ke qarīb the. Ek taraf Fārān Shahr thā aur dūsrī taraf Tofal, Lāban, Hasīrāt aur Dīzahab ke shahr the. ² Agar Adom ke pahārī ilāqe se ho kar jāeñ to Horib yānī Sīnā Pahāṛ se Qādis-barnīa tak kā safr 11 din meñ tay kiyā jā saktā hai.

³ Isrāīliyoṇ ko Misr se nikle 40 sāl ho gae the. Is sāl ke gyārhweñ māh ke pahle din Mūsā ne unheñ sab kuchh batāyā jo Rab ne use unheñ batāne ko kahā thā. ⁴ Us waqt wuh Amoriyoṇ ke bādshāh Sīhon ko shikast de chukā thā jis kā dārul-hukūmat Hasbon thā. Basan ke bādshāh Oj par bhī fatah hāsil ho chukī thī jis kī hukūmat ke markaz Astārāt aur Idraī the.

⁵ Wahān, Dariyā-e-Yardan ke mashriqī kināre par jo Moāb ke ilāqe meñ thā Mūsā Allāh kī shariyat kī tashrīh karne lagā. Us ne kahā,

⁶ jab tum Horib yānī Sīnā Pahāṛ ke pās the to Rab hamāre Khudā ne ham se kahā, “Tum kāfī der se yahān ṭhahre hue ho. ⁷ Ab is jagah ko chhoṛ kar āge Mulk-e-Kanān kī taraf baṛho. Amoriyoṇ ke pahārī ilāqe aur un ke paṛos kī qaumoṇ ke pās jāo jo Yardan ke maidānī ilāqe meñ ābād hain. Pahārī ilāqe meñ, mağhrīb

ke nashebī pahārī ilāqe meñ, junūb ke Dasht-e-Najab meñ, sāhilī ilāqe meñ, Mulk-e-Kanān meñ aur Lubnān meñ Dariyā-e-Furāt tak chale jāo. **8** Maiñ ne tumheñ yih mulk de diyā hai. Ab jā kar us par qabzā kar lo. Kyoñki Rab ne qasam khā kar tumhāre bāpdādā Ibrāhīm, Is'hāq aur Yāqūb se wādā kiyā thā ki maiñ yih mulk tumheñ aur tumhārī aulād ko dūngā.”

Rāhnumā Muqarrar Kie Gae

9 Us waqt maiñ ne tum se kahā, “Maiñ akelā tumhārī rāhnumāī karne kī zimmedārī nahīn uṭhā saktā. **10** Rab tumhāre Khudā ne tumhārī tādād itni baṛhā dī hai ki āj tum āsmān ke sitāroñ kī mānind beshumār ho. **11** Aur Rab tumhāre bāpdādā kā Khudā kare ki tumhārī tādād mazid hazār gunā baṛh jāe. Wuh tumheñ wuh barkat de jis kā wādā us ne kiyā hai. **12** Lekin maiñ akelā hī tumhārā bojh uṭhāne aur jhagaṛoñ ko niptāne kī zimmedārī nahīn uṭhā saktā. **13** Is lie apne har qabilē meñ se kuchh aise dānishmand aur samajhdār ādmī chun lo jin kī liyāqat ko log mānte hain. Phir maiñ unheñ tum par muqarrar karūṅga.”

14 Yih bāt tumheñ pasand āī. **15** Tum ne apne meñ se aise rāhnumā chun lie jo dānishmand the aur jin kī liyāqat ko log mānte the. Phir maiñ ne unheñ hazār hazār, sau sau aur pachās pachās mardoñ par muqarrar kiyā. Yoñ wuh qabiloñ ke nigahbān ban gae. **16** Us waqt maiñ ne un qāziyon se kahā, “Adālat karte waqt har ek kī bāt ghaur se sun kar ghairjānibdār faisle karnā, chāhe do Isrāīlī farīq ek dūsre se jhagarā

kar rahe hoī yā muāmalā kisī Isrāīlī aur pardesi ke darmiyān ho. ¹⁷ Adālat karte waqt jānibdārī na karnā. Chhoṭe aur bare kī bāt sun kar donoī ke sāth ek jaisā sulūk karnā. Kisī se mat ḥarnā, kyonki Allāh hī ne tumheñ adālat karne kī zimmedārī dī hai. Agar kisī muāmale mein faislā karnā tumhāre lie mushkil ho to use mujhe pesh karo. Phir maiñ hī us kā faislā karūnga.” ¹⁸ Us waqt maiñ ne tumheñ sab kuchh batāyā jo tumheñ karnā thā.

Mulk-e-Kanān mein Jāsūs

¹⁹ Ham ne waisā hī kiyā jaisā Rab ne hamen kahā thā. Ham Horib se rawānā ho kar Amoriyon ke pahārī ilāqe kī taraf barhe. Safr karte karte ham us wasī aur haulnāk registān meñ se guzar gae jise tum ne dekh liyā hai. Ākhirkār ham Qādis-barnīa pahuñch gae. ²⁰ Wahān maine tum se kahā, “Tum Amoriyon ke pahārī ilāqe tak pahuñch gae ho jo Rab hamārā Khudā hamen dene wālā hai. ²¹ Dekh, Rab tere Khudā ne tujhe yih mulk de diyā hai. Ab jā kar us par qabzā kar le jis tarah Rab tere bāpdādā ke Khudā ne tujhe batāyā hai. Mat ḍarnā aur bedil na ho jānā!”

²² Lekin tum sab mere pās āe aur kahā, “Kyon na ham jāne se pahle kuchh ādmī bhejeñ jo mulk ke hälāt dariyāft karen aur wāpas ā kar hamen us rāste ke bāre men batāeñ jis par hamen jānā hai aur un shahron ke bāre men ittalā den jin ke pās ham pahuñchenge.” ²³ Yih bāt mujhe pasand āi. Main ne is kām ke lie har qabile ke ek ādmī ko chun kar bhej diyā. ²⁴ Jab yih

bārah ādmī pahāṛī ilāqe meṇ jā kar Wādī-e-Iskāl meṇ pahuṇche to us kī taftīsh kī. ²⁵ Phir wuh mulk kā kuchh phal le kar lauṭ āe aur hamen mulk ke bāre meṇ ittalā de kar kahā, “Jo mulk Rab hamārā Khudā hamen dene wālā hai wuh achchhā hai.”

²⁶ Lekin tum jānā nahīn chāhte the balki sarkashī karke Rab apne Khudā kā hukm na mānā. ²⁷ Tum ne apne khaimoṇ meṇ burburāte hue kahā, “Rab ham se nafrat rakhtā hai. Wuh hamen Misr se nikāl lāyā hai tāki hamen Amoriyoṇ ke hāthoṇ halāk karwāe. ²⁸ Ham kahān jāē? Hamāre bhāiyoi ne hamen bedil kar diyā hai. Wuh kahte hain, ‘Wahān ke log ham se tāqatwar aur darāzqad hain. Un ke bare bare shahroṇ kī fasileṇ āsmān se bāteṇ kartī hain. Wahān ham ne Anāq kī aulād bhī dekhī jo dewqāmat hain.’”

²⁹ Maiṇ ne kahā, “Na ghabrāo aur na un se khauf khāo. ³⁰ Rab tumhārā Khudā tumhāre āge āge chaltā huā tumhāre lie laṛegā. Tum khud dekh chuke ho ki wuh kis tarah Misr ³¹ aur registān meṇ tumhāre lie laṛā. Yahān bhī wuh aisā hī karegā. Tū khud gawāh hai ki bayābān meṇ pūre safr ke daurān Rab tujhe yon uṭhāe phirā jis tarah bāp apne bete ko uṭhāe phirtā hai. Is tarah chalte chalte tum yahān tak pahuṇch gae.” ³² Is ke bāwujūd tum ne Rab apne Khudā par bharosā na rakhā. ³³ Tum ne yih bāt nazarandāz kī ki wuh safr ke daurān rāt ke waqt āg aur din ke waqt bādal kī sūrat meṇ tumhāre āge āge chaltā rahā tāki tumhāre lie ḫaime lagāne kī jagheṇ mālūm kare aur tumheṇ rāstā

dikhāe.

³⁴ Jab Rab ne tumhārī yih bāteñ sunīn to use ġhussā āyā aur us ne qasam khā kar kahā, ³⁵ “Is sharīr nasl kā ek mard bhī us achchhe mulk ko nahīn dekhegā agarche main ne qasam khā kar tumhāre bāpdādā se wādā kiyā thā ki maiñ use unheñ dūngā. ³⁶ Sirf Kālib bin Yafunnā use dekhegā. Maiñ use aur us kī aulād ko wuh mulk dūngā jis meñ us ne safr kiyā hai, kyoñki us ne pūre taur par Rab kī pairawī kī.”

³⁷ Tumhārī wajah se Rab mujh se bhī nārāz huā aur kahā, “Tū bhī us meñ dākhil nahīn hogā. ³⁸ Lekin terā madadgār Yashua bin Nūn dākhil hogā. Us kī hauslā-afzāi kar, kyoñki wuh mulk par qabzā karne meñ Isrāīl kī rāhnumāī karegā.” ³⁹ Tum se Rab ne kahā, “Tumhāre bachche jo abhī achchhe aur bure meñ imtiyāz nahīn kar sakte, wuhī mulk meñ dākhil hōnge, wuhī bachche jin ke bāre meñ tum ne kahā ki dushman unheñ Mulk-e-Kanān meñ chhīn lenge. Unheñ main mulk dūngā, aur wuh us par qabzā karenge. ⁴⁰ Lekin tum khud āge na baṛho. Pīchhe muṛ kar dubārā registān meñ Bahr-e-Qulzum kī taraf safr karo.”

⁴¹ Tab tum ne kahā, “Ham ne Rab kā gunāh kiyā hai. Ab ham mulk meñ jā kar laṛenge, jis tarah Rab hamāre Khudā ne hameñ hukm diyā hai.” Chunānche yih sochte hue ki us pahārī ilāqe par hamlā karnā āsān hogā, har ek musallah huā. ⁴² Lekin Rab ne mujh se kahā, “Unheñ batānā ki wahān jang karne ke lie na jāo, kyoñki maiñ tumhāre sāth nahīn hūngā. Tum apne dushmanoñ ke hāthoñ shikast khāoge.”

43 Maiñ ne tumheñ yih batāyā, lekin tum ne merī na sunī. Tum ne sarkashī karke Rab kā hukm na mānā balki mağhrūr ho kar pahārī ilāqe meñ dākhil hue. **44** Wahān ke Amorī bāshinde tumhārā sāmnā karne nikle. Wuh shahd kī makkhiyon ke ȝhol kī tarah tum par tūt paṛe aur tumhārā tāqqub karke tumheñ Saīr se ḥurmā tak mārte gae.

45 Tab tum wāpas ā kar Rab ke sāmne zār-o-qatār rone lage. Lekin us ne tawajjuh na dī balki tumheñ nazarandāz kiyā. **46** Is ke bād tum bahut dinon tak Qādis-barnīa meñ rahe.

2

Registān meñ Dubārā Safr

1 Phir jis tarah Rab ne mujhe hukm diyā thā ham pīchhe muṛ kar registān meñ Bahr-e-Qulzum kī taraf safr karne lage. Kāfi der tak ham Saīr yānī Adom ke pahārī ilāqe ke kināre kināre phirte rahe.

2 Ek din Rab ne mujh se kahā, **3** “Tum bahut der se is pahārī ilāqe ke kināre kināre phir rahe ho. Ab shimāl kī taraf safr karo. **4** Qaum ko batānā, agle dinon meñ tum Saīr ke mulk meñ se guzaroge jahān tumhāre bhāī Esau kī aulād ābād hai. Wuh tum se dareñge. To bhī baṛī ehtiyāt se guzarnā. **5** Un ke sāth jang na chherñā, kyoñki maiñ tumheñ un ke mulk kā ek murabbā fuṭ bhī nahīn dūngā. Maiñ ne Saīr kā pahārī ilāqā Esau aur us kī aulād ko diyā hai. **6** Lāzim hai ki tum khāne aur pīne kī tamām zarūriyāt paise de kar ȝharīdo.”

⁷ Jo bhī kām tū ne kiyā hai Rab ne us par barkat dī hai. Is wasī registān meñ pūre safr ke daurān us ne terī nigahbānī kī. In 40 sālon ke daurān Rab terā Khudā tere sāth thā, aur terī tamām zarūriyāt pūrī hotī rahīn.

⁸ Chunānche ham Saīr ko chhoṛ kar jahān hamāre bhāī Esau kī aulād ābād thī dūsre rāste se āge nikle. Ham ne wuh rāstā chhoṛ diyā jo Ailāt aur Asyūn-jābar ke shahroṇ se Bahīrā-e-Murdār tak pahuñchātā hai aur Moāb ke bayābān kī taraf baṛhne lage. ⁹ Wahān Rab ne mujh se kahā, “Moāb ke bāshindoṇ kī mukhālafat na karnā aur na un ke sāth jang chheṛnā, kyoñki maiñ un ke mulk kā koī bhī hissā tujhe nahīn dūngā. Maiñ ne Ār Shahr ko Lüt kī aulād ko diyā hai.”

¹⁰ Pahle Aimī wahān rahte the jo Anāq kī aulād kī tarah tāqatwar, darāzqad aur tādād meñ zyādā the. ¹¹ Anāq kī aulād kī tarah wuh Rafāiyoṇ meñ shumār kie jāte the, lekin Moābī unheñ Aimī kahte the.

¹² Isī tarah qadīm zamāne meñ Horī Saīr meñ ābād the, lekin Esau kī aulād ne unheñ wahān se nikāl diyā thā. Jis tarah Isrāiliyoṇ ne bād meñ us mulk meñ kiyā jo Rab ne unheñ diyā thā usī tarah Esau kī aulād baṛhte baṛhte Horiyoṇ ko tabāh karke un kī jagah ābād hue the.

¹³ Rab ne kahā, “Ab jā kar Wādī-e-Zirad ko ubūr karo.” Ham ne aisā hī kiyā. ¹⁴ Hameñ Qādis-barnīa se rawānā hue 38 sāl ho gae the. Ab wuh tamām ādmī mar chuke the jo us waqt jang karne ke qābil the. Waisā hī huā thā jaisā Rab ne qasam khā kar kahā thā. ¹⁵ Rab kī

muķhālafat ke bāis ākhirkār khaimāgāh meñ us nasl kā ek mard bhī na rahā. ¹⁶ Jab wuh sab mar gae the ¹⁷ tab Rab ne mujh se kahā, ¹⁸ “Āj tumheñ Ār Shahr se ho kar Moāb ke ilāqe meñ se guzarnā hai. ¹⁹ Phir tum Ammoniyon ke ilāqe tak pahuñchoge. Un kī bhī muķhālafat na karnā, aur na un ke sāth jang chheñnā, kyoñki maiñ un ke mulk kā koī bhī hissā tumheñ nahīñ dūngā. Maiñ ne yih mulk Lüt kī aulād ko diyā hai.”

²⁰ Haqīqat meñ Ammoniyon kā mulk bhī Rafāiyon kā mulk samjhā jātā thā jo qadīm zamāne meñ wahāñ ābād the. Ammonī unheñ zamzumī kahte the, ²¹ aur wuh dewqāmat the, tāqatwar aur tādād men zyādā. Wuh Anāq kī aulād jaise darāzqad the. Jab Ammonī mulk meñ āe to Rab ne Rafāiyon ko un ke āge āge tabāh kar diyā. Chunāñche Ammonī barhte barhte unheñ nikālte gae aur un kī jagah ābād hue, ²² bilkul usī tarah jis tarah Rab ne Esau kī aulād ke āge āge Horiyon ko tabāh kar diyā thā jab wuh Saīr ke mulk meñ āe the. Wahāñ bhī wuh barhte barhte Horiyon ko nikālte gae aur un kī jagah ābād hue. ²³ Isī tarah ek aur qadīm qaum banām Awwī ko bhī us ke mulk se nikālā gayā. Awwī Ghazzā tak ābād the, lekin jab Kaftūrī Kaftūr yānī Krete se āe to unhoñ ne unheñ tabāh kar diyā aur un kī jagah ābād ho gae.

Sīhon Bādshāh se Jang

²⁴ Rab ne Mūsā se kahā, “Ab jā kar Wādī-e-Arnon ko ubūr karo. Yon samjho ki maiñ Hasbon ke Amorī bādshāh Sīhon ko us ke mulk samet tumhare hawale kar chukā hūn. Us

par qabzā karnā shurū karo aur us ke sāth jang karne kā mauqā dhūndo. ²⁵ Isī din se maiñ tamām qaumoñ meñ tumhāre bāre men dahshat aur ƙhauf paidā karūnga. Wuh tumhārī ƙhabar sun kar ƙhauf ke māre thartharāeñgī aur kāñpeñgī.”

²⁶ Maiñ ne Dasht-e-Qadimāt se Hasbon ke bādshāh Sīhon ke pās qāsid bheje. Merā paighām nafrat aur mukhālafat se khālī thā. Wuh yih thā, ²⁷ “Hameñ apne mulk meñ se guzarne deñ. Ham shāhrāh par hī raheñge aur us se na bāñ, na dāñ taraf haṭeñge. ²⁸ Ham khāne aur pīne kī tamām zarūriyāt ke lie munāsib paise deñge. Hameñ paidal apne mulk meñ se guzarne deñ, ²⁹ jis tarah Saīr ke bāshindoñ Esau kī aulād aur Ār ke rahne wāle Moābiyon ne hameñ guzarne diyā. Kyonki hamārī manzil Dariyā-e-Yardan ke mağhrib meñ hai, wuh mulk jo Rab hamārā Khudā hameñ dene wālā hai.”

³⁰ Lekin Hasbon ke bādshāh Sīhon ne hameñ guzarne na diyā, kyonki Rab tumhāre Khudā ne use belachak aur hamārī bāt se inkār karne par āmādā kar diyā thā tāki Sīhon hamāre qābū meñ ā jāe. Aur bād meñ aisā hī huā. ³¹ Rab ne mujh se kahā, “Yoñ samajh le ki maiñ Sīhon aur us ke mulk ko tere hawāle karne lagā hūn. Ab nikal kar us par qabzā karnā shurū karo.”

³² Jab Sīhon apnī sārī fauj le kar hamārā muqābalā karne ke lie Yahaz āyā ³³ to Rab hamāre Khudā ne hameñ pūrī fatah baķhshī. Ham ne Sīhon, us ke beṭoñ aur pūrī qaum ko shikast dī. ³⁴ Us waqt ham ne us ke tamām

shahronī par qabzā kar liyā aur un ke tamām mardonī, auratonī aur bachchonī ko mār dālā. Koi bhī na bachā. ³⁵ Ham ne sirf maweshi aur shahronī kā lūṭā huā māl apne lie bachāe rakhā.

³⁶ Wādī-e-Arnon ke kināre par wāqe Aroīr se le kar Jiliyād tak har shahr ko shikast mānanī parī. Is meñ wuh shahr bhī shāmil thā jo Wādī-e-Arnon meñ thā. Rab hamāre Khudā ne un sab ko hamāre hawāle kar diyā. ³⁷ Lekin tum ne Ammoniyoñ kā mulk chhoṛ diyā aur na Dariyā-e-Yabboq ke irdgird ke ilāqe, na us ke pahārī ilāqe ke shahronī ko chherā, kyoñki Rab hamāre Khudā ne aisā karne se tumheñ manā kiyā thā.

3

Basan ke Bādshāh Oj kī Shikast

¹ Is ke bād ham shimāl meñ Basan kī taraf barh gae. Basan kā bādshāh Oj apnī tamām fauj ke sāth nikal kar hamārā muqābalā karne ke lie Idraī āyā. ² Rab ne mujh se kahā, “Us se mat ḏar. Main use, us kī pūrī fauj aur us kā mulk tere hawāle kar chukā hūn. Us ke sāth wuh kuchh kar jo tū ne Amorī bādshāh Sīhon ke sāth kiyā jo Hasbon meñ hukūmat kartā thā.”

³ Aisā hī huā. Rab hamāre Khudā kī madad se ham ne Basan ke bādshāh Oj aur us kī tamām qaum ko shikast dī. Ham ne sab ko halāk kar diyā. Koi bhī na bachā. ⁴ Usī waqt ham ne us ke tamām shahronī par qabzā kar liyā. Ham ne kul 60 shahronī par yānī Arjūb ke sāre ilāqe par qabzā kiyā jis par Oj kī hukūmat thī. ⁵ In tamām shahronī kī hifāzat ūñchī ūñchī fasīloñ aur kundē wāle darwāzoñ se kī gaī thī. Dehāt

meñ bahut-sī aisī ābādiyān bhī mil gaīn jin kī fasileñ nahīn thiñ. ⁶ Ham ne un ke sāth wuh kuchh kiyā jo ham ne Hasbon ke bādshāh Sīhon ke ilāqe ke sāth kiyā thā. Ham ne sab kuchh Rab ke hawāle karke har shahr ko aur tamām mardon, auratoñ aur bachchoñ ko halāk kar dālā. ⁷ Ham ne sirf tamām maweshī aur shahroñ kā lūṭā huā māl apne lie bachāe rakhā.

⁸ Yoñ ham ne us waqt Amoriyoñ ke in do bādshāhoñ se Dariyā-e-Yardan kā mashriqī ilāqā Wādī-e-Arnon se le kar Harmūn Pahāṛ tak chhīn liyā. ⁹ (Saidā ke bāshinde Harmūn ko Siryūn kahte hain jabki Amoriyoñ ne us kā nām Sanīr rakhā.) ¹⁰ Ham ne Oj Bādshāh ke pūre ilāqe par qabzā kar liyā. Is meñ maidān-e-murtafā ke tamām shahr shāmil the, nīz Salkā aur Idraī tak Jiliyād aur Basan ke pūre ilāqe.

¹¹ Bādshāh Oj dewqāmat qabile Rafāī kā ākhirī mard thā. Us kā lohe kā tābūt 13 se zāyd fuṭ lambā aur chhih fuṭ chaurā thā aur āj tak Ammoniyoñ ke shahr Rabbā meñ dekhā jā saktā hai.

Yardan ke Mashriq meñ Mulk kī Taqsīm

¹² Jab ham ne Dariyā-e-Yardan ke mashriqī ilāqe par qabzā kiyā to maiñ ne Rūbin aur Jad ke qabiloñ ko us kā junūbī hissā shahroñ samet diyā. Is ilāqe kī junūbī sarhad Dariyā-e-Arnon par wāqe shahr Aroīr hai jabki shimāl meñ is meñ Jiliyād ke pahāṛi ilāqe kā ādhā hissā bhī shāmil hai. ¹³ Jiliyād kā shimālī hissā aur Basan kā mulk maiñ ne Manassī ke ādhe qabile ko diyā.

(Basan meñ Arjūb kā ilāqā hai jahān pahle Oj Bādshāh kī hukūmat thi aur jo Rafāiyoñ

yānī Dewqāmat Afrād kā Mulk kahlātā thā.
¹⁴ Manassī ke qabīle ke ek ādmī banām Yār ne Arjūb par Jasūriyon aur Mākātiyon kī sarhad tak qabzā kar liyā thā. Us ne is ilāqe kī bastiyon ko apnā nām diyā. Āj tak yihī nām Hawwot-yār yānī Yār kī Bastiyān chaltā hai.)

¹⁵ Maiñ ne Jiliyād kā shimālī hissā Manassī ke kunbe Makīr ko diyā ¹⁶ lekin Jiliyād kā junūbī hissā Rūbin aur Jad ke qabilōn ko diyā. Is hisse kī ek sarhad junūb meñ Wādī-e-Arnon ke bīch meñ se guzartī hai jabki dūsrī sarhad Dariyā-e-Yabboq hai jis ke pār Ammoniyoñ kī hukumat hai. ¹⁷ Us kī maḡribī sarhad Dariyā-e-Yardan hai yānī Kinnarat (Galil) kī Jhīl se le kar Bahīrā-e-Murdār tak jo Pisgā ke pahārī silsile ke dāman meñ hai.

¹⁸ Us waqt maiñ ne Rūbin, Jad aur Manassī ke qabilōn se kahā, “Rab tumhāre Khudā ne tumheñ mīrās meñ yih mulk de diyā hai. Lekin shart yih hai ki tumhāre tamām jang karne ke qābil mard musallah ho kar tumhāre Isrāīlī bhāiyoñ ke āge āge Dariyā-e-Yardan ko pār karen. ¹⁹ Sirf tumhārī auraten aur bachche pīchhe rah kar un shahroñ meñ intazār kar sakte hain jo maiñ ne tumhāre lie muqarrar kie hain. Tum apne maweshiyoñ ko bhī pīchhe chhoṛ sakte ho, kyonki mujhe patā hai ki tumhāre bahut zyādā jānwar hain. ²⁰ Apne bhāiyoñ ke sāth chalte hue un kī madad karte raho. Jab Rab tumhārā Khudā unheñ Dariyā-e-Yardan ke maḡhrīb meñ wāqe mulk degā aur wuh tumhārī tarah ārām aur sukūn se wahān ābād ho jāēnge tab tum apne mulk meñ wāpas

jā sakte ho.”

Mūsā ko Yordan Pār Karne kī Ijāzat Nahīn Miltī

²¹ Sāth sāth maiñ ne Yashua se kahā, “Tū ne apnī āñkhoñ se sab kuchh dekh liyā hai jo Rab tumhāre Khudā ne in donoñ bādshāhoñ Sīhon aur Oj se kiyā. Wuh yihī kuchh har us bādshāh ke sāth karegā jis ke mulk par tū dariyā ko pār karke hamlā karegā. ²² Un se na ḍaro. Tumhārā Khudā khud tumhāre lie jang karegā.”

²³ Us waqt maiñ ne Rab se iltijā karke kahā,
²⁴ “Ai Rab Qādir-e-mutlaq, tū apne khādim ko apnī azmat aur qudrat dikhāne lagā hai. Kyā āsmān yā zamīn par koi aur Khudā hai jo terī tarah ke azīm kām kar saktā hai? Hargiz nahīn!
²⁵ Mehrbānī karke mujhe bhī Dariyā-e-Yordan ko pār karke us achchhe mulk yānī us behtarīn pahāṛī ilāqe ko Lubnān tak dekhne kī ijāzat de.”

²⁶ Lekin tumhāre sabab se Rab mujh se nārāz thā. Us ne merī na sunī balki kahā, “Bas kar! Āindā mere sāth is kā zikr na karnā. ²⁷ Pisgā kī choṭī par chaṛh kar chāron taraf nazar daurā. Wahān se ghaur se dekh, kyoñki tū khud Dariyā-e-Yordan ko ubūr nahīn karegā. ²⁸ Apnī jagah Yashua ko muqarrar kar. Us kī hauslā-afzāī kar aur use mazbūt kar, kyoñki wuhī is qaum ko Dariyā-e-Yordan ke maḡrib meñ le jāegā aur qabiloñ meñ us mulk ko taqsīm karegā jise tū pahāṛ se dekhegā.”

²⁹ Chunāñche ham Bait-faḡhūr ke qarīb wādī meñ ṭhahre.

4

Farmānbardārī kī Ashadd Zarūrat

¹ Ai Isrāīl, ab wuh tamām ahkām dhyān se sun le jo maiñ tumheñ sikhātā hūñ. Un par amal karo tāki tum zindā raho aur jā kar us mulk par qabzā karo jo Rab tumhāre bāpdādā kā Khudā tumheñ dene wālā hai. ² Jo ahkām maiñ tumheñ sikhātā hūñ un meñ na kisī bāt kā izāfā karo aur na un se koī bāt nikālo. Rab apne Khudā ke tamām ahkām par amal karo jo maiñ ne tumheñ die hain. ³ Tum ne khud dekhā hai ki Rab ne Bāl-faġhūr se kyā kuchh kiyā. Wahān Rab tere Khudā ne har ek ko halāk kar dālā jis ne Faġhūr ke Bāl Dewatā kī pūjā kī. ⁴ Lekin tum meñ se jitne Rab apne Khudā ke sāth liptē rahe wuh sab āj tak zindā hain.

⁵ Maiñ ne tumheñ tamām ahkām yoñ sikhā die hain jis tarah Rab mere Khudā ne mujhe batāyā. Kyonki lāzim hai ki tum us mulk meñ in ke tābe raho jis par tum qabzā karne wāle ho. ⁶ Inheñ māno aur in par amal karo to dūsrī qaumोñ ko tumhārī dānishmandī aur samajh nazar āegī. Phir wuh in tamām ahkām ke bāre meñ sun kar kaheñgī, “Wāh, yih azīm qaum kaisī dānishmand aur samajhdār hai!” ⁷ Kaun-sī azīm qaum ke mābūd itne qarīb hain jitnā hamārā Khudā hamāre qarīb hai? Jab bhī ham madad ke lie pukārte hain to Rab hamārā Khudā maujūd hotā hai. ⁸ Kaun-sī azīm qaum ke pās aise munsifānā ahkām aur hidāyāt hain jaise maiñ āj tumheñ pūrī sharīat sunā kar pesh kar rahā hūñ?

9 Lekin қhabardār, ehtiyāt karnā aur wuh tamām bāteñ na bhūlnā jo terī āñkhoñ ne dekhī hain. Wuh umr-bhar tere dil meñ se miñ na jāeñ balki unheñ apne bachchoñ aur pote-potiyon ko bhī batāte rahnā. **10** Wuh din yād kar jab tū Horib yānī Sīnā Pahār par Rab apne Қhudā ke sāmne hāzir thā aur us ne mujhe batāyā, “Qaum ko yahāñ mere pās jamā kar tāki maiñ un se bāt karūn aur wuh umr-bhar merā khauf māneñ aur apne bachchoñ ko merī bāteñ sikhāte raheñ.”

11 Us waqt tum qarīb ā kar pahār ke dāman meñ khaṛe hue. Wuh jal rahā thā, aur us kī āg āsmān tak bhaṛak rahī thī jabki kāle bādalōn aur gahre andhere ne use nazaroñ se chhupā diyā. **12** Phir Rab āg meñ se tum se hamkalām huā. Tum ne us kī bāteñ sunīñ lekin us kī koī shakl na dekhī. Sirf us kī āwāz sunāī dī. **13** Us ne tumhāre lie apne ahd yānī un 10 ahkām kā elān kiyā aur hukm diyā ki in par amal karo. Phir us ne unheñ patthar kī do takhtiyon par likh diyā. **14** Rab ne mujhe hidāyat kī, “Unheñ wuh tamām ahkām sikhā jin ke mutābiq unheñ chalnā hogā jab wuh Dariyā-e-Yardan ko pār karke Kanān par qabzā kareñge.”

Butparastī ke bāre meñ Āgāhī

15 Jab Rab Horib yānī Sīnā Pahār par tum se hamkalām huā to tum ne us kī koī shakl na dekhī. Chunāñche қhabardār raho **16** ki tum ġhalat kām karke apne lie kisī bhī shakl kā but na banāo. Na mard, aurat, **17** zamīn par chalne wāle jānwar, parinde, **18** reñgne wāle jānwar yā machhlī kā but banāo. **19** Jab tū āsmān kī taraf nazar uṭhā kar āsmān kā pūrā lashkar

dekhe to sūraj, chānd aur sitāroṇ kī parastish aur ḥidmat karne kī āzmāish meṇ na paṛnā. Rab tere Ḳhudā ne in chīzoṇ ko bāqī tamām qaumoṇ ko atā kiyā hai, ²⁰ lekin tumheṇ us ne Misr ke bhaṛakte bhaṭṭe se nikālā hai tāki tum us kī apnī qaum aur us kī mīrās ban jāo. Aur āj aisā hī huā hai.

²¹ Tumhāre sabab se Rab ne mujh se nārāz ho kar qasam khāī ki tū Dariyā-e-Yardan ko pār karke us achchhe mulk meṇ dākhil nahīn hogā jo Rab terā Ḳhudā tujhe mīrās meṇ dene wālā hai. ²² Maiṇ yihīn isī mulk meṇ mar jāūngā aur Dariyā-e-Yardan ko pār nahīn karūngā. Lekin tum dariyā ko pār karke us behtarīn mulk par qabzā karoge. ²³ Har sūrat meṇ wuh ahd yād rakhnā jo Rab tumhāre Ḳhudā ne tumhāre sāth bāndhā hai. Apne lie kisī bhī chīz kī mūrat na banānā. Yih Rab kā hukm hai, ²⁴ kyoṇki Rab terā Ḳhudā bhasm kar dene wālī āg hai, wuh ġhayūr Ḳhudā hai.

²⁵ Tum mulk meṇ jā kar wahān rahoge. Tumhāre bachche aur pote-nawāse us meṇ paidā ho jāēnge. Jab is tarah bahut waqt guzar jāegā to ḫatrā hai ki tum ġhalat kām karke kisī chīz kī mūrat banāo. Aisā kabhī na karnā. Yih Rab tumhāre Ḳhudā kī nazar meṇ burā hai aur use ġhussā dilāegā. ²⁶ Āj āsmān aur zamīn mere gawāh haiṇ ki agar tum aisā karo to jaldī se us mulk meṇ se miṭ jāoge jis par tum Dariyā-e-Yardan ko pār karke qabzā karoge. Tum der tak wahān jīte nahīn rahoge balki pūre taur par halāk ho jāoge. ²⁷ Rab tumheṇ mulk se nikāl kar muķhtalif qaumoṇ meṇ muntashir kar degā,

aur wahān̄ sirf thore hī afrād bache raheñge.
²⁸ Wahān̄ tum insān̄ ke hāthoñ se bane hue lakarī aur patthar ke butoñ kī khidmat karoge, jo na dekh sakte, na sun sakte, na khā sakte aur na sūñgh sakte hain̄.

²⁹ Wahīn tū Rab apne Khudā ko talāsh karegā, aur agar use pūre dil-o-jān se dhūndē to wuh tujhe mil bhī jāegā. ³⁰ Jab tū is taklīf meñ mutbalā hogā aur yih sārā kuchh tujh par se guzaregā phir ākhirkār Rab apne Khudā kī taraf rujū karke us kī sunegā. ³¹ Kyoñki Rab terā Khudā rahīm Khudā hai. Wuh tujhe na tark karegā aur na barbād karegā. Wuh us ahd ko nahīn̄ bhūlegā jo us ne qasam khā kar tere bāpdādā se bāndhā thā.

Rab hī Hamārā Khudā Hai

³² Duniyā meñ insān kī takhliq se le kar āj tak māzī kī taftīsh kar. Āsmān ke ek sire se dūsre sire tak khoj lagā. Kyā is se pahle kabhī is tarah kā mojizānā kām huā hai? Kyā kisī ne is se pahle is qism ke azīm kām kī khabar sunī hai? ³³ Tū ne āg meñ se boltī huī Allāh kī āwāz sunī to bhī jītā bachā! Kyā kisī aur qaum ke sāth aisā huā hai? ³⁴ Kyā kisī aur mābūd ne kabhī jurrat kī hai ki Rab kī tarah pūrī qaum ko ek mulk se nikāl kar apnī milkiyat banāyā ho? Us ne aisā hī tumhāre sāth kiyā. Us ne tumhāre dekhte dekhte Misriyon̄ ko āzmāyā, unheñ bare mojize dikhāe, un ke sāth jang kī, apnī barī qudrat aur iķhtiyār kā izhār kiyā aur haulnāk kāmoñ se un par ghālib ā gayā.

³⁵ Tujhe yih sab kuchh dikhāyā gayā tāki tū jān le ki Rab Ḳhudā hai. Us ke siwā koī aur nahīn hai. ³⁶ Us ne tujhe nasiḥat dene ke lie āsmān se apnī āwāz sunāī. Zamīn par us ne tujhe apnī azīm āg dikhāī jis meṇ se tū ne us kī bāteṇ sunīn. ³⁷ Use tere bāpdādā se pyār thā, aur us ne tujhe jo un kī aulād haiṇ chun liyā. Is lie wuh Ḳhud hāzir ho kar apnī azīm qudrat se tujhe Misr se nikāl lāyā. ³⁸ Us ne tere āge se tujh se zyādā barī aur tāqatwar qaumeṇ nikāl dīn tāki tujhe un kā mulk mīrās meṇ mil jāe. Āj aisā hī ho rahā hai.

³⁹ Chunāñche āj jān le aur zahan meṇ rakh ki Rab āsmān aur zamīn kā Ḳhudā hai. Koī aur mābūd nahīn hai. ⁴⁰ Us ke ahkām par amal kar jo maiṇ tujhe āj sunā rahā hūn. Phir tū aur terī aulād kāmyāb hoṅge, aur tū der tak us mulk meṇ jītā rahegā jo Rab tujhe hameshā ke lie de rahā hai.

Yardan ke Mashriq meṇ Panāh ke Shahr

⁴¹ Yih kah kar Mūsā ne Dariyā-e-Yardan ke mashriq meṇ panāh ke tīn shahr chun lie. ⁴² Un meṇ wuh shakhs panāh le saktā thā jis ne dushmanī kī binā par nahīn balki ḡhairirādī taur par kisī ko jān se mār diyā thā. Aise shahr meṇ panāh lene ke sabab se use badle meṇ qatl nahīn kiyā jā saktā thā. ⁴³ Is ke lie Rūbin ke qabile ke lie maidān-e-murtafā kā shahr Basar, Jad ke qabile ke lie Jiliyād kā shahr Rāmāt aur Manassī ke qabile ke lie Basan kā shahr Jaulān chunā gayā.

Sharīat kā Peshlafz

⁴⁴ Darj-e-zail wuh sharīat hai jo Mūsā ne Isrāiliyon ko pesh kī. ⁴⁵ Mūsā ne yih ahkām aur hidāyāt us waqt pesh kīn jab wuh Misr se nikal kar ⁴⁶ Dariyā-e-Yardan ke mashriqī kināre par the. Bait-faġhūr un ke muqābil thā, aur wuh Amorī bādshāh Sīhon ke mulk meñ khaimāzan the. Sīhon kī rīhaish Hasbon meñ thī aur use Isrāiliyon se shikast hui thī jab wuh Mūsā kī rāhnumāī meñ Misr se nikal āe the. ⁴⁷ Us ke mulk par qabzā karke unhoñ ne Basan ke mulk par bhī fatah pāī thī jis kā bādshāh Oj thā. In donoñ Amorī bādshāhoñ kā yih pūrā ilāqā un ke hāth meñ ā gayā thā. Yih ilāqā Dariyā-e-Yardan ke mashriq meñ thā. ⁴⁸ Us kī junūbī sarhad Dariyā-e-Arnon ke kināre par wāqe shahr Aroīr thī jabki us kī shimālī sarhad Siryūn yānī Harmūn Pahār thī. ⁴⁹ Dariyā-e-Yardan kā pūrā mashriqī kinārā Pisgā ke pahārī silsile ke dāman meñ wāqe Bahīrā-e-Murdār tak us meñ shāmil thā.

5

Das Ahkām

¹ Mūsā ne tamām Isrāiliyoñ ko jamā karke kahā,

Ai Isrāīl, dhyān se wuh hidāyāt aur ahkām sun jo maiñ tumheñ āj pesh kar rahā hūn. Unheñ sīkho aur barī ehtiyāt se un par amal karo.

² Rab hamāre Khudā ne Horib yānī Sīnā Pahār par hamāre sāth ahd bāndhā. ³ Us ne yih ahd hamāre bāpdādā ke sāth nahīn balki hamāre hī sāth bāndhā hai, jo āj is jagah par zindā haiñ.

⁴ Rab pahār par āg meñ se rūbarū ho kar tum

se hamkalām huā. ⁵ Us waqt maiñ tumhāre aur Rab ke darmiyān khaṛā huā tāki tumheñ Rab kī bāteñ sunāūñ. Kyoñki tum āg se ḥarte the aur is lie pahāṛ par na charhe. Us waqt Rab ne kahā,

⁶ “Maiñ Rab terā Khudā hūñ jo tujhe Mulk-e-Misr kī ghulāmī se nikāl lāyā. ⁷ Mere siwā kisi aur mābūd kī parastish na karnā.

⁸ Apne lie but na banānā. Kisī bhī chīz kī mūrat na banānā, chāhe wuh āsmān meñ, zamīn par yā samundar meñ ho. ⁹ Na butoñ kī parastish, na un kī khidmat karnā, kyoñki maiñ terā Rab ġhayūr Khudā hūñ. Jo mujh se nafrat karte hain unheñ maiñ tīsrī aur chauthī pusht tak sazā dūngā. ¹⁰ Lekin jo mujh se muhabbat rakhte aur mere ahkām pūre karte hain un par maiñ hazār pushtoñ tak mehrbānī karūñga.

¹¹ Rab apne Khudā kā nām bemaqsad yā ġhalat maqsad ke lie istemāl na karnā. Jo bhī aisā kartā hai use Rab sazā die bağhair nahīñ chhořegā.

¹² Sabat ke din kā khayāl rakhnā. Use is tarah manānā ki wuh makhsūs-o-muqaddas ho, usī tarah jis tarah Rab tere Khudā ne tujhe hukm diyā hai. ¹³ Hafte ke pahle chhīh din apnā kāmkāj kar, ¹⁴ lekin sātwān din Rab tere Khudā kā ārām kā din hai. Us din kisī tarah kā kām na karnā. Na tū, na terā betā, na terī betī, na terā naukar, na terī naukarānī, na terā bail, na terā gadhā, na terā koī aur maweshī. Jo pardesī tere darmiyān rahtā hai wuh bhī kām na kare. Tere naukar aur terī naukarānī ko terī tarah ārām kā mauqā milnā hai. ¹⁵ Yād rakhnā ki tū Misr meñ ghulām thā aur ki Rab terā Khudā hī tujhe bařī

qudrat aur i᳚htiyār se wahān se nikāl lāyā. Is lie us ne tujhe hukm diyā hai ki Sabat kā din manānā.

¹⁶ Apne bāp aur apnī mān kī izzat karnā jis tarah Rab tere Khudā ne tujhe hukm diyā hai. Phir tū us mulk meñ jo Rab terā Khudā tujhe dene wālā hai khushhāl hogā aur der tak jītā rahegā.

¹⁷ Qatl na karnā.

¹⁸ Zinā na karnā.

¹⁹ Chorī na karnā.

²⁰ Apne paṛosī ke bāre meñ jhūṭī gawāhī na denā.

²¹ Apne paṛosī kī bīwī kā lālach na karnā. Na us ke ghar kā, na us kī zamīn kā, na us ke naukar kā, na us kī naukarānī kā, na us ke bail aur na us ke gadhe kā balki us kī kisi bhī chīz kā lālach na karnā.”

²² Rab ne tum sab ko yih ahkām die jab tum Sīnā Pahāṛ ke dāman meñ jamā the. Wahān tum ne āg, bādal aur gahre andhere meñ se us kī zordār āwāz sunī. Yihī kuchh us ne kahā aur bas. Phir us ne unheñ patthar kī do ta᳚ktiyōñ par likh kar mujhe de diyā.

Log Rab se Darte Hain

²³ Jab tum ne tārīkī se yih āwāz sunī aur pahāṛ kī jaltī huī hālat dekhī to tumhāre qabilōñ ke rāhnumā aur buzurg mere pās āe. ²⁴ Unhoñ ne kahā, “Rab hamāre Khudā ne ham par apnā jalāl aur azmat zāhir kī hai. Āj ham ne āg meñ se us kī āwāz sunī hai. Ham ne dekh liyā hai ki jab Allāh insān se hamkalām hotā hai to zarūrī nahīn ki wuh mar jāe. ²⁵ Lekin ab ham kyoñ apnī

jān қhatre meñ dālen? Agar ham mazīd Rab apne Қhudā kī āwāz sunen to yih bařī āg hameñ bhasm kar degī aur ham apnī jān se hāth dho baiṭheñge. ²⁶ Kyoñki fānī insānoñ meñ se kaun hamārī tarah zindā Қhudā ko āg meñ se bāteñ karte hue sun kar zindā rahā hai? Koī bhī nahīñ! ²⁷ Āp hī qarib jā kar un tamām bāton ko sunen jo Rab hamārā Қhudā hameñ batānā chāhtā hai. Phir lauṭ kar hameñ wuh bāteñ sunāeñ. Ham unheñ sunēnge aur un par amal kareñge.”

²⁸ Jab Rab ne yih sunā to us ne mujh se kahā, “Maiñ ne in logoñ kī yih bāteñ sun lī hain. Wuh ṭhīk kahte hain. ²⁹ Kāsh un kī soch hameshā aisī hī ho! Kāsh wuh hameshā isī tarah merā khauf māneñ aur mere ahkām par amal karen! Agar wuh aisā kareñge to wuh aur un kī aulād hameshā kāmyāb raheñge. ³⁰ Jā, unheñ batā de ki apne қhaimoñ meñ lauṭ jāo. ³¹ Lekin tū yahāñ mere pās rah tāki maiñ tujhe tamām qawāñīn aur ahkām de dūñ. Un ko logoñ ko sikhānā tāki wuh us mulk meñ un ke mutābiq chaleñ jo maiñ unheñ dūngā.”

³² Chunāñche ehtiyāt se un ahkām par amal karo jo Rab tumhāre Қhudā ne tumheñ die hain. Un se na dāñ taraf haṭo na bāñ taraf. ³³ Hameshā us rāh par chalte raho jo Rab tumhāre Қhudā ne tumheñ batāī hai. Phir tum kāmyāb hoge aur us mulk meñ der tak jīte rahoge jis par tum qabzā karoge.

6

Sab se Barā Hukm

¹ Yih wuh tamām ahkām haiñ jo Rab tumhāre Қhudā ne mujhe tumheñ sikhāne ke lie kahā. Us mulk meñ in par amal karnā jis meñ tum jāne wāle ho tāki us par qabzā karo. ² Umr-bhar tū, tere bachche aur pote-nawāse Rab apne Қhudā kā khauf māneñ aur us ke un tamām ahkām par chaleñ jo maiñ tujhe de rahā hūn. Tab tū der tak jitā rahegā. ³ Ai Isrāīl, yih merī bāteñ sun aur baṛī ehtiyāt se in par amal kar! Phir Rab tere Қhudā kā wādā pūrā ho jāegā ki tū kāmyāb rahegā aur terī tādād us mulk meñ khūb baṛhtī jāegī jis meñ dūdh aur shahd kī kasrat hai.

⁴ Sun ai Isrāīl! Rab hamārā Қhudā ek hī Rab hai. ⁵ Rab apne Қhudā se apne pūre dil, apnī pūrī jān aur apnī pūrī tāqat se pyār karnā. ⁶ Jo ahkām maiñ tujhe āj batā rahā hūn unheñ apne dil par naqsh kar. ⁷ Unheñ apne bachchoñ ke zahannashīn karā. Yihī bāteñ har waqt aur har jagah tere laboñ par hoñ khāh tū ghar meñ baiṭhā yā rāste par chaltā ho, leṭā ho yā khaṛā ho. ⁸ Unheñ nishān ke taur par aur yāddihānī ke lie apne bāzuoñ aur māthe par lagā. ⁹ Unheñ apne gharoñ kī chaukhaṭoñ aur apne shahroñ ke darwāzoñ par likh.

¹⁰ Rab tere Қhudā kā wādā pūrā hogā jo us ne qasam khā kar tere bāpdādā Ibrāhīm, Is'hāq aur Yāqūb ke sāth kiyā ki maiñ tujhe Kanān meñ le jāūngā. Jo baṛe aur shāndār shahr us meñ haiñ wuh tū ne khud nahīn banāe. ¹¹ Jo makān us meñ haiñ wuh aisī achchhī chīzoñ se bhare hue haiñ jo tū ne un meñ nahīn rakhīn. Jo kueñ us meñ haiñ un ko tū ne nahīn khodā. Jo angūr aur zaitūn ke bāgh us meñ haiñ unheñ tū ne nahīn

lagāyā. Yih haqīqat yād rakh. Jab tū us mulk meñ kasrat kā khānā khā kar ser ho jāegā ¹² to khabardār! Rab ko na bhūlnā jo tujhe Misr kī ġħulāmī se nikāl lāyā.

¹³ Rab apne Khudā kā khauf mānanā. Sirf usī kī ibādat karnā aur usī kā nām le kar qasam khānā. ¹⁴ Dīgar mābūdoñ kī pairawī na karnā. Is meñ tamām paṛosī aqwām ke dewatā bhī shāmil haiñ. ¹⁵ Warnā Rab tere Khudā kā ġħazab tujh par nāzil ho kar tujhe mulk meñ se miṭā dālegā. Kyoñki wuh ġħayür Khudā hai aur tere darmiyān hī rahtā hai.

¹⁶ Rab apne Khudā ko us tarah na āzmānā jis tarah tum ne Massā meñ kiyā thā. ¹⁷ Dhyān se Rab apne Khudā ke ahkām ke mutābiq chalo, un tamām hidāyat aur qawānīn par jo us ne tujhe die haiñ. ¹⁸ Jo kuchh Rab kī nazar meñ durust aur achchhā hai wuh kar. Phir tū kāmyāb rahegā, tū jā kar us achchhe mulk par qabzā karegā jis kā wādā Rab ne tere bāpdādā se qasam khā kar kiyā thā. ¹⁹ Tab Rab kī bāt pūrī ho jāegī ki tū apne dushmanoñ ko apne āge āge nikāl degā.

²⁰ Āne wāle dinoñ meñ tere bachche pūchheinge, “Rab hamāre Khudā ne āp ko in tamām ahkām par amal karne ko kyoñ kahā?” ²¹ Phir unheñ jawāb denā, “Ham Misr ke bādshāh Firaun ke ġħulām the, lekin Rab hameñ baṛī qudrat kā izħār karke Misr se nikāl lāyā. ²² Hamāre dekhte dekhte us ne baṛe baṛe nishān aur mojize kie aur Misr, Firaun aur us ke pūre għarāne par haulnāk musibateñ bhejîn. ²³ Us waqt wuh hameñ wahān se nikāl lāyā taki

hameñ le kar wuh mulk de jis kā wādā us ne qasam khā kar hamāre bāpdādā ke sāth kiyā thā. ²⁴ Rab hamāre Khudā hī ne hameñ kahā ki in tamām ahkām ke mutābiq chalo aur Rab apne Khudā kā ƙhauf māno. Kyonki agar ham aisā kareñ to phir ham hameshā kāmyāb aur zindā raheñge. Aur āj tak aisā hī rahā hai. ²⁵ Agar ham Rab apne Khudā ke huzūr rah kar ehtiyāt se un tamām bātoñ par amal kareñge jo us ne hameñ karne ko kahī haiñ to wuh hameñ rāstbāz qarār degā.”

7

Dūsrī Kanānī Qaumōñ ko Nikālnā Hai

¹ Rab terā Khudā tujhe us mulk meñ le jāegā jis par tū jā kar qabzā karegā. Wuh tere sāmne se bahut-sī qaumeñ bhagā degā. Go yih sāt qaumeñ yānī Hittī, Jirjāsī, Amorī, Kanānī, Farizzī, Hiwwī aur Yabūsī tādād aur tāqat ke lihāz se tujh se baṛī hoṅgī ² to bhī Rab terā Khudā unheñ tere hawāle karegā. Jab tū unheñ shikast degā to un sab ko us ke lie makhsūs karke halāk kar denā hai. Na un ke sāth ahd bāndhnā aur na un par rahm karnā. ³ Un meñ se kisī se shādī na karnā. Na apnī betiyoñ kā rishtā un ke betoñ ko denā, na apne betoñ kā rishtā un kī betiyoñ se karnā. ⁴ Warnā wuh tumhāre bachchoñ ko merī pairawī se dūr kareñge aur wuh merī nahīn balki un ke dewataoñ kī ƙhidmat kareñge. Tab Rab kā ghanazab tum par nāzil ho kar jaldī se tumheñ halāk kar degā. ⁵ Is lie un kī qurbāngāheñ dhā denā. Jin pattharoñ kī wuh pūjā karte haiñ

unhein chaknāchūr kar denā, un ke Yasīrat Dewī ke khambe kāt dālnā aur un ke but jalā denā.

⁶ Kyoñki tū Rab apne Khudā ke lie makhsūs-o-muqaddas hai. Us ne duniyā kī tamām qaumōn mein se tujhe chun kar apnī qaum aur khās milkiyat banāyā. ⁷ Rab ne kyoñ tumhāre sāth tälluq qāym kiyā aur tumhein chun liyā? Kyā is wajah se ki tum tādād mein dīgar qaumōn kī nisbat zyādā the? Hargiz nahīn! Tum to bahut kam the. ⁸ Balki wajah yih thī ki Rab ne tumhein pyār kiyā aur wuh wādā pūrā kiyā jo us ne qasam khā kar tumhāre bāpdādā ke sāth kiyā thā. Isī lie wuh fidyā de kar tumhein baṛī qudrat se Misr kī ġhulāmī aur us mulk ke bādshāh ke hāth se bachā lāyā. ⁹ Chunāñche jān le ki sirf Rab terā Khudā hī Khudā hai. Wuh wafādār Khudā hai. Jo us se muhabbat rakhte aur us ke ahkām par amal karte hain un ke sāth wuh apnā ahd qāym rakhegā aur un par hazār pushton tak mehrbānī karegā. ¹⁰ Lekin us se nafrat karne wāloñ ko wuh un ke rūbarū munāsib sazā de kar barbād karegā. Hān, jo us se nafrat karte hain, un ke rūbarū wuh munāsib sazā degā aur jhikkegā nahīn.

¹¹ Chunāñche dhyān se un tamām ahkām par amal kar jo maiñ āj tujhe de rahā hūn tāki tū un ke mutābiq zindagī guzāre. ¹² Agar tū un par tawajjuh de aur ehtiyāt se un par chale to phir Rab terā Khudā tere sāth apnā ahd qāym rakhegā aur tujh par mehrbānī karegā, bilkul us wāde ke mutābiq jo us ne qasam khā kar tere bāpdādā se kiyā thā. ¹³ Wuh tujhe pyār karegā aur tujhe us mulk mein barkat degā jo tujhe dene

kā wādā us ne qasam khā kar tere bāpdādā se kiyā thā. Tujhe bahut aulād baķhshne ke alāwā wuh tere kheton ko barkat degā, aur tujhe kasrat kā anāj, angūr aur zaitūn hāsil hogā. Wuh tere rewarōn ko bhī barkat degā, aur tere gāy-bailon aur bher-bakriyon kī tādād barhtī jāegī. ¹⁴ Tujhe dīgar tamām qaumoṇ kī nisbat kahīn zyādā barkat milegī. Na tujh meṇ aur na tere maweshiyon meṇ bānjhpan pāyā jāegā. ¹⁵ Rab har bīmārī ko tujh se dūr rakhegā. Wuh tujh meṇ wuh khatarnāk wabāeṇ phailne nahīn degā jin se tū Misr meṇ wāqif huā balki unheṇ un meṇ phailāegā jo tujh se nafrat rakhte hain.

¹⁶ Jo bhī qaumeṇ Rab terā Khudā tere hāth meṇ kar degā unheṇ tabāh karnā lāzim hai. Un par rahm kī nigāh se na dekhnā, na un ke dewatāoṇ kī ķhidmat karnā, warnā tū phaṇs jāegā.

¹⁷ Go terā dil kahe, “Yih qaumeṇ ham se tāqatwar hain. Ham kis tarah inheṇ nikāl sakte hain?” ¹⁸ To bhī un se na ḍar. Wuhī kuchh zahan meṇ rakh jo Rab tere Khudā ne Firaun aur pūre Misr ke sāth kiyā. ¹⁹ Kyoṇki tū ne apnī āñkhoṇ se Rab apne Khudā kī wuh barī āzmāne wālī musībateṇ aur mojize, us kā wuh azīm ikhtiyār aur qudrat dekhī jis se wuh tujhe wahān se nikāl lāyā. Wuhī kuchh Rab terā Khudā un qaumoṇ ke sāth bhī karegā jin se tū is waqt ḍartā hai. ²⁰ Na sirf yih balki Rab terā Khudā un ke darmiyān zambūr bhī bhejegā tāki wuh bhī tabāh ho jāeṇ jo pahle hamlon se bach kar chhup gae hain. ²¹ Un se dahshat na khā, kyoṇki Rab terā Khudā tere darmiyān hai. Wuh

azīm Khudā hai jis se sab կhauf khāte haiں.
22 Wuh raftā raftā un qaumōn ko tere āge se bhagā degā. Tū unheň ek dam կhatm nahīn kar sakegā, warnā janglī jānwar tezī se barh kar tujhe nuqsān pahuchāenge.

23 Rab terā Khudā unheň tere hawāle kar degā. Wuh un meň itnī sakht afrā-tafrī paidā karegā ki wuh barbād ho jāeňge. **24** Wuh un ke bādshāhoň ko bhī tere qābū meň kar degā, aur tū un kā nām-o-nishān miṭā degā. Koī bhī terā sāmnā nahīn kar sakegā balki tū un sab ko barbād kar degā.

25 Un ke dewatāoň ke mujassame jalā denā. Jo chāndī aur sonā un par chaṛhāyā huā hai us kā lālach na karnā. Use na lenā warnā tū phańs jāegā. Kyoňki in chīzoň se Rab tere Khudā ko ghin ātī hai. **26** Is tarah kī makrūh chīz apne ghar meň na lānā, warnā tujhe bhī us ke sāth alag karke barbād kiyā jāegā. Tere dil meň us se shadīd nafrat aur ghin ho, kyoňki use pūre taur par barbād karne ke lie maķhsūs kiyā gayā hai.

8

Rab ko na Bhūlnā

1 Ehtiyāt se un tamām ahkām par amal karو jo maiñ āj tujhe de rahā hūn. Kyoňki aisā karne se tum jite rahoge, tādād meň barhgoge aur jā kar us mulk par qabzā karoge jis kā wādā Rab ne tumhāre bāpdādā se qasam khā kar kiyā thā.

2 Wuh pūrā waqt yād rakh jab Rab terā Khudā registān meň 40 sāl tak terī rāhnumāī kartā rahā tāki tujhe ājiz karke āzmāe aur mālūm kare ki

kyā tū us ke ahkām par chalegā ki nahīn. ³ Us ne tujhe ājiz karke bhūke hone diyā, phir tujhe man khilāyā jis se na tū aur na tere bāpdādā wāqif the. Kyoñki wuh tujhe sikhānā chāhtā thā ki insān kī zindagī sirf roṭī par munhasir nahīn hotī balki har us bāt par jo Rab ke muñh se nikaltī hai.

⁴ In 40 sāloñ ke daurān tere kapre na ghise na phaṭe, na tere pāñw sūje. ⁵ Chunāñche dil meñ jān le kī jis tarah bāp apne bete kī tarbiyat kartā hai usī tarah Rab hamārā Khudā hamārī tarbiyat kartā hai.

⁶ Rab apne Khudā ke ahkām par amal karke us kī rāhoñ par chal aur us kā ƙhauf mān. ⁷ Kyoñki wuh tujhe ek behtarīn mulk meñ le jā rahā hai jis meñ nahreñ aur aise chashme hain jo pahāriyon aur wādiyon kī zamīn se phūṭ nikalte hain. ⁸ Us kī paidāwār anāj, jau, angūr, anjīr, anār, zaitūn aur shahd hai. ⁹ Us meñ roṭī kī kamī nahīn hogī, aur tū kisi chīz se mahrūm nahīn rahegā. Us ke pattharōñ meñ lohā pāyā jātā hai, aur khudāī se tū us kī pahāriyon se tānbā hāsil kar sakegā.

¹⁰ Jab tū kasrat kā khānā khā kar ser ho jāegā to phir Rab apne Khudā kī tamjīd karnā jis ne tujhe yih shāndār mulk diyā hai. ¹¹ Khabardār, Rab apne Khudā ko na bhūl aur us ke un ahkām par amal karne se gurez na kar jo mainī āj tujhe de rahā hūn. ¹² Kyoñki jab tū kasrat kā khānā khā kar ser ho jāegā, tū shāndār ghar banā kar un meñ rahegā ¹³ aur tere rewaṛ, sone-chāndī aur bāqī tamām māl meñ izāfā hogā ¹⁴ to kahīn tū mağhrūr ho kar Rab apne Khudā ko bhūl na jāe jo tujhe Misr kī ȝhulāmī se nikāl lāyā.

15 Jab tū us wasī aur haulnāk registān meñ safr kar rahā thā jis meñ zahrile sānp aur bichchhū the to wuhī terī rāhnumāī kartā rahā. Pānī se mahrūm us ilāqe meñ wuhī sakht patthar meñ se pānī nikāl lāyā. **16** Registān meñ wuhī tujhe man khilātā rahā, jis se tere bāpdādā wāqif na the. In mushkilāt se wuh tujhe ājiz karke āzmātā rahā tāki ākhirkār tū kāmyāb ho jāe.

17 Jab tujhe kāmyābī hāsil hogī to yih na kahnā ki maiñ ne apnī hī quwwat aur tāqat se yih sab kuchh hāsil kiyā hai. **18** Balki Rab apne Қhudā ko yād karnā jis ne tujhe daulat hāsil karne kī qābiliyat dī hai. Kyoñki wuh āj bhī usī ahd par qāym hai jo us ne tere bāpdādā se kiyā thā.

19 Rab apne Қhudā ko na bhūlnā, aur na dīgar mābūdon ke pichhe paṛ kar unheñ sijdā aur un kī khidmat karnā. Warnā maiñ қhud gawāh hūn ki tum yaqīnan halāk ho jāoge. **20** Agar tum Rab apne Қhudā kī itā'at nahiñ karoge to phir wuh tumheñ un qaumon kī tarah tabāh kar degā jo tum se pahle is mulk meñ rahtī thiñ.

9

Mulk Milne kā Sabab Isrāīl kī Rāstī Nahīn Hai

1 Sun ai Isrāīl! Āj tū Dariyā-e-Yardan ko pār karne wālā hai. Dūsrī taraf tū aisī qaumon ko bhagā degā jo tujh se barī aur tāqatwar haiñ aur jin ke shāndār shahron kī fasileñ āsmān se bāten̄ kartī haiñ. **2** Wahān Anāqī baste haiñ jo tāqatwar aur darāzqad haiñ. Tū қhud jāntā hai ki un ke bāre meñ kahā jātā hai, “Kaun Anāqiyon kā sāmnā kar saktā hai?” **3** Lekin āj jān le ki

Rab terā Khudā tere āge āge chalte hue unheñ bhasm kar dene wālī āg kī tarah halāk karegā. Wuh tere āge āge un par qābū pāegā, aur tū unheñ nikāl kar jaldī miṭā degā, jis tarah Rab ne wādā kiyā hai.

⁴ Jab Rab terā Khudā unheñ tere sāmne se nikāl degā to tū yih na kahnā, “Main rāstbāz hūn, isī lie Rab mujhe lāyq samajh kar yahān lāyā aur yih mulk mīrās meñ de diyā hai.” Yih bāt hargiz durust nahīn hai. Rab un qaumon ko un kī ghalat harkatoñ kī wajah se tere sāmne se nikāl degā. ⁵ Tū apnī rāstbāzī aur diyānatdārī kī binā par us mulk par qabzā nahīn karegā balki Rab unheñ un kī sharīr harkatoñ ke bāis tere sāmne se nikāl degā. Dūsre, jo wādā us ne tere bāpdādā Ibrāhīm, Is'hāq aur Yāqūb ke sāth qasam khā kar kiyā thā use pūrā honā hai.

⁶ Chunāñche jān le ki Rab terā Khudā tujhe terī rāstī ke bāis yih achchhā mulk nahīn de rahā. Haqīqat to yih hai ki tū haṭdharm qaum hai.

Sone kā Bachhrā

⁷ Yād rakh aur kabhī na bhūl ki tū ne registān meñ Rab apne Khudā ko kis tarah nārāz kiyā. Misr se nikalte waqt se le kar yahān pahuñchne tak tum Rab se sarkash rahe ho. ⁸ Khāskar Horib yānī Sīnā ke dāman meñ tum ne Rab ko itnā ghussā dilāyā ki wuh tumheñ halāk karne ko thā. ⁹ Us waqt main pahāṛ par chaṛh gayā thā taki patthar kī takhtiyān yānī us ahd kī takhtiyān mil jāeñ jo Rab ne tumhāre sāth bāndhā thā. Kuchh khāe-pie bağhair maiñ 40 din aur rāt wahān rahā.

10-11 Jo kuchh Rab ne āg meñ se kahā thā jab tum pahāṛ ke dāman meñ jamā the wuhī kuchh us ne apnī unglī se donoñ takhtiyon par likh kar mujhe diyā. **12** Us ne mujh se kahā, “Fauran yahāñ se utar jā. Terī qaum jise tū Misr se nikāl lāyā bigaṛ gaī hai. Wuh kitnī jaldī se mere ahkām se haṭ gae haiñ. Unhoñ ne apne lie but ḫhāl liyā hai. **13** Maiñ ne jān liyā hai ki yih qaum kitnī ziddī hai. **14** Ab mujhe chhoṛ de tāki maiñ unheñ tabāh karke un kā nām-o-nishān duniyā meñ se miṭā dālūn. Un kī jagah maiñ tujh se ek qaum banā lūngā jo un se baṛī aur tāqatwar hogī.”

15 Maiñ muṛ kar pahāṛ se utrā jo ab tak bhaṛak rahā thā. Mere hāthoñ meñ ahd kī donoñ takhtiyāñ thiñ. **16** Tumheñ dekhte hī mujhe mālūm huā ki tum ne Rab apne Khudā kā gunāh kiyā hai. Tum ne apne lie bachhṛē kā but ḫhāl liyā thā. Tum kitnī jaldī se Rab kī muqarrarā rāh se haṭ gae the.

17 Tab maiñ ne tumhāre dekhte dekhte donoñ takhtiyon ko zamīn par paṭakh kar ṭukṛē ṭukṛē kar diyā. **18** Ek aur bār maiñ Rab ke sāmne muñh ke bal girā. Maiñ ne na kuchh khāyā, na kuchh piyā. 40 din aur rāt maiñ tumhāre tamām gunāhoñ ke bāis isī hālat meñ rahā. Kyoñki jo kuchh tum ne kiyā thā wuh Rab ko nihāyat burā lagā, is lie wuh ghazabnāk ho gayā thā. **19** Wuh tum se itnā nārāz thā ki maiñ bahut dar gayā. Yon lag rahā thā ki wuh tumheñ halāk kar degā. Lekin is bār bhī us ne merī sun lī. **20** Maiñ ne Hārūn ke lie bhī duā kī, kyoñki Rab us se bhī nihāyat nārāz thā aur use halāk kar denā chāhtā thā.

²¹ Jo bachhṛā tum ne gunāh karke banāyā thā use maiñ ne jalā diyā, phir jo kuchh bāqī rah gayā use kuchal diyā aur pīs pīs kar pauḍar banā diyā. Yih pauḍar maiñ ne us chashme meñ phaiṅk diyā jo pahāṛ par se bah rahā thā.

²² Tum ne Rab ko Taberā, Massā aur Qabrot-hattawā meñ bhī āghussā dilāyā. ²³ Qādis-barniā meñ bhī aisā hī huā. Wahān se Rab ne tumheñ bhej kar kahā thā, “Jāo, us mulk par qabzā karo jo maiñ ne tumheñ de diyā hai.” Lekin tum ne sarkash ho kar Rab apne Khudā ke hukm kī khilāfwarzī kī. Tum ne us par etamād na kiyā, na us kī sunī. ²⁴ Jab se maiñ tumheñ jāntā hūn tumhārā Rab ke sāth rawaiyā bāghiyānā hī rahā hai.

²⁵ Maiñ 40 din aur rāt Rab ke sāmne zamīn par munh ke bal rahā, kyonki Rab ne kahā thā ki wuh tumheñ halāk kar degā. ²⁶ Main ne us se minnat karke kahā, “Ai Rab Qādir-e-mutlaq, apnī qaum ko tabāh na kar. Wuh to terī hī milkiyat hai jise tū ne fidyā de kar apnī azīm qudrat se bachāyā aur bare ikhtiyār ke sāth Misr se nikāl lāyā. ²⁷ Apne khādimon Ibrāhīm, Is'hāq aur Yāqūb ko yād kar, aur is qaum kī zid, sharīr harkaton aur gunāh par tawajjuh na de. ²⁸ Warnā Misrī kaheñge, ‘Rab unheñ us mulk meñ lāne ke qabil nahīn thā jis kā wādā us ne kiyā thā, balki wuh un se nafrat kartā thā. Hān, wuh unheñ halāk karne ke lie registān meñ le āyā.’ ²⁹ Wuh to terī qaum haiñ, terī milkiyat jise tū apnī azīm qudrat aur ikhtiyār se Misr se nikāl lāyā.”

10

Mūsā ko Naī Takhtiyān Miltī Haiñ

¹ Us waqt Rab ne mujh se kahā, “Patthar kī do aur takhtiyān tarāshnā jo pahlī takhtiyon kī mānind hon. Unheñ le kar mere pās pahār par chaṛh ā. Lakaṛī kā sandūq bhī banānā. ² Phir maiñ in takhtiyon par dubārā wuhī bāteñ likhūngā jo maiñ un takhtiyon par likh chukā thā jo tū ne tor dālin. Tumheñ unheñ sandūq meñ mahfuz rakhnā hai.”

³ Maiñ ne kīkar kī lakaṛī kā sandūq banwāyā aur do takhtiyān tarāshīn jo pahlī takhtiyon kī mānind thīn. Phir maiñ donoñ takhtiyān le kar pahār par chaṛh gayā. ⁴ Rab ne un takhtiyon par dubārā wuh das ahkām likh die jo wuh pahlī takhtiyon par likh chukā thā. (Unhīn ahkām kā elān us ne pahār par āg meñ se kiyā thā jab tum us ke dāman meñ jamā the.) Phir us ne yih takhtiyān mere sapurd kīn. ⁵ Maiñ lauṭ kar utrā aur takhtiyon ko us sandūq meñ rakhā jo maiñ ne banāyā thā. Wahān wuh ab tak haiñ. Sab kuchh waisā hī huā jaisā Rab ne hukm diyā thā.

Imāmon aur Lāwiyon kī Khidmat

⁶ (Is ke bād Isrāīlī Banī-yāqān ke kuoñ se rawānā ho kar mausīrā pahuñche. Wahān Hārūn faut huā. Use dafn karne ke bād us kā betā Iliyazar us kī jagah imām banā. ⁷ Phir wuh āge safr karte karte Judjūdā, phir Yutbātā pahuñche jahān nahreñ haiñ.

⁸ Un dinoñ meñ Rab ne Lāwī ke qabīle ko alag karke use Rab ke ahd ke sandūq ko uṭhā kar le jāne, Rab ke huzūr khidmat karne aur us ke nām

se barkat dene kī zimmedārī dī. Āj tak yih un kī zimmedārī rahī hai. ⁹ Is wajah se Lāwiyon ko dīgar qabiloṇ kī tarah na hissā na mīrās milī. Rab terā Khudā khud un kī mīrās hai. Us ne khud unheṇ yih farmāyā hai.)

¹⁰ Jab maiṇ ne dūsrī martabā 40 din aur rāt pahāṛ par guzāre to Rab ne is dafā bhī merī sunī aur tujhe halāk na karne par āmādā huā. ¹¹ Us ne kahā, “Jā, qaum kī rāhnumāī kar tāki wuh jā kar us mulk par qabzā kareṇ jis kā wādā maiṇ ne qasam khā kar un ke bāpdādā se kiyā thā.”

Rab kā Khauf

¹² Ai Isrāīl, ab merī bāt sun! Rab terā Khudā tujh se kya taqāzā kartā hai? Sirf yih ki tū us kā khauf māne, us kī tamām rāhon par chale, use pyār kare, apne pūre dil-o-jān se us kī khidmat kare ¹³ aur us ke tamām ahkām par amal kare. Āj maiṇ unheṇ tujhe terī behtarī ke lie de rahā hūn.

¹⁴ Pūrā āsmān, zamīn aur jo kuchh us par hai, sab kā mālik Rab terā Khudā hai. ¹⁵ To bhī us ne tere bāpdādā par hī apnī khās shafqat kā izhār karke un se muhabbat kī. Aur us ne tumheṇ chun kar dūsrī tamām qaumoṇ par tarjīh dī jaisā ki āj zāhir hai. ¹⁶ Khatnā us kī qaum kā nishān hai, lekin dhyān rakho ki wuh na sirf zāhirī balki bātinī bhī ho. Āindā aṛ na jāo.

¹⁷ Kyoṇki Rab tumhārā Khudā khudāoṇ kā Khudā aur rabboṇ kā Rab hai. Wuh azīm aur zorāwar Khudā hai jis se sab khauf khāte haiṇ. Wuh jānibdārī nahīn kartā aur rishwat nahīn letā. ¹⁸ Wuh yatīmoṇ aur bewāoṇ kā insāf kartā

hai. Wuh pardesī se pyār kartā aur use ƙhurāk aur poshāk muhaiyā kartā hai. ¹⁹ Tum bhī un ke sāth muhabbat se pesh āo, kyoñki tum bhī Misr meñ pardesī the.

²⁰ Rab apne Ƙhudā kā ƙhauf mān aur us kī khidmat kar. Us se liptā rah aur usī ke nām kī qasam khā. ²¹ Wuhī terā faƙhr hai. Wuh terā Ƙhudā hai jis ne wuh tamām azīm aur ƙarāune kām kie jo tū ne khud dekhe. ²² Jab tere bāpdādā Misr gae the to 70 afrād the. Aur ab Rab tere Ƙhudā ne tujhe sitāron kī mānind beshumār banā diyā hai.

11

Rab se Muhabbat Rakħ aur Us kī Sun

¹ Rab apne Ƙhudā se pyār kar aur hameshā us ke ahkām ke mutābiq zindagī guzār. ² Āj jān lo ki tumhāre bachchoñ ne nahīn balki tumhīn ne Rab apne Ƙhudā se tarbiyat pāi. Tum ne us kī azmat, baṛe iጀhtiyār aur qudrat ko dekhā, ³ aur tum un mojizoñ ke gawāh ho jo us ne Misr ke bādshāh Firaun aur us ke pūre mulk ke sāmne kie. ⁴ Tum ne dekhā ki Rab ne kis tarah Misrī fauj ko us ke ghoṛoñ aur rathoñ samet Bahr-e-Qulzum meñ ጀharq kar diyā jab wuh tumhārā tāqqub kar rahe the. Us ne unheñ yoñ tabāh kiyā ki wuh āj tak bahāl nahīn hue.

⁵ Tumhāre bachche nahīn balki tum hī gawāh ho ki yahāñ pahunchne se pahle Rab ne registān meñ tumhārī kis tarah dekh-bhāl kī. ⁶ Tum ne us kā Iliyāb ke beṭoñ Dātan aur Abīrām ke sāth sulūk dekhā jo Rūbin ke qabīle ke the. Us din zamīn ne ƙhaimāgāh ke andar muñh khol

kar unheň un ke gharānoň, deroň aur tamām jāndāroň samet hařap kar liyā.

⁷ Tum ne apnī hī āñkhoň se Rab ke yih tamām azīm kām dekhe haiň. ⁸ Chunāñche un tamām ahkām par amal karte raho jo maiň āj tumheň de rahā hūn tāki tumheň wuh tāqat hāsil ho jo darkār hogī jab tum Dariyā-e-Yardan ko pār karke mulk par qabzā karoge. ⁹ Agar tum farmāñbardār raho to der tak us mulk meň jīte rahoge jis kā wādā Rab ne qasam khā kar tumhāre bāpdādā se kiyā thā aur jis meň dūdh aur shahd kī kasrat hai.

¹⁰ Kyoñki yih mulk Misr kī mānind nahīn hai jahān se tum nikal āe ho. Wahān ke kheton meň tujhe bij bo kar barī mehnat se us kī ābpāshī karnī partī thī ¹¹ jabki jis mulk par tum qabzā karoge us meň pahār aur wādiyān haiň jinheň sirf bārish kā pānī serāb kartā hai. ¹² Rab terā Khudā khud us mulk kā khayāl rakhtā hai. Rab tere Khudā kī āñkheň sāl ke pahle din se le kar ākhir tak mutawātir us par lagī rahtī haiň.

¹³ Chunāñche un ahkām ke tābe raho jo maiň āj tumheň de rahā hūn. Rab apne Khudā se pyār karo aur apne püre dil-o-jān se us kī khidmat karo. ¹⁴ Phir wuh kharīf aur bahār kī sālānā bārish waqt par bhejegā. Anāj, angūr aur zaitūn kī faslen pakeñgī, aur tū unheň jamā kar legā. ¹⁵ Nīz, Allāh terī charāgāhoň meň tere rewaroň ke lie ghās muhaiyā karegā, aur tū khā kar ser ho jāegā.

¹⁶ Lekin khabardār, kahīn tumheň warğhalāyā na jāe. Aisā na ho ki tum Rab kī rāh se hať jāo aur dīgar mābūdoň ko sijdā karke un kī

khidmat karo. ¹⁷ Warnā Rab kā ġhazab tum par ān paṛegā, aur wuh mulk meñ bārish hone nahīn degā. Tumhārī fasleni nahīn pakeṅgī, aur tumheñ jald hī us achchhe mulk meñ se miṭā diyā jāegā jo Rab tumheñ de rahā hai.

¹⁸ Chunāñche merī yih bāteñ apne dilon par naqsh kar lo. Unheñ nishān ke taur par aur yāddihānī ke lie apne hāthoñ aur māthoñ par lagāo. ¹⁹ Unheñ apne bachchoñ ko sikhāo. Har jagah aur hameshā un ke bāre meñ bāt karo, khāh tū ghar meñ baiṭhā yā rāste par chaltā ho, letā ho yā khaṛā ho. ²⁰ Unheñ apne gharoñ kī chaukhaṭoñ aur apne shahroñ ke darwāzoñ par likh ²¹ tāki jab tak zamin par āsmān qāym hai tum aur tumhārī aulād us mulk meñ jīte raheñ jis kā wādā Rab ne qasam khā kar tumhāre bāpdādā se kiyā thā.

²² Ehtiyāt se un ahkām kī pairawī karo jo maiñ tumheñ de rahā hūn. Rab apne Khudā se pyār karo, us ke tamām ahkām par amal karo aur us ke sāth liptē raho. ²³ Phir wuh tumhāre āge āge yih tamām qaumeni nikāl degā aur tum aisi qaumoñ kī zamīnoñ par qabzā karoge jo tum se barī aur tāqatwar hain. ²⁴ Tum jahān bhī qadam rakhoge wuh tumhārā hī hogā, junūbī registān se le kar Lubnān tak, Dariyā-e-Furāt se Bahīrā-e-Rūm tak. ²⁵ Koī bhī tumhārā sāmnā nahīn kar sakegā. Tum us mulk meñ jahān bhī jāoge wahān Rab tumhārā Khudā apne wāde ke mutābiq tumhārī dahshat aur Ḳhauf paidā kar degā. ²⁶ Aj tum khud faislā karo. Kyā tum Rab kī barkat yā us kī lānat pānā chāhte ho? ²⁷ Agar tum Rab apne Khudā ke un ahkām par amal karo

jo maiñ āj tumheñ de rahā hūn to wuh tumheñ barkat degā. ²⁸ Lekin agar tum un ke tābe na raho balki merī peshkardā rāh se haṭ kar dīgar mābūdon kī pairawī karo to wuh tum par lānat bhejegā.

²⁹ Jab Rab terā Khudā tujhe us mulk meñ le jāegā jis par tū qabzā karegā to lāzim hai ki Garizīm Pahār par chāṛh kar barkat kā elān kare aur Aibāl Pahār par lānat kā. ³⁰ Yih do pahār Dariyā-e-Yardan ke maḡhrib meñ un Kanāniyon ke ilāqe meñ wāqe hain jo Wādī-e-Yardan meñ ābād hain. Wuh maḡhrib kī taraf Jiljāl Shahr ke sāmne Morih ke balūt ke daraqhton ke nazdik hain. ³¹ Ab tum Dariyā-e-Yardan ko pār karke us mulk par qabzā karne wāle ho jo Rab tumhārā Khudā tumheñ de rahā hai. Jab tum use apnā kar us meñ ābād ho jāoge ³² to ehtiyāt se un tamām ahkām par amal karte raho jo maiñ āj tumheñ de rahā hūn.

12

Mulk meñ Rab ke Ahkām

¹ Zail meñ wuh ahkām aur qawānīn hain jin par tumheñ dhyān se amal karnā hogā jab tum us mulk meñ ābād hoge jo Rab tere bāpdādā kā Khudā tujhe de rahā hai tāki tū us par qabzā kare. Mulk meñ rahte hue umr-bhar un ke tābe raho.

Mulk meñ Ek hī Jagah par Maqdis Ho

² Un tamām jaghoñ ko barbād karo jahān wuh qaumeñ jinheñ tumheñ nikālnā hai apne dewatāoñ kī pūjā kartī hain, khāh wuh ūnche

pahāroñ, pahāriyoñ yā ghane darakhtoñ ke sāy meñ kyoñ na hoñ. ³ Un kī qurbāngāhoñ ko dħā denā. Jin pattharon kī pūjā wuh karte haiñ unheñ chaknāchūr kar denā. Yasīrat Dewī ke khambe jalā denā. Un ke dewatāoñ ke mujassame kāt dālnā. Ğharz in jaghoñ se un kā nām-o-nishān miñ jāe.

⁴ Rab apne Khudā kī parastish karne ke lie un ke tarīqe na apnānā. ⁵ Rab tumhārā Khudā qabiloñ meñ se apne nām kī sukūnat ke lie ek jagah chun legā. Ibādat ke lie wahān jāyā karo, ⁶ aur wahān apnī tamām qurbāniyān lā kar pesh karo, khāh wuh bhasm hone wālī qurbāniyān, zabah kī qurbāniyān, paidāwār kā daswān hissā, uṭhāne wālī qurbāniyān, mannat ke hadiye, kħushī se pesh kī gaī qurbāniyān yā maweshiyoñ ke pahlauṭhe kyoñ na hoñ. ⁷ Wahān Rab apne Khudā ke huzūr apne gharānoñ samet khānā khā kar un kāmyābiyoñ kī kħushī manāo jo tujhe Rab tere Khudā kī barkat ke bāis hāsil huī haiñ.

⁸ Us waqt tumheñ wuh nahīn karnā jo ham karte āe haiñ. Āj tak har koī apnī marzī ke mutābiq ibādat kartā hai, ⁹ kyoñki ab tak tum ārām kī us jagah nahīn pahuñche jo tujhe Rab tere Khudā se mīrās meñ milnī hai. ¹⁰ Lekin jald hī tum Dariyā-e-Yardan ko pār karke us mulk meñ ābād ho jāoge jo Rab tumhārā Khudā tumheñ mīrās meñ de rahā hai. Us waqt wuh tumheñ irdgird ke dushmanoñ se bachāe rakhegā, aur tum ārām aur sukūn se zindagī guzār sakoge. ¹¹ Tab Rab tumhārā Khudā apne nām kī sukūnat ke lie ek jagah chun legā, aur

tumheñ sab kuchh jo maiñ batāūñgā wahāñ lā kar pesh karnā hai, ķhāñ wuh bhasm hone wālī qurbāniyāñ, zabah kī qurbāniyāñ, paidāwār kā daswāñ hissā, uṭhāne wālī qurbāniyāñ yā mannat ke ķhās hadiye kyoñ na hon. ¹² Wahāñ Rab ke sāmne tum, tumhāre bete-betiyāñ, tumhāre āghulām aur laundiyāñ ķhushī manāeñ. Apne shahroñ meñ ābād Lāwiyoñ ko bhī apnī ķhushī meñ sharīk karo, kyoñki un ke pās maurūsī zamīn nahīñ hogī.

¹³ Khabardār, apnī bhasm hone wālī qurbāniyāñ har jagah par pesh na karnā ¹⁴ balki sirf us jagah par jo Rab qabiloñ meñ se chunegā. Wahīn sab kuchh yoñ manā jis tarah maiñ tujhe batātā hūñ.

¹⁵ Lekin wuh jānwar is meñ shāmil nahīñ haiñ jo tū qurbānī ke taur par pesh nahīñ karnā chāhtā balki sirf khānā chāhtā hai. Aise jānwar tū āzādī se apne tamām shahroñ meñ zabah karke us barkat ke mutābiq khā saktā hai jo Rab tere Khudā ne tujhe dī hai. Aisā gosht hiran aur āghazāl ke gosht kī mānind hai yānī pāk aur nāpāk donoñ hī use khā sakte haiñ. ¹⁶ Lekin ķhūñ na khānā. Use pānī kī tarah zamīn par undel kar zāe kar denā.

¹⁷ Jo bhī chīzeñ Rab ke lie makhsūs kī gaī haiñ unheñ apne shahroñ meñ na khānā masalan anāj, angūr ke ras aur zaitūn ke tel kā daswāñ hissā, maweshiyoñ ke pahlauthe, mannat ke hadiye, ķhushī se pesh kī gaī qurbāniyāñ aur uṭhāne wālī qurbāniyāñ. ¹⁸ Yih chīzeñ sirf Rab ke huzūr khānā yānī us jagah par jise wuh

maqdis ke lie chunegā. Wahīn tū apne beṭebetiyoṇ, ġħulāmoṇ, laundiyoṇ aur apne qabāylī ilāqe ke Lāwiyoṇ ke sāth jamā ho kar ķushī manā ki Rab ne hamārī mehnat ko barkat dī hai. ¹⁹ Apne mulk meṇ Lāwiyoṇ kī zarūriyāt umrbhar pūrī karne kī fikr rakh.

²⁰ Jab terā Khudā apne wāde ke mutābiq terī sarhaddeñ baṛhā degā aur tū gosht khāne kī ķahāish rakhegā to jis tarah jī chāhe gosht khā sakegā. ²¹ Agar terā ghar us maqdis se dūr ho jise Rab terā Khudā apne nām kī sukūnat ke lie chunegā to tū jis tarah jī chāhe apne shahroṇ meṇ Rab se mile hue maweshiyoṇ ko zabah karke khā saktā hai. Lekin aisā hī karnā jaisā main ne hukm diyā hai. ²² Aisā gosht hiran aur ġħazäl ke gosht kī mānind hai yānī pāk aur nāpāk donoṇ hī use khā sakte hain. ²³ Albattā gosht ke sāth khūn na khānā, kyoñki khūn jāndār kī jān hai. Us kī jān gosht ke sāth na khānā. ²⁴ Khūn na khānā balki use zamīn par undel kar zāe kar denā. ²⁵ Use na khānā tāki tujhe aur terī aulād ko kāmyābī hāsil ho, kyoñki aisā karne se tū Rab kī nazar meṇ sahīh kām karegā.

²⁶ Lekin jo chīzeñ Rab ke lie makhsūs-o-muqaddas hain yā jo tū ne mannat mān kar us ke lie makhsūs kī hain lāzim hai ki tū unheñ us jagah le jāe jise Rab maqdis ke lie chunegā. ²⁷ Wahīn, Rab apne Khudā kī qurbāngāh par apnī bhasm hone wālī qurbāniyān gosht aur khūn samet charħā. Zabah kī qurbāniyoṇ kā khūn qurbāngāh par undel denā, lekin un kā gosht tū khā saktā hai.

²⁸ Jo bhī hidāyāt maiñ tujhe de rahā hūn unheñ ehtiyāt se pūrā kar. Phir tū aur terī aulād khushhāl raheñge, kyoñki tū wuh kuchh karegā jo Rab tere Khudā kī nazar meñ achchhā aur durust hai.

²⁹ Rab terā Khudā un qaumōn ko miṭā degā jin kī taraf tū baṛh rahā hai. Tū unheñ un ke mulk se nikältā jāegā aur khud us meñ ābād ho jāegā. ³⁰ Lekin khabardār, un ke khatm hone ke bād bhī un ke dewatāoñ ke bāre meñ mālūmāt hāsil na kar, warnā tū phaṇs jāegā. Mat kahnā ki yih qaumeñ kis tarīqe se apne dewatāoñ kī pūjā kartī hain? Ham bhī aisā hī kareñ. ³¹ Aisā mat kar! Yih qaumeñ aise ghinaune tarīqe se pūjā kartī hain jin se Rab nafrat kartā hai. Wuh apne bachchoñ ko bhī jalā kar apne dewatāoñ ko pesh karte hain.

³² Kalām kī jo bhī bāt maiñ tumheñ pesh kartā hūn us ke tābe rah kar us par amal karo. Na kisi bāt kā izāfā karnā, na koī bāt nikālnā.

13

Dewatāoñ kī Taraf Le Jāne Wāloñ se Sulūk

¹ Tere darmiyān aise log uṭh khaṛe hoñge jo apne āp ko nabī yā khāb dekhne wāle kaheñge. Ho saktā hai ki wuh kisi ilāhī nishān yā mojize kā elān kareñ ² jo wāqāī wujūd meñ āe. Sāth sāth wuh kaheñ, “Ā, ham dīgar mābūdoñ kī pūjā kareñ, ham un kī khidmat kareñ jin se tū ab tak wāqif nahīn hai.” ³ Aise logoñ kī na sun. Is se Rab tumhārā Khudā tumheñ āzmā kar mālūm kar rahā hai kī kyā tum wāqāī apne pūre dil-o-jān se us se pyār karte ho. ⁴ Tumheñ Rab apne Khudā kī

pairawī karnā aur usī kā khauf mānanā hai. Us ke ahkām ke mutābiq zindagī guzāro, us kī suno, us kī khidmat karo, us ke sāth lipṭe raho. ⁵ Aise nabiyon yā khāb dekhne wāloṇ ko sazā-e-maut denā, kyonki wuh tujhe Rab tumhāre Khudā se bağhāwat karne par uksānā chāhte hain, usī se jis ne fidyā de kar tumheṇ Misr kī ġhulāmī se bachāyā aur wahān se nikāl lāyā. Chūnki wuh tujhe us rāh se haṭānā chāhte hain jise Rab tere Khudā ne tere lie muqarrar kiyā hai is lie lāzim hai ki unheṇ sazā-e-maut dī jāe. Aisī burāī apne darmiyān se miṭā denā.

⁶ Ho saktā hai ki terā sagā bhāī, terā betā yā betī, terī bīwī yā terā qaribī dost tujhe chupke se warğhalāne kī koshish kare ki ā, ham jā kar dīgar mābūdoṇ kī pūjā kareṇ, aise dewatāoṇ kī jin se na tū aur na tere bāpdādā wāqif the. ⁷ Khāh irdgird kī yā dūr-darāz kī qaumōṇ ke dewatā hoṇ, khāh duniyā ke ek sire ke yā dūsre sire ke mābūd hoṇ, ⁸ kisi sūrat meṇ apnī razāmandī kā izhār na kar, na us kī sun. Us par rahm na kar. Na use bachāe rakh, na use panāh de ⁹ balki use sazā-e-maut de. Aur use sangsār karte waqt pahle terā hāth us par patthar phaiṇke, phir hī bāqī tamām log hissā leṇ. ¹⁰ Use zarūr pattharōṇ se sazā-e-maut denā, kyonki us ne tujhe Rab tere Khudā se dūr karne kī koshish kī, usī se jo tujhe Misr kī ġhulāmī se nikāl lāyā. ¹¹ Phir tamām Isrāīl yih sun kar dar jāegā aur āindā tere darmiyān aisī sharīr harkat karne kī jurrat nahīn karegā.

¹² Jab tū un shahroṇ meṇ rahne lagegā jo Rab terā Khudā tujhe de rahā hai to shāyat tujhe

ਖਬਰ mil jāe ¹³ ki sharīr log tere darmiyān se ubhar āe hain jo apne shahr ke bāshindoṇ ko yih kah kar ghalat rāh par lāe hain ki āo, ham dīgar mābūdoṇ kī pūjā kareñ, aise mābūdoṇ kī jin se tum wāqif nahīn ho. ¹⁴ Lāzim hai ki tū dariyāft karke is kī taftīsh kare aur khūb mālūm kare ki kyā huā hai. Agar sābit ho jāe ki yih ghinaunī bāt wāqaī huī hai ¹⁵ to phir lāzim hai ki tū shahr ke tamām bāshindoṇ ko halāk kare. Use Rab ke sapurd karke sarāsar tabāh karnā, na sirf us ke log balki us ke maweshī bhī. ¹⁶ Shahr kā pūrā māl-e-ghanīmat chauk meñ ikaṭṭhā kar. Phir pūre shahr ko us ke māl samet Rab ke lie makhsūs karke jalā denā. Use dubārā kabhī na tāmīr kiyā jāe balki us ke khandārāt hameshā tak raheñ.

¹⁷ Pūrā shahr Rab ke lie makhsūs kiyā gayā hai, is lie us kī koī bhī chīz tere pās na pāī jāe. Sirf is sūrat meñ Rab kā ghazab ṭhanḍā ho jāegā, aur wuh tujh par rahm karke apnī mehrbānī kā izhār karegā aur terī tādād baṛhāegā, jis tarah us ne qasam khā kar tere bāpdādā se wādā kiyā hai. ¹⁸ Lekin yih sab kuchh is par mabnī hai ki tū Rab apne Khudā kī sune aur us ke un tamām ahkām par amal kare jo maiñ tujhe āj de rahā hūn. Wuhī kuchh kar jo us kī nazar meñ durust hai.

14

Pāk aur Nāpāk Jānwar

¹ Tum Rab apne Khudā ke farzand ho. Apne āp ko murdoṇ ke sabab se na zakhmī karo, na apne sar ke sāmne wāle bāl mundwāo. ² Kyoñki

tū Rab apne Khudā ke lie ma᳚hsūs-o-muqaddas qaum hai. Duniyā kī tamām qaumoں meਂ se Rab ne tujhe hī chun kar apnī milkiyat banā liyā hai.

³ Koī bhī makrūh chīz na khānā.

⁴ Tum bail, bher-bakrī, ⁵ hiran, ġhazāl, mrig, * pahāṛī bakrī, mahāt, † ġhazāl-e-Afrīqā ‡ aur pahāṛī bakrī khā sakte ho. ⁶ Jin ke khur yā pāñw bilkul chire hue hain aur jo jugālī karte hain unheਂ khāne kī ijāzat hai. ⁷ Uñt, bijjū yā ɭhargosh khānā manā hai. Wuh tumhāre lie nāpāk hain, kyoਂki wuh jugālī to karte hain lekin un ke khur yā pāñw chire hue nahīn hain. ⁸ Suar na khānā. Wuh tumhāre lie nāpāk hai, kyoਂki us ke khur to chire hue hain lekin wuh jugālī nahīn kartā. Na un kā gosht khānā, na un kī lāshoں ko chhūnā.

⁹ Pānī meਂ rahne wāle jānwar khāne ke lie jāyza hain agar un ke par aur chhilke hoں.

¹⁰ Lekin jin ke par yā chhilke nahīn hain wuh tumhāre lie nāpāk hain.

¹¹ Tum har pāk parindā khā sakte ho. ¹² Lekin zail ke parinde khānā manā hai: uqāb, dar̄hiyal giddh, kālā giddh, ¹³ lāl chīl, kālī chīl, har qism kā giddh, ¹⁴ har qism kā kawwā, ¹⁵ uqābī ullū, chhoṭe kān wālā ullū, bare kān wālā ullū, har

* **14:5** Yih hiran ke mushābeh hotā hai lekin fitratān mu᳚htalif hotā hai. Is ke sīng khokhle, beshākh aur anjhār hote hain. Antelope. Yād rahe ki qadīm zamāne ke in jānwaroں ke aksar nām matrūk hain yā un kā matlab badal gayā hai, is lie un kā mu᳚htalif tarjumā ho saktā hai. † **14:5** Mahāt: Darāzqad hirnoں kī ek nau jis ke sīng chakkardār hote hain. Addax.

‡ **14:5** Ġhazāl-e-Afrīqā. Chikāroں kī tīn iqṣām meਂ se koī jo apne lambe aur halqādār sīnghoں kī wajah se mumtāz hai. Oryx.

qism kā bāz, ¹⁶ chhoṭā ullū, chinghārne wālā ullū, safed ullū, ¹⁷ dashtī ullū, Misrī giddh, qūq, ¹⁸ laqlaq, har qism kā bütimār, hudhud aur chamgādar. §

¹⁹ Tamām par rakhne wāle kīre tumhāre lie nāpāk haiñ. Unheñ khānā manā hai. ²⁰ Lekin tum har pāk parindā khā sakte ho.

²¹ Jo jānwar kħud bakhud mar jāe use na khānā. Tū use apnī ābādī meñ rahne wāle kisi pardesī ko de yā kisi ajnabī ko bech saktā hai aur wuh use khā saktā hai. Lekin tū use mat khānā, kyoñki tū Rab apne Khudā ke lie makhsūs-o-muqaddas qaum hai.

Bakrī ke bachche ko us kī mān ke dūdh meñ pakānā manā hai.

Apnī Paidāwār kā Daswānī Hissā Maķhsūs Karnā

²² Lāzim hai ki tū har sāl apne kheton kī paidāwār kā daswānī hissā Rab ke lie alag kare.

²³ Is ke lie apnā anāj, angūr kā ras, zaitūn kā tel aur maweshī ke pahlauthe Rab apne Khudā ke huzūr le ānā yānī us jagah jo wuh apne nām kī sukūnat ke lie chunegā. Wahān yih chīzeñ qurbān karke khā tāki tū umr-bhar Rab apne Khudā kā khauf mānanā sīkhe.

²⁴ Lekin ho saktā hai ki jo jagah Rab terā Khudā apne nām kī sukūnat ke lie chunegā wuh tere ghar se had se zyādā dūr ho aur Rab tere Khudā kī barkat ke bāis mazkūrā daswānī hissā itnā zyādā ho ki tū use maqdis tak nahīn pahuñchā

§ 14:18 Yād rahe ki qadīm zamāne ke in parindon ke aksar nām matrūk haiñ yā un kā matlab badal gayā hai, is lie un kā muķhtalif tarjumā ho saktā hai.

saktā. ²⁵ Is sūrat meň use bech kar us ke paise us jagah le jā jo Rab terā Қhudā apne nām kī sukūnat ke lie chunegā. ²⁶ Wahān pahuñch kar un paisoñ se jo jī chāhe қharīdnā, қhāh gāybail, bheṛ-bakrī, mai yā mai jaisī koī aur chīz kyoñ na ho. Phir apne gharāne ke sāth mil kar Rab apne Қhudā ke huzūr yih chīzeñ khānā aur қhushī manānā. ²⁷ Aise mauqoñ par un Lāwiyoñ kā khayāl rakhnā jo tere qabāylī ilāqe meň rahte haiñ, kyoñki unheñ mīrās meň zamīn nahīn milegī.

²⁸ Har tūsre sāl apnī paidāwār kā daswānī hissā apne shahroñ meň jamā karnā. ²⁹ Use Lāwiyoñ ko denā jin ke pās maurūsī zamīn nahīn hai, nīz apne shahroñ meň ābād pardesiyoñ, yatimoñ aur bewāoñ ko denā. Wuh āeñ aur khānā khā kar ser ho jāeñ taki Rab terā Қhudā tere har kām meň barkat de.

15

Qarzdāroñ kī Bahālī kā Sāl

¹ Har sāt sāl ke bād ek dūsre ke karze muāf kar denā. ² Us waqt jis ne bhī kisī Isrāīlī bhāī ko qarz diyā hai wuh use mansūkh kare. Wuh apne paṛosī yā bhāī ko paise wāpas karne par majbūr na kare, kyoñki Rab kī tāzīm meň qarz muāf karne ke sāl kā elān kiyā gayā hai. ³ Is sāl meň tū sirf ғhairmulkī qarzdāroñ ko paise wāpas karne par majbūr kar saktā hai. Apne Isrāīlī bhāī ke tamām qarz muāf kar denā.

⁴ Tere darmiyān koī bhī ғharīb nahīn honā chāhie, kyoñki jab tū us mulk meň rahegā jo Rab terā Қhudā tujhe mīrās meň dene wālā hai to

wuh tujhe bahut barkat degā. ⁵ Lekin shart yih hai ki tū pūre taur par us kī sune aur ehtiyāt se us ke un tamām ahkām par amal kare jo maiñ tujhe āj de rahā hūn. ⁶ Phir Rab tumhārā Khudā tujhe apne wāde ke mutābiq barkat degā. Tū kisī bhī qaum se udhār nahīn legā balki bahut-sī qaumon ko udhār degā. Koī bhī qaum tujh par hukūmat nahīn karegī balki tū bahut-sī qaumon par hukūmat karegā.

⁷ Jab tū us mulk meñ ābād hogā jo Rab terā Khudā tujhe dene wālā hai to apne darmiyān rahne wāle ġharīb bhāī se sakht sulūk na karnā, na kanjūs honā. ⁸ Khule dil se us kī madad kar. Jitnī use zarūrat hai use udhār ke taur par de. ⁹ Khabardār, aisā mat soch ki qarz muāf karne kā sāl qarīb hai, is lie maiñ use kuchh nahīn dūṅgā. Agar tū aisī sharīr bāt apne dil meñ sochte hue zarūratmand bhāī ko qarz dene se inkār kare aur wuh Rab ke sāmne terī shikāyat kare to tū quśūrwār ṭhahregā. ¹⁰ Use zarūr kuchh de balki ķhushī se de. Phir Rab terā Khudā tere har kām meñ barkat degā. ¹¹ Mulk meñ hameshā ġharīb aur zarūratmand log pāe jāēnge, is lie maiñ tujhe hukm detā hūn ki khule dil se apne ġharīb aur zarūratmand bhāiyoñ kī madad kar.

Ĝhulāmoñ ko Āzād Karne kā Farz

¹² Agar koī Isrāīlī bhāī yā bahan apne āp ko bech kar terā ġhulām ban jāe to wuh chhih sāl terī ķhidmat kare. Lekin lāzim hai ki sātweñ sāl use āzād kar diyā jāe. ¹³ Āzād karte waqt use

ਖਾਲੀ ਹਾਥ ਫਾਰਿਗ਼ ਨਾ ਕਰਨਾ ¹⁴ ਬਲਕਿ ਅਪਨੀ ਭੇਟ-
ਬਕਰੀਓਂ, ਅਨਾਜ, ਤੇਲ ਅਤੇ ਮਾਂ ਦੇ ਪ੍ਰਾਣੀਆਂ ਦੇ ਜਿਨ ਦੇ ਰਾਬ ਤੇਰੇ
ਖੁਦਾ ਨੇ ਤੁਝੇ ਬਕਤ ਦਿੱਤਾ ਹੈ। ¹⁵ ਧਾਰਨ ਕਿ ਤੁਹਾਡੀ ਮਿਸਰ ਦੇ ਗੁਲਾਮ ਥਾਂ ਅਤੇ ਰਾਬ ਤੇਰੇ ਖੁਦਾ
ਨੇ ਫਿਦਾ ਦੇ ਕਾਰ ਤੁਝੇ ਚਿਹੁਰਾਇਆ। ਇਸੀ ਲੋਕ ਮੈਨੂੰ ਆਜ
ਤੁਝੇ ਯਿਹ ਹੁਕਮ ਦੇਤਾ ਹੁੰਦਾ ਹੈ।

¹⁶ ਲੇਕਿਨ ਮੁੱਲੀਂ ਹੈ ਕਿ ਤੇਰਾ ਗੁਲਾਮ ਤੁਝੇ
ਚਿਹੋਣਾ ਨਾ ਚਾਹੇ, ਕਿਉਂਕਿ ਵੁਹ ਤੁਹਾਡੇ ਅਤੇ ਤੇਰੇ
ਖਾਂਦਾਂ ਦੇ ਮੁਹਾਬਤ ਰਾਖਤਾ ਹੈ, ਅਤੇ ਵੁਹ ਤੇਰੇ
ਪਾਸ ਰਾਹ ਕਰ ਖੁਸ਼ਹਾਲ ਹੈ। ¹⁷ ਇਸ ਸੂਰਤ ਦੇਣ ਦੇ
ਉਦੇਸ਼ ਵਿੱਚ ਪਾਸ ਲੋਕ ਜਾ ਅਤੇ ਉਨ੍ਹਾਂ ਦੇ ਕਾਨ ਕਿ ਲਾਉ
ਚਾਕਾਤ ਕੇ ਸਾਥ ਲਗਾ ਕਿ ਉਨ੍ਹਾਂ ਦੇ ਸੁਤਾਲੀ ਧਾਨੀ ਤੇਜ਼
ਤੁਹਾਡੀ ਦੇ ਚਿਹੇ ਦੇ ਨਾਲ। ਤਾਂ ਵੁਹ ਜਿੰਦਗੀ-ਬਹਾਰ ਤੇਰਾ
ਗੁਲਾਮ ਬਾਨਾ ਰਾਹੇਗਾ। ਅਪਨੀ ਲਾਂਡੀ ਕੇ ਸਾਥ ਭਾਵੀ
ਅਤਾਂ ਹੀ ਕਰਨਾ।

¹⁸ ਅਗਰ ਗੁਲਾਮ ਤੁਝੇ ਚਿਹੀਂ ਸਾਲ ਕੇ ਬਾਦ ਚਿਹੋਣਾ
ਚਾਹੇ ਤੋਂ ਬਾਅਦ ਮਾਨਨਾ। ਅਖੀਰ ਅਗਰ ਉਨ੍ਹਾਂ ਦੀ ਜਾਗਾ
ਕੀ ਅਤੇ ਵੁਹੀ ਕਾਮ ਤਾਨਖਾਹ ਕੇ ਲੋਕ ਕਾਰਤਾ ਤੇਰੇ
ਅਖਰਾਜਾਂ ਦੁਗਨੇ ਹੋਣ। ਉਨ੍ਹਾਂ ਦੀ ਕਰਨਾ ਰਾਬ ਤੇਰਾ
ਖੁਦਾ ਤੇਰੇ ਹਾਥ ਕਾਮ ਦੇਣ ਵਾਲੇ ਬਕਤ ਦੇਗਾ।

Jānwaroṇ ke Pahlauṭhe Makhsūs Haiṇ

¹⁹ ਅਪਨੀ ਗਾਂਧੀਓਂ ਅਤੇ ਭੇਟ-ਬਕਰੀਓਂ ਦੇ ਨਾਲ
ਪਾਲਾਊਥੇ ਰਾਬ ਅਪਨੇ ਖੁਦਾ ਕੇ ਲੋਕ ਮਾਖਸੂਸ
ਕਰਨਾ। ਨਾ ਗੈਂਦ ਕੇ ਪਾਲਾਊਥੇ ਕੋ ਕਾਮ ਕੇ ਲੋਕ ਦੀ ਸੰਤੋਸ਼ਾਲ
ਕਰਨਾ, ਨਾ ਭੇਟ ਕੇ ਪਾਲਾਊਥੇ ਕੇ ਬਾਲ ਕਾਤਾਨਾ।
²⁰ ਹਾਰ ਸਾਲ ਦੀ ਬਾਚੀ ਅਤੇ ਜਾਗਾ ਲੋਕ ਜਾ ਜਾ ਰਾਬ
ਅਪਨੇ ਮਾਂਦਿਸ ਕੇ ਲੋਕ ਚੁਨੇਗਾ। ਵਾਹਾਨਾ ਅਨੇਕ ਰਾਬ
ਅਪਨੇ ਖੁਦਾ ਕੇ ਹੁਤੂਰ ਅਪਨੇ ਪੁਰੇ ਖਾਂਦਾਂ ਦੀ ਸਮੇਤ
ਖਾਨਾ।

²¹ ਅਗਰ ਆਪਣੇ ਜਾਨਵਰ ਦੇਣ ਕੀ ਖਾਰਾਬੀ ਹੋ, ਵੁਹ
ਅਨ੍ਧਾ ਯਾਂ ਲਾਂਗਰਾ ਹੋ ਯਾਂ ਉਨ੍ਹਾਂ ਦੇ ਮੈਨੂੰ ਕੀ ਅਤੇ ਨੁਕਸ ਹੋ

to use Rab apne Khudā ke lie qurbān na karnā.
 22 Aise jānwar tū ghar meñ zabah karke khā saktā hai. Wuh hiran aur ġhazāl kī mānind hain jinheñ tū khā to saktā hai lekin qurbānī ke taur par pesh nahīn kar saktā. Pāk aur nāpāk shakhs donoñ use khā sakte hain. 23 Lekin khūn na khānā. Use pānī kī tarah zamīn par undel kar zāe kar denā.

16

Fasah kī Id

1 Abīb ke mahīne * meñ Rab apne Khudā kī tāzīm meñ Fasah kī Id manānā, kyoñki is mahīne meñ wuh tujhe rāt ke waqt Misr se nikāl lāyā. 2 Us jagah jamā ho jā jo Rab apne nām kī sukūnat ke lie chunegā. Use qurbānī ke lie bher-bakriyān yā gāy-bail pesh karnā. 3 Gosht ke sāth bekhamīrī roṭī khānā. Sāt din tak yihī roṭī khā, bilkul usī tarah jis tarah tū ne kiyā jab jaldī jaldī Misr se niklā. Musībat kī yih roṭī is lie khā taki wuh din tere jīte-jī yād rahe jab tū Misr se rawānā huā. 4 Lāzim hai ki id ke hafte ke daurān tere pūre mulk meñ ɭhamīr na pāyā jāe.

Jo qurbānī tū id ke pahle din kī shām ko pesh kare us kā gosht usī waqt khā le. Aglī subah tak kuchh bāqī na rah jāe. 5 Fasah kī qurbānī kisī bhī shahr meñ jo Rab terā Khudā tujhe degā na chaṛhānā 6 balki sirf us jagah jo wuh apne nām kī sukūnat ke lie chunegā. Misr se nikalte waqt kī tarah qurbānī ke jānwar ko sūraj dūbte

* 16:1 Mārch tā Aprail.

waqt zabah kar. ⁷ Phir use bhūn kar us jagah khānā jo Rab terā Khudā chunegā. Aglī subah apne ghar wāpas chalā jā. ⁸ Īd ke pahle chhih din bekhamīrī rotī khātā rah. Sātweñ din kām na karnā balki Rab apne Khudā kī ibādat ke lie jamā ho jānā.

Fasal kī Kaṭāī kī Īd

⁹ Jab anāj kī fasal kī kaṭāī shurū hogī to pahle din ke sāt hafte bād ¹⁰ Fasal kī Kaṭāī kī Īd manānā. Rab apne Khudā ko utnā pesh kar jitnā jī chāhe. Wuh us barkat ke mutābiq ho jo us ne tujhe dī hai. ¹¹ Is ke lie bhī us jagah jamā ho jā jo Rab apne nām kī sukūnat ke lie chunegā. Wahān us ke huzūr ķhushī manā. Tere bāl-bachche, tere ġhulām aur laundiyan aur tere shahron meñ rahne wāle Lāwī, pardesī, yatīm aur bewāeñ sab terī ķhushī meñ sharīk hoñ. ¹² In ahkām par zarūr amal karnā aur mat bhūlnā ki tū Misr meñ ġhulām thā.

Jhoṇpriyon kī Īd

¹³ Anāj gāhne aur angūr kā ras nikālne ke bād Jhoṇpriyon kī Īd manānā jis kā daurāniyā sāt din ho. ¹⁴ Īd ke mauqe par ķhushī manānā. Tere bāl-bachche, tere ġhulām aur laundiyan aur tere shahron meñ basne wāle Lāwī, pardesī, yatīm aur bewāeñ sab terī ķhushī meñ sharīk hoñ. ¹⁵ Jo jagah Rab terā Khudā maqdīs ke lie chunegā wahān us kī tāzīm meñ sāt din tak yih īd manānā. Kyonki Rab terā Khudā terī tamām faslon aur mehnat ko barkat degā, is lie ķhūb ķhushī manānā.

¹⁶ Isrāīl ke tamām mard sāl meñ tīn martabā us maqdis par hāzir ho jāeñ jo Rab terā Khudā chunegā yānī Bekhamīrī Rotī kī Īd, Fasal kī Kaṭāī kī Īd aur Jhoṇpriyon kī Īd par. Koī bhī Rab ke huzūr khālī hāth na āe. ¹⁷ Har koī us barkat ke mutābiq de jo Rab tere Khudā ne use dī hai.

Qāzī Muqarrar Karnā

¹⁸ Apne apne qabāylī ilāqe meñ qāzī aur nigahbān muqarrar kar. Wuh har us shahr meñ hoñ jo Rab terā Khudā tujhe degā. Wuh insāf se logoñ kī adālat karen. ¹⁹ Na kisī ke huqūq mārnā, na jānibdārī dikhānā. Rishwat qabūl na karnā, kyoñki rishwat dānishmandoñ ko andhā kar detī aur rāstbāz kī bāteñ palaṭ detī hai. ²⁰ Sirf aur sirf insāf ke mutābiq chal tāki tū jītā rahe aur us mulk par qabzā kare jo Rab terā Khudā tujhe degā.

Butparastī kī Sazā

²¹ Jahāñ tū Rab apne Khudā ke lie qurbāngāh banāegā wahāñ na Yasirat Dewī kī pūjā ke lie lakaṛī kā khambā ²² aur na koī aisā patthar kharā karnā jis kī pūjā log karte hain. Rab terā Khudā in chīzoñ se nafrat rakhtā hai.

17

¹ Rab apne Khudā ko nāqis gāy-bail yā bher-bakrī pesh na karnā, kyoñki wuh aisī qurbānī se nafrat rakhtā hai.

² Jab tū un shahroñ meñ ābād ho jāegā jo Rab terā Khudā tujhe degā to ho saktā hai ki tere darmiyān koī mard yā aurat Rab tere Khudā kā ahd tor kar wuh kuchh kare jo use burā

lage. ³ Masalan wuh dīgar mābūdoṇ ko yā sūraj, chāṇd yā sitāroṇ ke pūre lashkar ko sijdā kare, hālāṇki maiṇ ne yih manā kiyā hai. ⁴ Jab bhī tujhe is qism kī ɭhabar mile to is kā pūrā khoj lagā. Agar bāt durust nikle aur aisī ghinaunī harkat wāqaī Isrāīl meṇ kī gaī ho ⁵ to qusūrwār ko shahr ke bāhar le jā kar sangsār kar denā. ⁶ Lekin lāzim hai ki pahle kam az kam do yā tīn log gawāhī deṇ ki us ne aisā hī kiyā hai. Use sazā-e-maut dene ke lie ek gawāh kāfī nahīn. ⁷ Pahle gawāh us par patthar phainkeṇ, is ke bād bāqī tamām log use sangsār kareṇ. Yon tū apne darmiyān se burāī miṭā degā.

Maqdis meṇ Ālātarīn Adālat

⁸ Agar tere shahr ke qāziyoṇ ke lie kisī muqaddame kā faislā karnā mushkil ho to us maqdis meṇ ā kar apnā muāmalā pesh kar jo Rab terā Khudā chunegā, ɭhāh kisī ko qatl kiyā gayā ho, use zakhmī kar diyā gayā ho yā koī aur maslā ho. ⁹ Lāwī ke qabīle ke imāmoṇ aur maqdis meṇ khidmat karne wāle qāzī ko apnā muqaddamā pesh kar, aur wuh faislā kareṇ. ¹⁰ Jo faislā wuh us maqdis meṇ kareṇge jo Rab chunegā use mānanā paregā. Jo bhī hidāyat wuh deṇ us par ehtiyāt se amal kar. ¹¹ Shariāt kī jo bhī bāt wuh tujhe sikhāeṇ aur jo bhī faislā wuh deṇ us par amal kar. Jo kuchh bhī wuh tujhe batāeṇ us se na dāiṇ aur na bāiṇ taraf mūrnā.

¹² Jo maqdis meṇ Rab tere Khudā kī khidmat karne wāle qāzī yā imām ko haqīr jān kar un kī nahīn suntā use sazā-e-maut dī jāe. Yon tū Isrāīl se burāī miṭā degā. ¹³ Phir tamām log yih sun

kar ḍar jāēnge aur āindā aisī gustākhī karne kī jurrat nahīn kareṅge.

Bādshāh ke bāre men Usūl

¹⁴ Tū jald hī us mulk meñ dākhil hogā jo Rab terā Khudā tujhe dene wālā hai. Jab tū us par qabzā karke us meñ ābād ho jāegā to ho saktā hai ki tū ek din kahe, “Āo ham irdgird kī tamām qaumōn kī tarah bādshāh muqarrar kareñ jo ham par hukūmat kare.” ¹⁵ Agar tū aisā kare to sirf wuh shakhs muqarrar kar jise Rab terā Khudā chunegā. Wuh pardesī na ho balki terā apnā Isrāīlī bhāī ho. ¹⁶ Bādshāh bahut zyādā ghoṛe na rakhe, na apne logoṇ ko unheñ kharidne ke lie Misr bheje. Kyoñki Rab ne tujh se kahā hai ki kabhī wahān wāpas na jānā. ¹⁷ Terā bādshāh zyādā bīwiyān bhī na rakhe, warnā us kā dil Rab se dūr ho jāegā. Aur wuh had se zyādā sonā-chāndī jamā na kare.

¹⁸ TaṄhtnashīn hote waqt wuh Lāwī ke qabile ke imāmon ke pās paṛī is sharīat kī naql likhwāe. ¹⁹ Yih kitāb us ke pās mahfūz rahe, aur wuh umr-bhar rozānā ise paṛhtā rahe tāki Rab apne Khudā kā khauf mānanā sīkhe. Tab wuh sharīat kī tamām bāton kī pairawī karegā, ²⁰ apne āp ko apne Isrāīlī bhāiyōn se zyādā aham nahīn samjhegā aur kisī tarah bhī sharīat se haṭ kar kām nahīn karegā. Natīje meñ wuh aur us kī aulād bahut arse tak Isrāīl par hukūmat kareṅge.

18

Imāmon aur Lāwiyōn kā Hissā

¹ Isrāīl ke har qabīle ko mīrās meñ us kā apnā ilāqā milegā siwāe Lāwī ke qabīle ke jis meñ imām bhī shāmil hain. Wuh jalne wālī aur dīgar qurbāniyon meñ se apnā hissā le kar guzārā karen. ² Un ke pās dūsron kī tarah maurūsī zamīn nahīn hogī balki Rab khud un kā maurūsī hissā hogā. Yih us ne wādā karke kahā hai.

³ Jab bhī kisī bail yā bheṛ ko qurbān kiyā jāe to imāmoṇ ko us kā shānā, jabre aur ojharī milne kā haq hai. ⁴ Apnī faslon kā pahlā phal bhī unheñ denā yānī anāj, mai, zaitūn kā tel aur bheṛoṇ kī pahlī katrī huī ūn. ⁵ Kyoñki Rab ne tere tamām qabiloṇ meñ se Lāwī ke qabīle ko hī maqdis meñ Rab ke nām meñ khidmat karne ke lie chunā hai. Yih hameshā ke lie un kī aur un kī aulād kī zimmedārī rahegī.

⁶ Kuchh Lāwī maqdis ke pās nahīn balki Isrāīl ke muñkhtalif shahron meñ raheñge. Agar un meñ se koī us jagah ānā chāhe jo Rab maqdis ke lie chunegā ⁷ to wuh wahān ke khidmat karne wāle Lāwiyoṇ kī tarah maqdis meñ Rab apne Khudā ke nām meñ khidmat kar saktā hai. ⁸ Use qurbāniyon meñ se dūsron ke barābar Lāwiyoṇ kā hissā milnā hai, khāh use khāndānī milkiyat bechne se paise mil gae hoñ yā nahīn.

Jādūgarī Manā Hai

⁹ Jab tū us mulk meñ dākhil hogā jo Rab terā Khudā tujhe de rahā hai to wahān kī rahne wālī qaumoṇ ke ghinaune dastūr na apnānā. ¹⁰ Tere darmiyān koī bhī apne betē yā betī ko qurbānī ke taur par na jalāe. Na koī ġhaibdānī kare, na fāl yā shugūn nikāle yā jādūgarī kare. ¹¹ Isī

tarah mantar paṛhnā, hāzirāt karnā, qismat kā hāl batānā yā murdonī kī rūhoṇ se rābitā karnā saṅkt manā hai. ¹² Jo bhī aisā kare wuh Rab kī nazar meñ qābil-e-ghin hai. Inhīn makrūh dastūroṇ kī wajah se Rab terā Khudā tere āge se un qaumoṇ ko nikāl degā. ¹³ Is lie lāzim hai ki tū Rab apne Khudā ke sāmne bequsūr rahe.

Nabī kā Wādā

¹⁴ Jin qaumoṇ ko tū nikālne wālā hai wuh un kī suntī haiṇ jo fāl nikālte aur ḡaibdānī karte haiṇ. Lekin Rab tere Khudā ne tujhe aisā karne kī ijāzat nahīn dī.

¹⁵ Rab terā Khudā tere wāste tere bhāiyōṇ meñ se mujh jaise nabī ko barpā karegā. Us kī sunanā. ¹⁶ Kyonki Horib yānī Sīnā Pahār par jamā hote waqt tū ne khud Rab apne Khudā se darkhāst kī, “Na maiṇ mazīd Rab apne Khudā kī āwāz sunanā chāhtā, na yih bhaṛaktī huī āg dekhnā chāhtā hūn, warnā mar jāūngā.” ¹⁷ Tab Rab ne mujh se kahā, “Jo kuchh wuh kahte haiṇ wuh thīk hai. ¹⁸ Āindā maiṇ un meñ se tujh jaisā nabī khaṛā karūngā. Maiṇ apne alfāz us ke muṇh meñ dāl dūngā, aur wuh merī har bāt un tak pahuṇchāegā. ¹⁹ Jab wuh nabī mere nām meñ kuchh kahe to lāzim hai ki tū us kī sun. Jo nahīn sunegā us se maiṇ khud jawāb talab karūngā. ²⁰ Lekin agar koī nabī gustākī ho kar mere nām meñ koī bāt kahe jo maiṇ ne use batāne ko nahīn kahā thā to use sazā-e-maut denī hai. Isī tarah us nabī ko bhī halāk kar denā hai jo dīgar mābūdonī ke nām meñ bāt kare.”

²¹ Shāyad tere zahan meñ sawāl ubhar āe ki ham kis tarah mālūm kar sakte haiṇ ki koī kalām

wāqaī Rab kī taraf se hai yā nahīn. ²² Jawāb yih hai ki agar nabī Rab ke nām meñ kuchh kahe aur wuh pūrā na ho jāe to matlab hai ki nabī kī bāt Rab kī taraf se nahīn hai balki us ne gustākhī karke bāt kī hai. Is sūrat meñ us se mat ḫarnā.

19

Panāh ke Shahr

¹ Rab terā Khudā us mulk meñ ābād qaumōn ko tabāh karegā jo wuh tujhe de rahā hai. Jab tū unheñ bhagā kar un ke shahron aur gharoñ meñ ābād ho jāegā ²⁻³ to pūre mulk ko tīn hissoñ meñ taqsim kar. Har hisse meñ ek markazī shahr muqarrar kar. Un tak pahuñchāne wāle rāste sāf-suthrī rakhnā. In shahroñ meñ har wuh shakhs panāh le saktā hai jis ke hāth se koī ġhairirādī taur par halāk huā hai. ⁴ Wuh aise shahr meñ jā kar intaqām lene wāloñ se mahfūz rahegā. Shart yih hai ki us ne na qasdan aur na dushmanī ke bāis kisī ko mār diyā ho.

⁵ Masalan do ādmī jangal meñ darakht kāt rahe hain. Kulhārī chalāte waqt ek kī kulhārī daste se nikal kar us ke sāthī ko lag jāe aur wuh mar jāe. Aisā shakhs farār ho kar aise shahr meñ panāh le saktā hai tāki bachā rahe. ⁶ Is lie zarūrī hai ki aise shahroñ kā fāsilā zyādā na ho. Kyoñki jab intaqām lene wālā us kā tāqqub karegā to khatrā hai ki wuh taish meñ use pakar kar mār ḫale, agarche bhāgne wālā bequsūr hai. Jo kuchh us ne kiyā wuh dushmanī ke sabab se nahīn balki ġhairirādī taur par huā. ⁷ Is lie lāzim hai ki tū panāh ke tīn shahr alag kar le.

⁸ Bād meñ Rab terā Khudā terī sarhaddeñ mazīd barhā degā, kyoñki yihī wādā us ne qasam khā kar tere bāpdādā se kiyā hai. Apne wāde ke mutābiq wuh tujhe pūrā mulk degā, ⁹ albattā shart yih hai ki tū ehtiyāt se un tamām ahkām kī pairawī kare jo maiñ tujhe āj de rahā hūn. Dūsre alfāz meñ shart yih hai ki tū Rab apne Khudā ko pyār kare aur hameshā us kī rāhoñ meñ chaltā rahe. Agar tū aisā hī kare aur natījatan Rab kā wādā pūrā ho jāe to lāzim hai ki tū panāh ke tīn aur shahr alag kar le. ¹⁰ Warnā tere mulk meñ jo Rab terā Khudā tujhe mīrās meñ de rahā hai bequsūr logoñ ko jān se mārā jāegā aur tū khud zimmedār ṭhahregā.

¹¹ Lekin ho saktā hai koī dushmanī ke bāis kisī kī tāk meñ baith jāe aur us par hamlā karke use mār dāle. Agar qātil panāh ke kisī shahr meñ bhāg kar panāh le ¹² to us ke shahr ke buzurg ittalā deiñ ki use wāpas lāyā jāe. Use intaqām lene wāle ke hawāle kiyā jāe tāki use sazā-e-maut mile. ¹³ Us par rahm mat karnā. Lāzim hai ki tū Isrāīl meñ se bequsūr kī maut kā dāgh miṭāe tāki tū khushhāl rahe.

Zamīnoñ kī Hadden

¹⁴ Jab tū us mulk meñ rahegā jo Rab terā Khudā tujhe mīrās meñ degā tāki tū us par qabzā kare to zamīn kī wuh haddeñ āge pīchhe na karnā jo tere bāpdādā ne muqarrar kīñ.

Adālat meñ Gawāh

¹⁵ Tū kisī ko ek hī gawāh ke kahne par quşūrwār nahīn ṭhahrā saktā. Jo bhī jurm sarzad huā hai, kam az kam do yā tīn gawāhoñ

kī zarūrat hai. Warnā tū use quſūrwār nahīn ḥahrā saktā.

¹⁶ Agar jis par ilzām lagāyā gayā hai inkār karke dāwā kare ki gawāh jhūṭ bol rahā hai ¹⁷ to donoṇ maqdis meṇ Rab ke huzūr ā kar khidmat karne wāle imāmoṇ aur qāziyoṇ ko apnā muāmalā pesh kareṇ. ¹⁸ Qāzī is kā khūb khoj lagāeṇ. Agar bāt durust nikle ki gawāh ne jhūṭ bol kar apne bhāī par ġhalat ilzām lagāyā hai ¹⁹ to us ke sāth wuh kuchh kiyā jāe jo wuh apne bhāī ke lie chāh rahā thā. Yoṇ tū apne darmiyān se burāī miṭā degā. ²⁰ Phir tamām bāqī log yih sun kar ḍar jāeṇge aur āindā tere darmiyān aisī ġhalat harkat karne kī jurrat nahīn kareṇge. ²¹ Quſūrwār par rahm na karnā. Usūl yih ho ki jān ke badle jān, āñkh ke badle āñkh, dāñt ke badle dāñt, hāth ke badle hāth, pāñw ke badle pāñw.

20

Jang ke Usūl

¹ Jab tū jang ke lie nikal kar dekhtā hai ki dushman tādād meṇ zyādā hain aur un ke pās ghoṛे aur rath bhī hain to mat ḫarnā. Rab terā Khudā jo tujhe Misr se nikāl lāyā ab bhī tere sāth hai. ² Jang ke lie nikalne se pahle imām sāmne āe aur fauj se mukhātib ho kar ³ kahe, “Sun ai Isrāīl! Āj tum apne dushman se laṛne jā rahe ho. Un ke sabab se pareshān na ho. Un se na ḫauf khāo, na ghabrāo, ⁴ kyonki Rab tumhārā Khudā khud tumhāre sāth jā kar dushman se laṛegā. Wuhī tumheṇ fatah ba᷍hshegā.”

⁵ Phir nigahbān fauj se mukhātib hoਨ, “Kyā yahāਨ koਿ hai jis ne hāਲ meਨ apnā nayā ghar mukammal kiyā lekin use maਖsūs karne kā mauqā na milā? Wuh apne ghar wāpas chalā jāe. Aisā na ho ki wuh jang ke daurān māਰā jāe aur koਿ aur ghar ko maਖsūs karke us meਨ basne lage. ⁶ Kyā koਿ hai jis ne angūr kā bāਗh lagā kar is waqt us kī pahlī fasal ke intazār meਨ hai? Wuh apne ghar wāpas chalā jāe. Aisā na ho ki wuh jang meਨ māਰā jāe aur koਿ aur bāਗh kā fāydā uਥāe. ⁷ Kyā koਿ hai jis kī mangnī huī hai aur jo is waqt shāਦī ke intazār meਨ hai? Wuh apne ghar wāpas chalā jāe. Aisā na ho ki wuh jang meਨ māਰā jāe aur koਿ aur us kī mangetar se shāਦī kare.”

⁸ Nigahbān kaheਨ, “Kyā koਿ khaufzadā yā pareshāਨ hai? Wuh apne ghar wāpas chalā jāe tāki apne sāਥiyon ko pareshāਨ na kare.” ⁹ Is ke bāਦ faujiyon par afsar muqarrar kie jāeਨ.

¹⁰ Kisī shahr par hamlā karne se pahle us ke bāshindon ko hathiyār ḍāl dene kā mauqā denā.

¹¹ Agar wuh māਨ jāeਨ aur apne darwāze khol deਨ to wuh tere lie begār meਨ kām karke terī khidmat kareਨ. ¹² Lekin agar wuh hathiyār ḍālne se inkār kareਨ aur jang chhir jāe to shahr kā muhāsarā kar.

¹³ Jab Rab terā Khudā tujhe shahr par fatah degā to us ke tamāਮ mardon ko halāk kar denā. ¹⁴ Tū tamāਮ māਲ-e-ghanīmat auratoਨ, bachchoਨ aur maweshiyoਨ samet rakh saktā hai.

Dushman kī jo chīzen Rab ne tere hawāਲੇ kar dī haiਨ un sab ko tū istemāl kar saktā hai. ¹⁵ Yoਨ un shahroਨ se nipatnā jo tere apne mulk se bāhar haiਨ.

¹⁶ Lekin jo shahr us mulk meñ wāqe haiñ jo Rab terā Khudā tujhe mīrās meñ de rahā hai, un ke tamām jāndāroñ ko halāk kar denā. ¹⁷ Unheñ Rab ke sapurd karke mukammal taur par halāk karnā, jis tarah Rab tere Khudā ne tujhe hukm diyā hai. Is meñ Hittī, Amorī, Kanānī, Farizzī, Hiwwī aur Yabūsī shāmil haiñ. ¹⁸ Agar tū aisā na kare to wuh tumheñ Rab tumhāre Khudā kā gunāh karne par uksāeñge. Jo ghinaunī harkateñ wuh apne dewatāoñ kī pūjā karte waqt karte haiñ unheñ wuh tumheñ bhī sikhāeñge.

¹⁹ Shahr kā muhāsarā karte waqt irdgird ke phaldār darakhtoñ ko kāt kar tabāh na kar denā khāh barī der bhī ho jāe, warnā tū un kā phal nahīñ khā sakegā. Unheñ na kātnā. Kyā darakht tere dushman haiñ jin kā muhāsarā karnā hai? Hargiz nahīñ! ²⁰ Un darakhtoñ kī aur bāt hai jo phal nahīñ lāte. Unheñ tū kāt kar muhāsare ke lie istemāl kar saktā hai jab tak shahr shikast na khāe.

21

Nāmālūm Qatl kā Kaffārā

¹ Jab tū us mulk meñ ābād hogā jo Rab tujhe mīrās meñ de rahā hai tāki tū us par qabzā kare to ho saktā hai ki koī lāsh khule maidān meñ kahiñ parī pāi jāe. Agar mālūm na ho ki kis ne use qatl kiyā hai ² to pahle irdgird ke shahroñ ke buzurg aur qāzī ā kar patā kareñ ki kaun-sā shahr lāsh ke zyādā qarīb hai. ³ Phir us shahr ke buzurg ek jawān gāy chun leñ jo kabhī kām ke lie istemāl nahīñ huī. ⁴ Wuh use ek aisī wādī meñ le jāeñ jis meñ na kabhī hal chalāyā gayā,

na paude lagāe gae hoñ. Wādī meñ aisī nahar ho jo pūrā sāl bahtī rahe. Wahīn buzurg jawān gāy kī gardan tor̄ dālen.

⁵ Phir Lāwī ke qabīle ke imām qarīb āeñ. Kyoñki Rab tumhāre Khudā ne unheñ chun liyā hai tāki wuh khidmat kareñ, Rab ke nām se barkat deñ aur tamām jhagañ aur hamloñ kā faisla kareñ. ⁶ Un ke dekhte dekhte shahr ke buzurg apne hāth gāy ki lāsh ke ūpar dho leñ. ⁷ Sāth sāth wuh kaheñ, “Ham ne is shakhs ko qatl nahīn kiyā, na ham ne dekhā ki kis ne yih kiyā. ⁸ Ai Rab, apnī qaum Isrāīl kā yih kaffārā qabūl farmā jise tū ne fidyā de kar chhuṛāyā hai. Apnī qaum Isrāīl ko is bequsūr ke qatl kā quśūrwār na ṭahrā.” Tab maqtūl kā kaffārā diyā jāegā.

⁹ Yoñ tū aise bequsūr shakhs ke qatl kā dāgh apne darmiyān se miṭā degā. Kyoñki tū ne wuhī kuchh kiyā hogā jo Rab kī nazar meñ durust hai.

Jangī Qaidī Aurat se Shādī

¹⁰ Ho saktā hai ki tū apne dushman se jang kare aur Rab tumhārā Khudā tujhe fatah bakhshé. Jangī qaidiyoñ ko jamā karte waqt ¹¹ tujhe un meñ se ek khūbsūrat aurat nazar ātī hai jis ke sāth terā dil lag jātā hai. Tū us se shādī kar saktā hai. ¹² Use apne ghar men le ā. Wahān wuh apne sar ke bālon ko mundwāe, apne nākhun tarāshe ¹³ aur apne wuh kapre utāre jo wuh pahne hue thī jab use qaid kiyā gayā. Wuh pūre ek mahīne tak apne wālidain ke lie mātam kare. Phir tū us ke pās jā kar us ke sāth shādī kar saktā hai.

¹⁴ Agar wuh tujhe kisi waqt pasand na āe to use jāne de. Wuh wahān jāe jahān us kā jī

chāhe. Tujhe use bechne yā us se laundī kā-sā sulūk karne kī ijāzat nahīn hai, kyoñki tū ne use majbūr karke us se shādī kī hai.

Pahlauṭhe ke Huqūq

¹⁵ Ho saktā hai kisi mard kī do bīwiyān hoñ. Ek ko wuh pyār kartā hai, dūsrī ko nahīn. Donoñ bīwiyoñ ke bete paidā hue haiñ, lekin jis bīwī se shauhar muhabbat nahīn kartā us kā betā sab se pahle paidā huā. ¹⁶ Jab bāp apni milkiyat wasiyat meñ taqṣīm kartā hai to lāzim hai ki wuh apne sab se bare bete kā maurūsī haq pūrā kare. Use pahlauṭhe kā yih haq us bīwī ke bete ko muntaqil karne kī ijāzat nahīn jise wuh pyār kartā hai. ¹⁷ Use taslīm karnā hai ki us bīwī kā betā sab se barā hai, jis se wuh muhabbat nahīn kartā. Natijatan use us bete ko dūsre betoñ kī nisbat dughnā hissā denā paregā, kyoñki wuh apne bāp kī tāqat kā pahlā izhār hai. Use pahlauṭhe kā haq hāsil hai.

Sarkash Betā

¹⁸ Ho saktā hai ki kisi kā betā haṭdharm aur sarkash ho. Wuh apne wālidain kī itā'at nahīn kartā aur un ke tambīh karne aur sazā dene par bhī un kī nahīn suntā. ¹⁹ Is sūrat meñ wālidain use pakar̄ kar shahr ke darwāze par le jāen jahān buzurg jamā hote haiñ. ²⁰ Wuh buzurgoñ se kaheñ, “Hamārā betā haṭdharm aur sarkash hai. Wuh hamārī itā'at nahīn kartā balki aiyāsh aur sharābī hai.” ²¹ Yih sun kar shahr ke tamām mard use sangsār kareñ. Yoñ tū apne darmiyān se burāi miṭā degā. Tamām Isrāīl yih sun kar dar jāegā.

*Sazā-e-Maut Pāne Wāle ko Usī Din Dafnānā
Hai*

²² Jab tū kisī ko sazā-e-maut de kar us kī lāsh kisī lakaṛī yā darakht se laṭkātā hai ²³ to use aglī subah tak wahān na chhornā. Har sūrat meñ use usī din dafnā denā, kyoñki jise bhī darakht se laṭkāyā gayā hai us par Allāh kī lānat hai. Agar use usī din dafnāyā na jāe to tū us mulk ko nāpāk kar degā jo Rab terā Khudā tujhe mīrās meñ de rahā hai.

22

Madad Karne ke lie Taiyār Rahnā

¹ Agar tujhe kisī hamwatan bhāī kā bail yā bher-bakrī bhaṭkī huī nazar āe to use nazarandāz na karnā balki mālik ke pās wāpas le jānā. ² Agar mālik kā ghar qarīb na ho yā tujhe mālūm na ho ki mālik kaun hai to jānwar ko apne ghar lā kar us waqt tak sañbhāle rakhnā jab tak ki mālik use dhūndne na āe. Phir jānwar ko use wāpas kar denā. ³ Yihī kuchh kar agar tere hamwatan bhāī kā gadhā bhaṭkā huā nazar āe yā us kā gumshudā kūṭ yā koī aur chīz kahīn nazar āe. Use nazarandāz na karnā.

⁴ Agar tū dekhe ki kisī hamwatan kā gadhā yā bail rāste meñ gir gayā hai to use nazarandāz na karnā. Jānwar ko khaṛā karne meñ apne bhāī kī madad kar.

Qudratī Intazām ke taht Rahnā

⁵ Aurat ke lie mardon ke kapre pahnanā manā hai. Isī tarah mard ke lie auratoñ ke kapre pahnanā bhī manā hai. Jo aisā kartā hai us se Rab tere Khudā ko għin ātī hai.

6 Agar tujhe kahīn rāste meñ, kisī darakht meñ yā zamīn par ghoñslā nazar āe aur parindā apne bachchoṇ yā andoṇ par baiṭhā huā ho to mān ko bachchoṇ samet na pakarṇā. **7** Tujhe bachche le jāne kī ijāzat hai lekin mān ko chhoṛ denā tāki tū khushhāl aur der tak jītā rahe.

8 Nayā makān tāmīr karte waqt chhat par chāroṇ taraf dīwār banānā. Warnā tū us shakhs kī maut kā zimmedār ṭhahregā jo terī chhat par se gir jāe.

9 Apne angūr ke bāgh meñ do qism ke bij na bonā. Warnā sab kuchh maqdis ke lie makhsūs-o-muqaddas hogā, na sirf wuh fasal jo tum ne angūr ke alāwā lagāī balki angūr bhī.

10 Bail aur gadhe ko joṛ kar hal na chalānā.

11 Aise kapre na pahnānā jin meñ bante waqt ūn aur katān milāe gae hain.

12 Apnī chādar ke chāroṇ konoṇ par phundne lagānā.

Izdiwājī Zindagī kī Hifāzat

13 Agar koī ādmī shādī karne ke thoṛī der bād apnī bīwī ko pasand na kare **14** aur phir us kī badnāmī karke kahe, “Is aurat se shādī karne ke bād mujhe patā chalā ki wuh kuñwārī nahīn hai” **15** to jawāb meñ bīwī ke wālidain shahr ke darwāze par jamā hone wāle buzurgoṇ ke pās sabūt * le āen ki betī shādī se pahle kuñwārī thi. **16** Bīwī kā bāp buzurgoṇ se kahe, “Maiñ ne apnī betī kī shādī is ādmī se kī hai, lekin yih us se nafrat kartā hai. **17** Ab is ne us kī badnāmī

* **22:15** Yānī wuh kaprā jis par nayā joṛā soyā huā thā.

karke kahā hai, ‘Mujhe patā chalā ki tumhārī betī kuñwārī nahīn hai.’ Lekin yahān sabūt hai ki merī betī kuñwārī thī.” Phir wālidain shahr ke buzurgoṇ ko mazkūrā kapṛā dikhāeñ.

¹⁸ Tab buzurg us ādmī ko pakar kar sazā deñ,
¹⁹ kyoñki us ne ek Isrāīlī kuñwārī kī badnāmī kī hai. Is ke alāwā use jurmāne ke taur par bīwī ke bāp ko chāndī ke 100 sikke dene paṛeñge. Lāzim hai ki wuh shauhar ke farāyz adā kartā rahe. Wuh umr-bhar use talāq nahīn de sakegā.

²⁰ Lekin agar ādmī kī bāt durust nikle aur sābit na ho sake ki bīwī shādī se pahle kuñwārī thī²¹ to use bāp ke ghar lāyā jāe. Wahān shahr ke ādmī use sangsār kar deñ. Kyonki apne bāp ke ghar meñ rahte hue badkārī karne se us ne Isrāīl meñ ek ahmaqānā aur bedīn harkat kī hai. Yon tū apne darmiyān se burāī miṭā degā. ²² Agar koī ādmī kisī kī bīwī ke sāth zinā kare aur wuh pakare jāeñ to donoṇ ko sazā-e-maut denī hai. Yon tū Isrāīl se burāī miṭā degā.

²³ Agar ābādī meñ kisī mard kī mulāqāt kisī aisī kuñwārī se ho jis kī kisī aur ke sāth mangnī huī hai aur wuh us ke sāth hambistar ho jāe ²⁴ to lāzim hai ki tum donoṇ ko shahr ke darwāze ke pās lā kar sangsār karo. Wajah yih hai ki lārkī ne madad ke lie na pukārā agarche us jagah log ābād the. Mard kā jurm yih thā ki us ne kisī aur kī mangetar kī ismatdarī kī hai. Yon tū apne darmiyān se burāī miṭā degā.

²⁵ Lekin agar mard ḡhairābād jagah meñ kisī aur kī mangetar kī ismatdarī kare to sirf usī ko sazā-e-maut dī jāe. ²⁶ Lārkī ko koī sazā na denā, kyoñki us ne kuchh nahiñ kiyā jo maut ke lāyq

ho. Ziyādatī karne wāle kī harkat us shakhs ke barābar hai jis ne kisī par hamlā karke use qatl kar diyā hai. ²⁷ Chūnki us ne laṛkī ko wahān pāyā jahān log nahīn rahte, is lie agarche laṛkī ne madad ke lie pukārā to bhī use koī na bachā sakā.

²⁸ Ho saktā hai koī ādmī kisī laṛkī kī ismatdarī kare jis kī mangnī nahīn huī hai. Agar unheñ pakarā jāe ²⁹ to wuh larkī ke bāp ko chāndī ke 50 sikke de. Lāzim hai ki wuh usī laṛkī se shādī kare, kyonki us ne us kī ismatdarī kī hai. Na sirf yih balki wuh umr-bhar use talāq nahīn de saktā.

³⁰ Apne bāp kī bīwī se shādī karnā manā hai. Jo koī yih kare wuh apne bāp kī behurmatī kartā hai.

23

Muqaddas Ijtīmā meñ Sharīk Hone kī Sharāyt

¹ Jab Isrāīlī Rab ke maqdis ke pās jamā hote hain to use hāzir hone kī ijāzat nahīn jo kāṭne yā kuchalne se khojā ban gayā hai. ² Isī tarah wuh bhī muqaddas ijtīmā se dūr rahe jo nājāy z tālluqāt ke natīje meñ paidā huā hai. Us kī aulād bhī daswīn pusht tak us meñ nahīn ā saktī.

³ Koī bhī Ammonī yā Moābī muqaddas ijtīmā meñ sharīk nahīn ho saktā. In qaumōn kī aulād daswīn pusht tak bhī is jamāt meñ hāzir nahīn ho saktī, ⁴ kyonki jab tum Misr se nikal āe to wuh rotī aur pānī le kar tum se milne na āe. Na sirf yih balki unhoñ ne Masoputāmiyā ke shahr Fator meñ jā kar Bilām bin Baor ko paise die tāki wuh tujh par lānat bheje. ⁵ Lekin Rab tere Khudā ne

Bilām kī na sunī balki us kī lānat barkat meñ badal dī. Kyoñki Rab terā Khudā tujh se pyār kartā hai. ⁶ Umr-bhar kuchh na karnā jis se in qaumōñ kī salāmatī aur khushhālī baṛh jāe.

⁷ Lekin Adomiyōñ ko makrūh na samajhnā, kyoñki wuh tumhāre bhāī haiñ. Isī tarah Misriyon ko bhī makrūh na samajhnā, kyoñki tū un ke mulk meñ pardesī mehmān thā. ⁸ Un kī tīsrī nasl ke log Rab ke muqaddas ijtimā meñ sharīk ho sakte haiñ.

Khaimāgāh meñ Nāpākī

⁹ Apne dushmanoñ se jang karte waqt apnī lashkargāh meñ har nāpāk chīz se dūr rahnā.

¹⁰ Masalan agar koī ādmī rāt ke waqt ehtilām ke bāis nāpāk ho jāe to wuh lashkargāh ke bāhar jā kar shām tak wahān ṭhahre. ¹¹ Din dhalte waqt wuh nahā le to sūraj ḍūbne par lashkargāh meñ wāpas ā saktā hai.

¹² Apnī hājat rafā karne ke lie lashkargāh se bāhar koī jagah muqarrar kar. ¹³ Jab kisi ko hājat ke lie baiṭhnā ho to wuh is ke lie gaṛhā khode aur bād meñ use miṭṭī se bhar de. Is lie apne sāmān meñ khudāī kā koī ālā rakhnā zarūrī hai.

¹⁴ Rab terā Khudā terī lashkargāh meñ tere darmiyān hī ghūmtā-phirtā hai tāki tū mahfūz rahe aur dushman tere sāmne shikast khāe. Is lie lāzim hai ki terī lashkargāh us ke lie maṄhsūs-o-muqaddas ho. Aissā na ho ki Allāh wahān koī sharīnāk bāt dekh kar tujh se dūr ho jāe.

Farār Hue Ḍhulāmoñ kī Madad Karnā

15 Agar koī ġħulām tere pās panāh le to use mālik ko wāpas na karnā. **16** Wuh tere sāth aur tere darmiyān hī rahe, wahān jahān wuh basnā chāhe, us shahr meñ jo use pasand āe. Use na dabānā.

Mandir meñ Ismatfaroshī Manā Hai

17 Kisī dewatā kī khidmat meñ ismatfaroshī karnā har Isrāīlī aurat aur mard ke lie manā hai.

18 Mannat mānte waqt na kasbī kā ajr, na kutte ke paise * Rab ke maqdis meñ lānā, kyoñki Rab tere Khudā ko donoñ chīzoñ se għin hai.

Apne Hamwatanon se Sūd na Lenā

19 Agar koī Isrāīlī bhāī tujh se qarz le to us se sūd na lenā, kħāh tū ne use paise, khānā yā koī aur chīz dī ho. **20** Apne Isrāīlī bhāī se sūd na le balki sirf pardesi se. Phir jab tū mulk par qabzā karke us meñ rahegā to Rab terā Khudā tere har kām meñ barkat degā.

Apnī Mannat Pūrī Karnā

21 Jab tū Rab apne Khudā ke huzūr mannat māne to use pūrā karne meñ der na karnā. Rab terā Khudā yaqīnan tujh se is kā mutālabā karegā. Agar tū use pūrā na kare to quśūrwār ṭhahregā. **22** Agar tū mannat mānane se bāz rahe to quśūrwār nahīn ṭhahregā, **23** lekin agar tū apnī dili kħushī se Rab ke huzūr mannat māne to har sūrat meñ use pūrā kar.

Dūsre ke Bāġħ meñ se Guzarne kā Rawaiyā

* **23:18** Yaqīn se nahīn kahā jā saktā ki ‘kutte ke paise’ se kyā murād hai. Ĝħāliban is ke pīchhe butparastī kā koī dastūr hai.

24 Kisī hamwatan ke angūr ke bāgh meñ se guzarte waqt tujhe jitnā jī chāhe us ke angūr khāne kī ijāzat hai. Lekin apne kisī bartan meñ phal jamā na karnā. **25** Isī tarah kisī hamwatan ke anāj ke khet meñ se guzarte waqt tujhe apne hāthoṇ se anāj kī bāliyāṇ torne kī ijāzat hai. Lekin darāntī istemāl na karnā.

24

Talāq aur Dubārā Shādī

1 Ho saktā hai koī ādmī kisī aurat se shādī kare lekin bād meñ use pasand na kare, kyoñki use bīwī ke bāre meñ kisī sharmnāk bāt kā patā chal gayā hai. Wuh talāqnāmā likh kar use aurat ko detā aur phir use ghar se wāpas bhej detā hai. **2** Is ke bād us aurat kī shādī kisī aur mard se ho jātī hai, **3** aur wuh bhī bād meñ use pasand nahīn kartā. Wuh bhī talāqnāmā likh kar use aurat ko detā aur phir use ghar se wāpas bhej detā hai. Қāh dūsrā shauhar use wāpas bhej de yā shauhar mar jāe, **4** aurat ke pahle shauhar ko us se dubārā shādī karne kī ijāzat nahīn hai, kyoñki wuh aurat us ke lie nāpāk hai. Aisī harkat Rab kī nazar meñ qābil-e-ghin hai. Us mulk ko yoñ gunāhālūdā na karnā jo Rab terā Қhudā tujhe mīrās meñ de rahā hai.

Mazīd Hidāyāt

5 Agar kisī ādmī ne abhī abhī shādī kī ho to tū use bhartī karke jang karne ke lie nahīn bhej saktā. Tū use koī bhī aisī zimmedārī nahīn de saktā, jis se wuh ghar se dūr rahne par majbūr ho jāe. Ek sāl tak wuh aisī zimmedāriyon se barī

rahe tāki ghar meṇ rah kar apnī bīwī ko ḫhush kar sake.

⁶ Agar koī tujh se udhār le to zamānat ke taur par us se na us kī chhotī chakkī, na us kī baṛī chakkī kā pāṭ lenā, kyoñki aisā karne se tū us kī jān legā yānī tū wuh chīz legā jis se us kā guzārā hotā hai.

⁷ Agar kisī ādmī ko pakarā jāe jis ne apne hamwatan ko aghwā karke ḡhulām banā liyā yā bech diyā hai to use sazā-e-maut denā hai. Yoñ tū apne darmiyān se burāī miṭā degā.

⁸ Agar koī wabāī jildī bīmārī tujhe lag jāe to baṛī ehtiyāt se Lāwī ke qabīle ke imāmoñ kī tamām hidāyat par amal karnā. Jo bhī hukm maiñ ne unheñ diyā use pūrā karnā. ⁹ Yād kar ki Rab tere Ḫudā ne Mariyam ke sāth kyā kiyā jab tum Misr se nikal kar safr kar rahe the.

Ĝharibōñ ke Huqūq

¹⁰ Apne hamwatan ko udhār dete waqt us ke ghar meṇ na jānā tāki zamānat kī koī chīz mile

¹¹ balki bāhar ṭhahar kar intazār kar ki wuh ḫhud ghar se zamānat kī chīz nikāl kar tujhe de. ¹² Agar wuh itnā zarūratmand ho ki sirf apnī chādar de sake to rāt ke waqt zamānat tere pās na rahe. ¹³ Use sūraj dūbne tak wāpas karnā tāki qarzdār us meṇ lipāṭ kar so sake. Phir wuh tujhe barkat degā aur Rab terā Ḫudā terā yih qadam rāst qarār degā.

¹⁴ Zarūratmand mazdūr se ḡhalat fāydā na uṭhānā, chāhe wuh Isrāīlī ho yā pardesi. ¹⁵ Use rozānā sūraj dūbne se pahle pahle us kī mazdūrī de denā, kyoñki is se us kā guzārā hotā hai.

Kahīn wuh Rab ke huzūr terī shikāyat na kare aur tū qusūrwār Ქhahre.

¹⁶ Wālidain ko un ke bachchoṇ ke jarāym ke sabab se sazā-e-maut na dī jāe, na bachchoṇ ko un ke wālidain ke jarāym ke sabab se. Agar kisī ko sazā-e-maut denī ho to us gunāh ke sabab se jo us ne ƙhud kiyā hai.

¹⁷ Pardesiyon aur yatīmoṇ ke huqūq qāym rakhnā. Udhār dete waqt zamānat ke taur par bewā kī chādar na lenā. ¹⁸ Yād rakh ki tū bhī Misr men ghanām thā aur ki Rab tere Khudā ne fidyā de kar tujhe wahān se chhurāyā. Isī wajah se maiṇ tujhe yih hukm detā hūn.

¹⁹ Agar tū fasal kī kaṭāī ke waqt ek pūlā bhūl kar khet meṇ chhoṛ āe to use lāne ke lie wāpas na jānā. Use pardesiyon, yatīmoṇ aur bewāoṇ ke lie wahān chhoṛ denā tāki Rab terā Khudā tere har kām meṇ barkat de. ²⁰ Jab zaitūn kī fasal pak gaī ho to darakhtoṇ ko mār mār kar ek hī bār un meṇ se phal utār. Is ke bād unheṇ na chhernā. Bachā huā phal pardesiyon, yatīmoṇ aur bewāoṇ ke lie chhoṛ denā. ²¹ Isī tarah apne angūr torṇe ke lie ek hī bār bāgh meṇ se guzarnā. Is ke bād use na chhernā. Bachā huā phal pardesiyon, yatīmoṇ aur bewāoṇ ke lie chhoṛ denā. ²² Yād rakh ki tū ƙhud Misr men ghanām thā. Isī wajah se maiṇ tujhe yih hukm detā hūn.

25

Kore Lagāne kī Munāsib Sazā

¹ Agar log apnā ek dūsre ke sāth jhagarā ƙhud niptā na sakeṇ to wuh apnā muāmalā

adālat meñ pesh kareñ. Qāzī faisla kare ki kaun bequsūr hai aur kaun mujrim. ² Agar mujrim ko kore lagāne kī sazā denī hai to use qāzī ke sāmne hī muñh ke bal zamīn par liṭānā. Phir use itne kore lagāe jāen jitnoñ ke wuh lāyq hai. ³ Lekin us ko zyādā se zyādā 40 kore lagāne haiñ, warnā tere Isrāīlī bhāī kī sar-e-ām be'izzatī ho jāegī.

Bail kā Muñh na Bāndhnā

⁴ Jab tū fasal gāhne ke lie us par bail chalne detā hai to us kā muñh bāndh kar na rakhnā.

Marhūm Bhāī kī Bīwī se Shādī Karne kā Hukm

⁵ Agar koī shādīshudā mard beaulād mar jāe aur us kā sagā bhāī sāth rahe to us kā farz hai ki bewā se shādī kare. Bewā shauhar ke khāndān se haṭ kar kisī aur se shādī na kare balki sirf apne dewar se. ⁶ Pahlā beṭā jo is rishte se paidā hogā pahle shauhar ke beṭe kī haisiyat rakhegā. Yoñ us kā nām qāym rahegā.

⁷ Lekin agar dewar bhābī se shādī karnā na chāhe to bhābī shahr ke darwāze par jamā hone wāle buzurgoñ ke pās jāe aur un se kahe, “Merā dewar mujh se shādī karne se inkār kartā hai. Wuh apnā farz adā karne ko taiyār nahīn ki apne bhāī kā nām qāym rakhe.” ⁸ Phir shahr ke buzurg dewar ko bulā kar use samjhāeñ. Agar wuh is ke bāwujūd bhī us se shādī karne se inkār kare ⁹ to us kī bhābī buzurgoñ kī maujūdagī meñ us ke pās jā kar us kī ek chappal utār le. Phir wuh us ke muñh par thūk kar kahe, “Us ādmī se aisā sulūk kiyā jātā hai jo apne bhāī kī nasl qāym rakhne ko taiyār nahīn.” ¹⁰ Āindā Isrāīl

meň dewar kī nasl “Nange Pāñw Wāle kī Nasl” kahlāegī.

Jhagare meň Nāzebā Harkaten

¹¹ Agar do ādmī laṛ rahe hoṇ aur ek kī bīwī apne shauhar ko bachāne kī khātir mukhālif ke azu-e-tanāsul ko pakaṛ le ¹² to lāzim hai ki tū aurat kā hāth kāṭ dāle. Us par rahm na karnā.

Dhokā na Denā

¹³ Tolte waqt apne thaile meň sahīh wazn ke bāṭ rakh, aur dhokā dene ke lie halke bāṭ sāth na rakhnā. ¹⁴ Isī tarah apne ghar meň anāj kī paimāish karne kā sahīh bartan rakh, aur dhokā dene ke lie chhoṭā bartan sāth na rakhnā. ¹⁵ Sahīh wazn ke bāṭ aur paimāish karne ke sahīh bartan istemāl karnā tāki tū der tak us mulk meň jitā rahe jo Rab terā Khudā tujhe degā. ¹⁶ Kyoñki use har dhonebāz se ghin hai.

Amālīqiyon ko Sazā Denā

¹⁷ Yād rahe ki Amālīqiyon ne tujh se kyā kuchh kiyā jab tum Misr se nikal kar safr kar rahe the. ¹⁸ Jab tū thakāhārā thā to wuh tujh par hamlā karke pīchhe pīchhe chalne wāle tamām kamzoroni ko jān se mārte rahe. Wuh Allāh kā khauf nahīn mānte the. ¹⁹ Chunāñche jab Rab terā Khudā tujhe irdgird ke tamām dushmanoñ se sukūn degā aur tū us mulk meň ābād hogā jo wuh tujhе mīrās meň de rahā hai tāki tū us par qabzā kare to Amālīqiyon ko yoñ halāk kar ki duniyā meň un kā nām-o-nishān na rahe. Yih bāṭ mat bhūlnā.

26

Zamīn kī Pahlī Paidāwār Rab ko Pesh Karnā

¹ Jab tū us mulk meñ dākhil hogā jo Rab terā Khudā tujhe mīrās meñ de rahā hai aur tū us par qabzā karke us meñ ābād ho jāegā ² to jo bhī fasal tū kātegā us ke pahle phal meñ se kuchh ṭokre meñ rakh kar us jagah le jā jo Rab terā Khudā apne nām kī sukūnat ke lie chunegā. ³ Wahān khidmat karne wāle imām se kah, “Āj maiñ Rab apne Khudā ke huzūr elān kartā hūn ki us mulk meñ pahuñch gayā hūn jis kā hameñ dene kā wādā Rab ne qasam khā kar hamāre bāpdādā se kiyā thā.”

⁴ Tab imām terā ṭokrā le kar use Rab tere Khudā kī qurbāngāh ke sāmne rakh de. ⁵ Phir Rab apne Khudā ke huzūr kah, “Merā bāp āwārā phirne wālā Arāmī thā jo apne logoñ ko le kar Misr meñ ābād huā. Wahān pahuñchte waqt un kī tādād kam thī, lekin hote hote wuh baṛī aur tāqatwar qaum ban gae. ⁶ Lekin Misriyoñ ne hamāre sāth burā sulūk kiyā aur hameñ dabā kar sakht ġhulāmī meñ phaṇsā diyā. ⁷ Phir ham ne chillā kar Rab apne bāpdādā ke Khudā se fariyād kī, aur Rab ne hamārī sunī. Us ne hamārā dukh, hamārī musībat aur dabī huī hālat dekhī ⁸ aur bare i᷍khtiyār aur qudrat kā izhār karke hameñ Misr se nikāl lāyā. Us waqt us ne Misriyoñ meñ dahshat phailā kar bare mojize dikhāe. ⁹ Wuh hameñ yahān le āyā aur yih mulk diyā jis meñ dūdh aur shahd kī kasrat hai. ¹⁰ Ai Rab, ab maiñ tujhe us zamīn kā pahlā phal pesh kartā hūn jo tū ne hameñ ba᷍hshī hai.”

Apnī paidāwār kā ṭokrā Rab apne Khudā ke sāmne rakh kar use sijdā karnā. ¹¹ Khushī manānā ki Rab mere Khudā ne mujhe aur mere gharāne ko itnī achchhī chīzoṇ se nawāzā hai. Is khushī meṇ apne darmiyān rahne wāle Lāwiyoṇ aur pardesiyoṇ ko bhī shāmil karnā.

Fasal kā Zarūratmandoṇ ke lie Hissā

¹² Har tīsre sāl apnī tamām fasloṇ kā daswāñ hissā Lāwiyoṇ, pardesiyoṇ, yatīmoṇ aur bewāoṇ ko denā tāki wuh tere shahroṇ meṇ khānā khā kar ser ho jāeṇ. ¹³ Phir Rab apne Khudā se kah, “Maiṇ ne waisā hī kiyā hai jaisā tū ne mujhe hukm diyā. Maiṇ ne apne ghar se tere lie maḥsūs-o-muqaddas hissā nikāl kar use Lāwiyoṇ, pardesiyoṇ, yatīmoṇ aur bewāoṇ ko diyā hai. Maiṇ ne sab kuchh terī hidāyāt ke ain mutābiq kiyā hai aur kuchh nahīn bhūlā. ¹⁴ Mātam karte waqt maiṇ ne is maḥsūs-o-muqaddas hisse se kuchh nahīn khāyā. Maiṇ ise uṭhā kar ghar se bāhar lāte waqt nāpāk nahīn thā. Maiṇ ne is meṇ se murdoṇ ko bhī kuchh pesh nahīn kiyā. Maiṇ ne Rab apne Khudā kī itā'at karke wuh sab kuchh kiyā hai jo tū ne mujhe karne ko farmāyā thā. ¹⁵ Chunānche āsmān par apne maqdis se nigāh karke apnī qaum Isrāil ko barkat de. Us mulk ko bhī barkat de jis kā wādā tū ne qasam khā kar hamāre bāpdādā se kiyā aur jo tū ne hameṇ baḥsh bhī diyā hai, us mulk ko jis meṇ dūdh aur shahd kī kasrat hai.”

Tum Rab kī Qaum Ho

16 Āj Rab terā Khudā farmātā hai ki in ahkām aur hidāyāt kī pairawī kar. Pūre dil-o-jān se aur baṛī ehtiyāt se in par amal kar.

17 Āj tū ne elān kiyā hai, “Rab merā Khudā hai. Main̄ us kī rāhoṇ par chaltā rahūñgā, us ke ahkām ke tābe rahūñgā aur us kī sunūñgā.”

18 Aur āj Rab ne elān kiyā hai, “Tū merī qaum aur merī apnī milkiyat hai jis tarah maiñ ne tujh se wādā kiyā hai. Ab mere tamām ahkām ke mutābiq zindagī guzār. **19** Jitnī bhī qaumeñ maiñ ne khalaq kī hain̄ un sab par maiñ tujhe sarfarāz karūñga aur tujhe tārif, shohrat aur izzat atā karūñga. Tū Rab apne Khudā ke lie makhsūs-o-muqaddas qaum hogā jis tarah maiñ ne wādā kiyā hai.”

27

Aibāl Pahār par Qurbāngāh Banānā Hai

1 Phir Mūsā ne buzurgon se mil kar qaum se kahā, “Tamām hidāyāt ke tābe raho jo maiñ tumheñ āj de rahā hūn. **2** Jab tum Dariyā-e-Yardan ko pār karke us mulk meñ dākhil hoge jo Rab terā Khudā tujhe de rahā hai to wahāñ bare patthar khare karke un par safedī kar. **3** Un par lafz balafz pūrī shariyat likh. Dariyā ko pār karne ke bād yihī kuchh kar tāki tū us mulk meñ dākhil ho jo Rab terā Khudā tujhe degā aur jis meñ dūdh aur shahd kī kasrat hai. Kyoñki Rab tere bāpdādā ke Khudā ne yih dene kā tujh se wādā kiyā hai. **4** Chunāñche Yardan ko pār karke pattharon ko Aibāl Pahār par khaṛā karo aur un par safedī kar.

⁵ Wahān Rab apne Khudā ke lie qurbāngāh banānā. Jo patthar tū us ke lie istemāl kare unheñ lohe ke kisi auzār se na tarāshnā. ⁶ Sirf sālim patthar istemāl kar. Qurbāngāh par Rab apne Khudā ko bhasm hone wālī qurbāniyān pesh kar. ⁷ Salāmatī kī qurbāniyān bhī us par charhā. Unheñ wahān Rab apne Khudā ke huzūr khā kar khushī manā. ⁸ Wahān khaṛe kie gae pattharon par shariat ke tamām alfāz sāf sāf likhe jāeñ.”

Aibāl Pahār par se Lānat

⁹ Phir Mūsā ne Lāwī ke qabīle ke imāmoñ se mil kar tamām Isrāiliyon se kahā, “Ai Isrāīl, khāmoshī se sun. Ab tū Rab apne Khudā kī qaum ban gayā hai, ¹⁰ is lie us kā farmānbardār rah aur us ke un ahkām par amal kar jo maiñ tujhe āj de rahā hūn.”

¹¹ Usī din Mūsā ne Isrāiliyon ko hukm de kar kahā, ¹² “Dariyā-e-Yardan ko pār karne ke bād Shamāūn, Lāwī, Yahūdāh, Ishkār, Yūsuf aur Binyamīn ke qabīle Garizīm Pahār par khaṛe ho jāeñ. Wahān wuh barkat ke alfāz boleñ. ¹³ Bāqī qabile yānī Rūbin, Jad, Āshar, Zabūlūn, Dān aur Naftālī Aibāl Pahār par khaṛe ho kar lānat ke alfāz boleñ.

¹⁴ Phir Lāwī tamām logoñ se mukhātib ho kar ūñchī āwāz se kaheñ,

¹⁵ ‘Us par lānat jo but tarāsh kar yā ḏhāl kar chupke se khaṛā kare. Rab ko kārīgar ke hāthoñ se banī huī aisī chīz se ghin hai.’

Jawāb meñ sab log kaheñ, ‘Āmīn!’

¹⁶ Phir Lāwī kaheñ, ‘Us par lānat jo apne bāp yā mān kī tahqīr kare.’

Sab log kaheñ, ‘Āmīn!’

17 ‘Us par lānat jo apne paṛosī kī zamīn kī
hudūd āge pīchhe kare.’

Sab log kaheñ, ‘Āmīn!’

18 ‘Us par lānat jo kisī andhe kī rāhnumāī karke
use ḡhalat rāste par le jāe.’

Sab log kaheñ, ‘Āmīn!’

19 ‘Us par lānat jo pardesiyoñ, yatīmoñ yā
bewāoñ ke huqūq qāym na rakhe.’

Sab log kaheñ, ‘Āmīn!’

20 ‘Us par lānat jo apne bāp kī bīwī se hambis-
tar ho jāe, kyoñki wuh apne bāp kī behurmatī
kartā hai.’

Sab log kaheñ, ‘Āmīn!’

21 ‘Us par lānat jo jānwār se jīnsī tālluq rakhe.’

Sab log kaheñ, ‘Āmīn!’

22 ‘Us par lānat jo apnī sagī bahan, apne bāp
kī betī yā apnī māñ kī betī se hambistar ho jāe.’

Sab log kaheñ, ‘Āmīn!’

23 ‘Us par lānat jo apnī sās se hambistar ho jāe.’

Sab log kaheñ, ‘Āmīn!’

24 ‘Us par lānat jo chupke se apne hamwatan
ko qatl kar de.’

Sab log kaheñ, ‘Āmīn!’

25 ‘Us par lānat jo paise le kar kisī bequsūr
shakhs ko qatl kare.’

Sab log kaheñ, ‘Āmīn!’

26 ‘Us par lānat jo is shariāt kī bāteñ qāym na
rakhe, na in par amal kare.’

Sab log kaheñ, ‘Āmīn!’

28

Farmāñbardārī kī Barkateñ

¹ Rab terā Khudā tujhe duniyā kī tamām qaumōn par sarfarāz karegā. Shart yih hai ki tū us kī sune aur ehtiyāt se us ke un tamām ahkām par amal kare jo maiñ tujhe āj de rahā hūn. ² Rab apne Khudā kā farmāñbardār rah to tujhe har tarah kī barkat hāsil hogī. ³ Rab tujhe shahr aur dehāt meñ barkat degā. ⁴ Terī aulād phale phūlegī, terī achchhī-khāsī fasleñ pakeñgī, tere gāy-bailoñ aur bher-bakriyoñ ke bachche taraqqī kareñge. ⁵ Terā ṭokrā phal se bharā rahegā, aur āṭā gūndhne kā terā bartan āṭe se khālī nahīn hogā. ⁶ Rab tujhe ghar meñ āṭe aur wahān se nikalte waqt barkat degā.

⁷ Jab tere dushman tujh par hamlā kareñge to wuh Rab kī madad se shikast khāeñge. Go wuh mil kar tujh par hamlā kareñ to bhī tū unheñ chāroñ taraf muntashir kar degā.

⁸ Allāh tere har kām meñ barkat degā. Anāj kī kasrat ke sabab se tere godām bhare raheinge. Rab terā Khudā tujhe us mulk meñ barkat degā jo wuh tujhe dene wālā hai. ⁹ Rab apnī qasam ke mutābiq tujhe apnī makhsūs-o-muqaddas qaum banāegā agar tū us ke ahkām par amal kare aur us kī rāhoñ par chale. ¹⁰ Phir duniyā kī tamām qaumen tujh se khauf khāeñgī, kyoñki wuh dekheñgī ki tū Rab kī qaum hai aur us ke nām se kahlātā hai.

¹¹ Rab tujhe bahut aulād degā, tere rewar bārhāegā aur tujhe kasrat kī fasleñ degā. Yoñ wuh tujhe us mulk meñ barkat degā jis kā wādā

us ne qasam khā kar tere bāpdādā se kiyā. ¹² Rab āsmān ke khazānoṇ ko khol kar waqt par terī zamīn par bārīsh barsāegā. Wuh tere har kām meñ barkat degā. Tū bahut-sī qaumoṇ ko udhār degā lekin kisī kā bhī qarzdār nahīn hogā. ¹³ Rab tujhe qaumoṇ kī dum nahīn balki un kā sar banāegā. Tū taraqqī kartā jāegā aur zawāl kā shikār nahīn hogā. Lekin shart yih hai ki tū Rab apne Khudā ke wuh ahkām mān kar un par amal kare jo maiṇ tujhe āj de rahā hūn. ¹⁴ Jo kuchh bhī maiṇ ne tujhe karne ko kahā hai us se kisī tarah bhī haṭ kar zindagī na guzārnā. Na dīgar mābūdoṇ kī pairawī karnā, na un kī қhidmat karnā.

Nāfarmānī kī Lānatenī

¹⁵ Lekin agar tū Rab apne Khudā kī na sune aur us ke un tamām ahkām par amal na kare jo maiṇ āj tujhe de rahā hūn to har tarah kī lānat tujh par āegī. ¹⁶ Shahr aur dehāt meñ tujh par lānat hogī. ¹⁷ Tere ṭokre aur āṭā gūndhne ke tere bartan par lānat hogī. ¹⁸ Terī aulād par, tere gāy-bailoṇ aur bher-bakriyoṇ ke bachchoṇ par aur tere khetōṇ par lānat hogī. ¹⁹ Ghar meñ āte aur wahān se nikalte waqt tujh par lānat hogī. ²⁰ Agar tū ġhalat kām karke Rab ko chhore to jo kuchh bhī tū kare wuh tujh par lānateṇ, pareshāniyān aur musībateṇ āne degā. Tab terā jaldī se satyānās hogā, aur tū halāk ho jāegā.

²¹ Rab tujh meñ wabāī bīmāriyān phailāegā jin ke sabab se tujh meñ se koī us mulk meñ zindā nahīn rahegā jis par tū abhī qabzā karne wālā hai. ²² Rab tujhe mohlak bīmāriyoṇ, bukhār

aur sūjan se māregā. Jhulsāne wālī garmī, kāl, patrog aur phaphūndī terī faslen̄ ķhatm karegī. Aisī musībaton̄ ke bāis tū tabāh ho jāegā. ²³ Tere ūpar āsmān pītal jaisā sakht hogā jabki tere nīche zamīn lohe kī mānind hogī. ²⁴ Bārish kī jagah Rab tere mulk par gard aur ret barsāegā jo āsmān se tere mulk par chhā kar tujhe barbād kar degī.

²⁵ Jab tū apne dushmanoṇ kā sāmnā kare to Rab tujhe shikast dilāegā. Go tū mil kar un kī taraf bārhegā to bhī un se bhāg kar chāroṇ taraf muntashir ho jāegā. Duniyā ke tamām mamālik meṇ logon̄ ke rōngtē khaṛe ho jāeñge jab wuh terī musībateṇ̄ dekhēnge. ²⁶ Parinde aur janglī jānwar terī lāshoṇ ko khā jāeñge, aur unheñ bhagāne wālā koī nahīn̄ hogā. ²⁷ Rab tujhe unhīn̄ phoṛoṇ se māregā jo Misriyoṇ ko nikle the. Aise jildī amrāz phaileñge jin kā ilāj nahīn̄ hai. ²⁸ Tū pāgalpan kā shikār ho jāegā, Rab tujhe andhepan aur zahnī abtarī meṇ muttalā kar degā. ²⁹ Dopahar ke waqt bhī tū andhe kī tarah ṭaṭol ṭaṭol kar phiregā. Jo kuchh bhī tū kare us meṇ nākām rahegā. Roz baroz log tujhe dabāte aur lūṭte raheñge, aur tujhe bachāne wālā koī nahīn̄ hogā.

³⁰ Terī mangnī kisī aurat se hogī to koī aur ā kar us kī ismatdarī karegā. Tū apne lie ghar banāegā lekin us meṇ nahīn̄ rahegā. Tū apne lie angūr kā bāgh lagāegā lekin us kā phal nahīn̄ khāegā. ³¹ Tere dekhte dekhte terā bail zabah kiyā jāegā, lekin tū us kā gosht nahīn̄ khāegā. Terā gadhā tujh se chhīn̄ liyā jāegā aur wāpas

nahīn kiyā jāegā. Terī bheṛ-bakriyān dushman ko dī jāeṅgī, aur unheṇ chhuṛāne wālā koī nahīn hogā. ³² Tere bete-beṭiyoṇ ko kisī dūsrī qaum ko diyā jāegā, aur tū kuchh nahīn kar sakegā. Roz baroz tū apne bachchoṇ ke intazār meṇ ufaq ko taktā rahegā, lekin dekhte dekhte terī āṅkheṇ dhundlā jāeṅgī.

³³ Ek ajnabī qaum terī zamīn kī paidāwār aur terī mehnat-o-mashaqqat kī kamāī le jāegī. Tujhe umr-bhar zulm aur dabāw bardāsht karnā parēgā.

³⁴ Jo haulnāk bāteṇ terī āṅkheṇ dekheṅgī un se tū pāgal ho jāegā. ³⁵ Rab tujhe taklīfdeh aur lā'ilāj phorōṇ se māregā jo talwe se le kar chāndī tak pūre jism par phail kar tere ghuṭnoṇ aur ṭāṅgoṇ ko muta'assir kareṅge.

³⁶ Rab tujhe aur tere muqarrar kie hue bādshāh ko ek aise mulk meṇ le jāegā jis se na tū aur na tere bāpdādā wāqif the. Wahān tū dīgar mābūdoṇ yānī lakaṛī aur patthar ke butoṇ kī khidmat karegā. ³⁷ Jis jis qaum meṇ Rab tujhe hāṅk degā wahān tujhe dekh kar logoṇ ke roṅgtē khaṛe ho jāeṅge aur wuh terā mazāq uṛāeṅge. Tū un ke lie ibratangez misāl hogā.

³⁸ Tū apne kheton meṇ bahut bīj bone ke bāwujūd kam hī fasal kāṭegā, kyoṇki ṭiddē use khā jāeṅge. ³⁹ Tū angūr ke bāgh lagā kar un par khūb mehnat karegā lekin na un ke angūr toṛegā, na un kī mai piegā, kyoṇki kīre unheṇ khā jāeṅge. ⁴⁰ Go tere pūre mulk meṇ zaitūn ke darakht hoṅge to bhī tū un kā tel istemāl nahīn kar sakegā, kyoṇki zaitūn Ḳharāb ho kar zamīn par gir jāeṅge.

41 Tere bete-beṭiyān to hōnge, lekin tū un se mahrūm ho jāegā. Kyoṇki unheṇ giriftār karke kisī ajnabī mulk meṇ le jāyā jāegā. **42** Tiddiyoṇ ke ġhol tere mulk ke tamām darakhtoṇ aur fasloṇ par qabzā kar leṅge. **43** Tere darmiyān rahne wālā pardesi tujh se baṛh kar taraqqī kartā jāegā jabki tujh par zawāl ā jāegā. **44** Us ke pās tujhe udhār dene ke lie paise hōnge jabki tere pās use udhār dene ko kuchh nahīn hogā. Ākhir meṇ wuh sar aur tū dum hogā.

45 Yih tamām lānateṇ tujh par ān pareṅgī. Jab tak tū tabāh na ho jāe wuh terā tāqqub kartī raheṅgī, kyoṇki tū ne Rab apne Khudā kī na sunī aur us ke ahkām par amal na kiyā. **46** Yoṇ yih hameshā tak tere aur terī aulād ke lie ek mojizānā aur ibratangez ilāhī nishān raheṅgī.

47 Chūnki tū ne dilī khushī se us waqt Rab apne Khudā kī khidmat na kī jab tere pās sab kuchh thā **48** is lie tū un dushmanoṇ kī khidmat karegā jinheṇ Rab tere khilāf bhejegā. Tū bhūkā, pyāsā, nangā aur har chīz kā hāyatmand hogā, aur Rab terī gardan par lohe kā juā rakh kar tujhe mukammal tabāhī tak le jāegā.

49 Rab tere khilāf ek qaum khaṛī karegā jo dūr se balki duniyā kī intahā se ā kar uqāb kī tarah tujh par jhapaṭṭā māregī. Wuh aisī zabān bolegī jis se tū wāqif nahīn hogā. **50** Wuh sakht qaum hogī jo na buzurgoṇ kā lihāz karegī aur na bachchoṇ par rahm karegī. **51** Wuh tere maweshī aur fasleṇ khā jāegī aur tū bhūke mar jāegā. Tū halāk ho jāegā, kyoṇki tere lie kuchh nahīn bachegā, na anāj, na mai, na tel, na gāy-bailoṇ

yā bher-bakriyon ke bachche. ⁵² Dushman tere mulk ke tamām shahron kā muhāsarā karegā. Ākhirkār jin üñchī aur mazbūt fasiloṇ par tū etamād karegā wuh bhī sab gir paṛeñgī. Dushman us mulk kā koī bhī shahr nahīn chhoṛegā jo Rab terā Khudā tujhe dene wālā hai.

⁵³ Jab dushman tere shahron kā muhāsarā karegā to tū un meñ itnā shadīd bhūkā ho jāegā ki apne bachchoṇ ko khā legā jo Rab tere Khudā ne tujhe die hain. ⁵⁴⁻⁵⁵ Muhāsare ke daurān tum meñ se sab se sharīf aur shāystā ādmī bhī apne bachche ko zabah karke khāegā, kyonki us ke pās koī aur ḫurāk nahīn hogī. Us kī hālat itnī burī hogī ki wuh use apne sage bhāī, bīwī yā bāqī bachchoṇ ke sāth taqsīm karne ke lie taiyār nahīn hogā. ⁵⁶⁻⁵⁷ Tum meñ se sab se sharīf aur shāystā aurat bhī aisā hī karegī, agarche pahle wuh itnī nāzuk thī ki farsh ko apne talwe se chhūne kī jurrat nahīn kartī thī. Muhāsare ke daurān use itnī shadīd bhūk hogī ki jab us ke bachchā paidā hogā to wuh chhup chhup kar use khāegī. Na sirf yih balki wuh paidāish ke waqt bachche ke sāth ḫārij huī ālā'ish bhī khāegī aur use apne shauhar yā apne bāqī bachchoṇ meñ bāñṭne ke lie taiyār nahīn hogī. Itnī musībat tujh par muhāsare ke daurān āegī.

⁵⁸ Ĝharz ehtiyāt se sharīat kī un tamām bātoṇ kī pairawī kar jo is kitāb meñ darj hain, aur Rab apne Khudā ke purjalāl aur bārob nām kā ḫauff mānanā. ⁵⁹ Warnā wuh tujh aur terī aulād meñ sakht aur lā'ilāj amrāz aur aisī dahshatnāk wabāeṇ phailāegā jo rokī nahīn jā sakeñgī. ⁶⁰ Jin

tamām wabāoṇ se tū Misr meṇ dahshat khātā thā wuh ab tere darmiyān phail kar tere sāth chimṭī raheṅgī. ⁶¹ Na sirf Shariyat kī is Kitāb meṇ bayān kī huī bīmāriyān aur musībateṇ tujh par āeṅgī balki Rab aur bhī tujh par bhejegā, jab tak ki tū halāk na ho jāe.

⁶² Agar tū Rab apne Khudā kī na sune to ākhirkār tum meṇ se bahut kam bache raheṅge, go tum pahle sitāroṇ jaise beshumār the. ⁶³ Jis tarah pahle Rab khushī se tumheṇ kāmyābī detā aur tumhārī tādād baṛhātā thā usī tarah ab wuh tumheṇ barbād aur tabāh karne meṇ khushī mahsūs karegā. Tumheṇ zabardastī us mulk se nikālā jāegā jis par tū is waqt dākhil ho kar qabzā karne wālā hai. ⁶⁴ Tab Rab tujhe duniyā ke ek sire se le kar dūsre sire tak tamām qaumoṇ meṇ muntashir kar degā. Wahān tū dīgar mābūdoṇ kī pūjā karegā, aise dewatāoṇ kī jin se na tū aur na tere bāpdādā wāqif the.

⁶⁵ Un mamālik meṇ bhī na tū ārām-o-sukūn pāegā, na tere pānw jam jāeṅge. Rab hone degā ki terā dil thartharātā rahegā, terī ānkheṇ pareshānī ke bāis dhundlā jāeṅgī aur terī jān se ummīd kī har kirān jātī rahegī. ⁶⁶ Terī jān har waqt khatre meṇ hogī aur tū din rāt dahshat khātē hue marne kī tawaqqo karegā. ⁶⁷ Subah uṭh kar tū kahegā, “Kāsh shām ho!” Aur shām ke waqt, “Kāsh subah ho!” Kyoṇki jo kuchh tū dekhegā us se tere dil ko dahshat gher legī.

⁶⁸ Rab tujhe jahāzoṇ meṇ biṭhā kar Misr wāpas le jāegā agarche maiṇ ne kahā thā ki tū use dubārā kabhī nahīn dekhegā. Wahān pahuñch kar tum apne dushmanoṇ se bāt karke apne āp

ko ġħulām ke taur par bechne kī koshish karoge,
lekin koī bhī tumheñ ķharīdnā nahīn chāhegā.”

29

Moāb meñ Rab ke sāth Nayā Ahd

¹ Jab Isrāīlī Moāb meñ the to Rab ne Mūsā ko hukm diyā ki Isrāīliyon ke sāth ek aur ahd bāndhe. Yih us ahd ke alāwā thā jo Rab Horib yānī Sīnā par un ke sāth bāndh chukā thā. ² Is silsile men Mūsā ne tamām Isrāīliyon ko bulā kar kahā, “Tum ne ķhud dekhā ki Rab ne Misr ke bādshāh Firaun, us ke mulāzimoñ aur pūre mulk ke sāth kyā kuchh kiyā. ³ Tum ne apnī āñkhoñ se wuh barī āzmāisheñ, ilāhī nishān aur mojize dekhe jin ke zariye Rab ne apnī qudrat kā izhār kiyā.

⁴ Magar afsos, āj tak Rab ne tumheñ na samajhdār dil atā kiyā, na āñkheñ jo dekh sakeñ yā kān jo sun sakeñ. ⁵ Registān meñ maiñ ne 40 sāl tak tumhārī rāhnumāī kī. Is daurān na tumhāre kaprē phaṭe aur na tumhāre jūte ghise. ⁶ Na tumhāre pās roṭī thī, na mai yā mai jaisī koī aur chīz. To bhī Rab ne tumhārī zarūriyāt pūrī kīn tāki tum sīkh lo ki wuhī Rab tumhārā Ķhudā hai.

⁷ Phir ham yahān āe to Hasbon kā bādshāh Sīhon aur Basan kā bādshāh Oj nikal kar ham se larne āe. Lekin ham ne unheñ shikast dī. ⁸ Un ke mulk par qabzā karke ham ne use Rūbin, Jad aur Manassī ke ādhe qabīle ko mīrās meñ diyā. ⁹ Ab ehtiyāt se is ahd kī tamām sharāyt pūrī karo tāki tum har bāt meñ kāmyāb ho.

10 Is waqt tum sab Rab apne Khudā ke huzūr khare ho, tumhāre qabiloṇ ke sardār, tumhāre buzurg, nigahbān, mard, **11** aurateṇ aur bachche. Tere darmiyān rahne wāle pardesi bhī lakaṛhāron se le kar pānī bharne wālon tak tere sāth yahān hāzir haiṇ. **12** Tū is lie yahān jamā huā hai ki Rab apne Khudā kā wuh ahd taslīm kare jo wuh āj qasam khā kar tere sāth bāndh rahā hai. **13** Is se wuh āj is kī tasdīq kar rahā hai ki tū us kī qaum aur wuh terā Khudā hai yānī wuhī bāt jis kā wādā us ne tujh se aur tere bāpdādā Ibrāhīm, Is'hāq aur Yāqūb se kiyā thā. **14-15** Lekin maiṇ yih ahd qasam khā kar na sirf tumhāre sāth jo hāzir ho bāndh rahā hūn balki tumhārī āne wālī nasloṇ ke sāth bhī.

Butparastī kī Sazā

16 Tum khud jānte ho ki ham Misr meṇ kis tarah zindagī guzārte the. Yih bhī tumheṇ yād hai ki ham kis tarah mukhtalif mamālik meṇ se guzarte hue yahān tak pahuṇche. **17** Tum ne un ke nafratangez but dekhe jo lakaṛī, patthar, chāṇḍī aur sone ke the. **18** Dhyān do ki yahān maujūd koī bhī mard, aurat, kumbā yā qabilā Rab apne Khudā se haṭ kar dūsrī qaumoṇ ke dewatāoṇ kī pūjā na kare. Aisā na ho ki tumhāre darmiyān koī jaṛ phūṭ kar zahrīlā aur kaṛwā phal lāe.

19 Tum sab ne wuh lānateṇ sunī haiṇ jo Rab nāfarmānoṇ par bhejegā. To bhī ho saktā hai ki koī apne āp ko Rab kī barkat kā wāris samajh kar kahe, “Beshak maiṇ apnī ḡhalat rāhoṇ se haṭne ke lie taiyār nahīn hūn, lekin koī bāt nahīn.

Maiñ mahfūz rahūñgā.” Ḳhabardār, aisī harkat se wuh na sirf apne ūpar balki pūre mulk par tabāhī lāegā. * ²⁰ Rab kabhī bhī use muāf karne par āmādā nahīn hogā balki wuh use apne ġhazab aur ġhairat kā nishānā banāegā. Is kitāb meñ darj tamām lānateñ us par āeñgī, aur Rab duniyā se us kā nām-o-nishān miñā degā. ²¹ Wuh use pūrī jamāt se alag karke us par ahd kī wuh tamām lānateñ lāegā jo Sharīat kī is Kitāb meñ likhī huī hain.

²² Mustaqbil meñ tumhārī aulād aur dūr-darāz mamālik se āne wāle musāfir un musibatoñ aur amrāz kā asar dekheñge jin se Rab ne mulk ko tabāh kiyā hogā. ²³ Chāron taraf zamīn jhulsī huī aur gandhak aur namak se ɭhakī huī nazar āegī. Bij us meñ boyā nahīn jāegā, kyoñki ɭhudrau paudoñ tak kuchh nahīn ugegā. Tumhārā mulk Sadūm, Amūrā, Admā aur Zaboīm kī mānind hogā jin ko Rab ne apne ġhazab meñ tabāh kiyā. ²⁴ Tamām qaumeñ pūchheñgī, ‘Rab ne is mulk ke sāth aisā kyoñ kiyā? Us ke sakht ġhazab kī kyā wajah thī?’ ²⁵ Unheñ jawāb milegā, ‘Wajah yih hai ki is mulk ke bāshindoñ ne Rab apne bāpdādā ke Khudā kā ahd tor̄ diyā jo us ne unheñ Misr se nikālte waqt un se bāndhā thā. ²⁶ Unhoñ ne jā kar dīgar mābūdoñ kī khidmat kī aur unheñ sijdā kiyā jin se wuh pahle wāqif nahīn the aur jo Rab ne unheñ nahīn die the. ²⁷ Isī lie us kā ġhazab is mulk par nāzil huā aur wuh us par wuh tamām lānateñ lāyā jin kā zikr is kitāb meñ hai. ²⁸ Wuh itnā ġhusse huā ki us

* ^{29:19} Lafzī tarjumā: serāb zamīn ɭhushk zamīn ke sāth tabāh ho jāegī.

ne unheń jar se ukhār kar ek ajnabī mulk meń phaińk diyā jahān wuh āj tak ābād haiń.’

²⁹ Bahut kuchh poshidā hai, aur sirf Rab hamārā Khudā us kā ilm rakhtā hai. Lekin us ne ham par apnī shariyat kā inkishāf kar diyā hai. Lāzim hai ki ham aur hamārī aulād us ke farmānbardār raheń.

30

Taubā ke Musbat Natīje

¹ Maiń ne tujhe batāyā hai ki tere lie kyā kuchh barkat kā aur kyā kuchh lānat kā bāis hai. Jab Rab terā Khudā tujhe terī ḡhalat harkatonī ke sabab se mukhtalif qaumonī meń muntashir kar degā to tū merī bāteń mān jāegā. ² Tab tū aur terī aulād Rab apne Khudā ke pās wāpas āeńge aur pūre dil-o-jān se us kī sun kar un tamām ahkām par amal kareńge jo maiń āj tujhe de rahā hūn. ³ Phir Rab terā Khudā tujhe bahāl karegā aur tujh par rahm karke tujhe un tamām qaumonī se nikāl kar jamā karegā jin meń us ne tujhe muntashir kar diyā thā. ⁴ Hāñ, Rab terā Khudā tujhe har jagah se jamā karke wāpas lāegā, chāhe tū sab se dūr mulk meń kyoń na pařā ho. ⁵ Wuh tujhe tere bāpdādā ke mulk meń lāegā, aur tū us par qabzā karegā. Phir wuh tujhe tere bāpdādā se zyādā kāmyābī bakhshegā, aur terī tādād zyādā baṛhāegā.

⁶ Khatnā Rab kī qaum kā zāhirī nishān hai. Lekin us waqt Rab terā Khudā tere aur terī aulād kā bātinī khatnā karegā tāki tū use pūre dil-o-jān se pyār kare aur jītā rahe. ⁷ Jo lānateń Rab terā Khudā tujh par lāyā thā unheń wuh

ab tere dushmanoṇ par āne degā, un par jo tujh se nafrat rakhte aur tujhe īzā pahuñchāte hain. ⁸ Kyoṇki tū dubārā Rab kī sunegā aur us ke tamām ahkām kī pairawī karegā jo maiñ tujhe āj de rahā hūn. ⁹ Jo kuchh bhī tū karegā us meñ Rab tujhe barī kāmyābī baķhshegā, aur tujhe kasrat kī aulād, maweshī aur fasleñ hāsil hoṅgī. Kyoṇki jis tarah wuh tere bāpdādā ko kāmyābī dene meñ khushī mahsūs kartā thā usī tarah wuh tujhe bhī kāmyābī dene meñ khushī mahsūs karegā.

¹⁰ Shart sirf yih hai ki tū Rab apne Khudā kī sune, shariyat meñ darj us ke ahkām par amal kare aur pūre dil-o-jān se us kī taraf rujū lāe.

¹¹ Jo ahkām maiñ āj tujhe de rahā hūn na wuh had se zyādā mushkil hain, na terī pahuñch se bāhar. ¹² Wuh āsmān par nahīn hain ki tū kahe, ‘Kaun āsmān par chaṛh kar hamāre lie yih ahkām nīche le āe tāki ham unheñ sun sakeñ aur un par amal kar sakeñ?’ ¹³ Wuh samundar ke pār bhī nahīn hain ki tū kahe, ‘Kaun samundar ko pār karke hamāre lie yih ahkām lāegā tāki ham unheñ sun sakeñ aur un par amal kar sakeñ?’ ¹⁴ Kyoṇki yih kalām tere nihāyat qarīb balki tere muñh aur dil meñ maujūd hai. Chunāñche us par amal karne meñ koī bhī rukāwaṭ nahīn hai.

Zindagī yā Maut kā Chunāo

¹⁵ Dekh, āj maiñ tujhe do rāste pesh kartā hūn. Ek zindagi aur khushhālī kī taraf le jātā hai jabki dūsrā maut aur halākat kī taraf. ¹⁶ Āj maiñ tujhe hukm detā hūn ki Rab apne Khudā ko pyār kar, us kī rāhoṇ par chal aur us ke ahkām ke tābe

rah. Phir tū zindā rah kar taraqqī karegā, aur Rab terā Khudā tujhe us mulk meñ barkat degā jis meñ tū dākhil hone wālā hai.

¹⁷ Lekin agar terā dil is rāste se haṭ kar nāfarmānī kare to barkat kī tawaqqa na kar. Agar tū āzmāish meñ par kar dīgar mābūdoñ ko sijdā aur un kī khidmat kare ¹⁸ to tum zarūr tabāh ho jāoge. Āj maiñ elān kartā hūn ki is sūrat meñ tum zyādā der tak us mulk meñ ābād nahīn rahoge jis meñ tū Dariyā-e-Yardan ko pār karke dākhil hogā tāki us par qabzā kare.

¹⁹ Āj āsmān aur zamīn tumhāre khilāf mere gawāh haiñ ki maiñ ne tumheñ zindagī aur barkatoñ kā rāstā aur maut aur lānatoñ kā rāstā pesh kiyā hai. Ab zindagī kā rāstā ikhtiyār kar tāki tū aur terī aulād zindā rahe. ²⁰ Rab apne Khudā ko pyār kar, us kī sun aur us se lipṭā rah. Kyonki wuhī terī zindagī hai aur wuhī karegā ki tū der tak us mulk meñ jītā rahegā jis kā wādā us ne qasam khā kar tere bāpdādā Ibrāhīm, Is'hāq aur Yāqūb se kiyā thā.”

31

Yashua ko Mūsā kī Jagah Muqarrar Kiyā Jātā Hai

¹ Mūsā ne jā kar tamām Isrāiliyoñ se mazīd kahā,

² “Ab maiñ 120 sāl kā ho chukā hūn. Merā chalnā-phirnā mushkil ho gayā hai. Aur waise bhi Rab ne mujhe batāyā hai, ‘Tū Dariyā-e-Yardan ko pār nahīn karegā.’ ³ Rab terā Khudā khud tere āge āge jā kar Yardan ko pār karegā. Wuhī tere āge āge in qaumōñ ko tabāh karegā

tāki tū un ke mulk par qabzā kar sake. Dariyā ko pār karte waqt Yashua tere āge chalegā jis tarah Rab ne farmāyā hai. ⁴ Rab wahān ke logoṇ ko bilkul usī tarah tabāh karegā jis tarah wuh Amoriyoṇ ko un ke bādshāhoṇ Sīhon aur Oj samet tabāh kar chukā hai. ⁵ Rab tumheṇ un par ghālib āne degā. Us waqt tumheṇ un ke sāth waisā sulük karnā hai jaisā maiṇ ne tumheṇ batāyā hai. ⁶ Mazbūt aur diler ho. Un se khauf na khāo, kyoṇki Rab terā Khudā tere sāth chaltā hai. Wuh tujhe kabhī nahīn chhoṛegā, tujhe kabhī tark nahīn karegā.”

⁷ Is ke bād Mūsā ne tamām Isrāiliyoṇ ke sāmne Yashua ko bulāyā aur us se kahā, “Mazbūt aur diler ho, kyoṇki tū is qaum ko us mulk meṇ le jāegā jis kā wādā Rab ne qasam khā kar un ke bāpdādā se kiyā thā. Lāzim hai ki tū hī use taqsīm karke har qabīle ko us kā maurūsī ilāqā de. ⁸ Rab khud tere āge āge chalte hue tere sāth hogā. Wuh tujhe kabhī nahīn chhoṛegā, tujhe kabhī nahīn tark karegā. Khauf na khānā, na ghabrānā.”

Har Sāt Sāl ke bād Sharīat kī Tilāwat

⁹ Mūsā ne yih pūrī shariyat likh kar Isrāīl ke tamām buzurgoṇ aur Lāwī ke qabīle ke un imāmoṇ ke sapurd kī jo safr karte waqt ahd kā sandūq uṭhā kar le chalte the. Us ne un se kahā, ¹⁰⁻¹¹ “Har sāt sāl ke bād is shariyat kī tilāwat karnā, yānī bahālī ke sāl meṇ jab tamām qarz mansūkh kie jāte haiṇ. Tilāwat us waqt karnā hai jab Isrāīlī Jhoṇpriyoṇ kī Īd ke lie Rab apne Khudā ke sāmne us jagah hāzir hoṇge jo wuh maqdis ke lie chunegā. ¹² Tamām logoṇ

ko mardon, aurato, bachcho aur pardesiyo samet wahān jamā karnā tāki wuh sun kar sikhē, Rab tumhāre Khudā kā khauf māne aur ehtiyāt se is shariat kī bāto par amal kare. ¹³ Lāzim hai ki un kī aulād jo is shariat se nāwāqif hai ise sune aur sikhē tāki umr-bhar us mulk mei Rab tumhāre Khudā kā khauf māne jis par tum Dariyā-e-Yardan ko pār karke qabzā karoge.”

Rab Mūsā ko Ākhirī Hidāyat Detā Hai

¹⁴ Rab ne Mūsā se kahā, “Ab terī maut qarib hai. Yashua ko bulā kar us ke sāth mulāqāt ke khaime mei hāzir ho jā. Wahān maiñ use us kī zimmedāriyān sauñpūngā.”

Mūsā aur Yashua ā kar khaime mei hāzir hue ¹⁵ to Rab khaime ke darwāze par bādal ke satūn mei zāhir huā. ¹⁶ Us ne Mūsā se kahā, “Tū jald hī mar kar apne bāpdādā se jā milegā. Lekin yih qaum mulk mei dākhil hone par zinā karke us ke ajnabī dewatāo kī pairawī karne lag jāegī. Wuh mujhe tark karke wuh ahd toş degī jo maiñ ne un ke sāth bāndhā hai. ¹⁷ Phir merā ghazab un par bhaṛkegā. Maiñ unhein chhoṭ kar apnā chehrā un se chhupā lūngā. Tab unhein kachchā chabā liyā jāegā aur bahut sārī haibatnāk musībatein un par āengī. Us waqt wuh kahenge, ‘Kyā yih musībatein is wajah se ham par nahīn āin ki Rab hamāre sāth nahīn hai?’ ¹⁸ Aur aisā hī hogā. Maiñ zarūr apnā chehrā un se chhupāe rakhūngā, kyonki dīgar mābūdon ke pichhe chalne se unhoi ne ek nihāyat sharīr qadam uṭhāyā hogā.

19 Ab zail kā gīt likh kar Isrāiliyon ko yoñ sikhāo ki wuh zabānī yād rahe aur mere lie un ke khilāf gawāhī diyā kare. **20** Kyoñki maiñ unheñ us mulk meñ le jā rahā hūn jis kā wādā maiñ ne qasam khā kar un ke bāpdādā se kiyā thā, us mulk meñ jis meñ dūdh aur shahd kī kasrat hai. Wahān̄ itnī khurāk hogī ki un kī bhūk jātī rahegī aur wuh moñe ho jāeñge. Lekin phir wuh dīgar mābūdon ke pīchhe lag jāeñge aur un kī khidmat kareñge. Wuh mujhe radd kareñge aur merā ahd tořeñge. **21** Natīje meñ un par bahut sārī haibatnāk musībateñ ãeñgī. Phir yih gīt jo un kī aulād ko yād rahegā un ke khilāf gawāhī degā. Kyoñki go maiñ unheñ us mulk meñ le jā rahā hūn jis kā wādā maiñ ne qasam khā kar un se kiyā thā to bhī maiñ jāntā hūn ki wuh ab tak kis tarah kī soch rakhte haiñ.”

22 Mūsā ne usī din yih gīt likh kar Isrāiliyon ko sikhāyā.

23 Phir Rab ne Yashua bin Nūn se kahā, “Mazbūt aur diler ho, kyoñki tū Isrāiliyon ko us mulk meñ le jāegā jis kā wādā maiñ ne qasam khā kar un se kiyā thā. Maiñ khud tere sāth hūngā.”

24 Jab Mūsā ne pūrī shariyat ko kitāb meñ likh liyā **25** to wuh un Lāwiyon se mukhātib huā jo safr karte waqt ahd kā sandūq uṭhā kar le jāte the. **26** “Shariyat kī yih kitāb le kar Rab apne Khudā ke ahd ke sandūq ke pās rakhnā. Wahān̄ wuh parī rahe aur tere khilāf gawāhī detī rahe. **27** Kyoñki maiñ khūb jāntā hūn ki tū kitnā sarkash aur haṭdharm hai. Merī maujūdagī meñ bhī tum ne kitnī dafā Rab se sarkashī kī. To

phir mere marne ke bād tum kyā kuchh nahīn karoge! ²⁸ Ab mere sāmne apne qabiloṇ ke tamām buzurgoṇ aur nigahbānoṇ ko jamā karō taki wuh khud merī yih bāteṇ sunēn aur āsmān aur zamīn un ke khilāf gawāh hoṇ. ²⁹ Kyoṇki mujhe mālūm hai ki merī maut ke bād tum zarūr bigaṛ jāoge aur us rāste se haṭ jāoge jis par chalne kī main ne tumheṇ tākīd kī hai. Ākhirkār tum par musībat āegī, kyoṇki tum wuh kuchh karoge jo Rab ko burā lagtā hai, tum apne hāthoṇ ke kām se use ghussā dilāoge.”

³⁰ Phir Mūsā ne Isrāīl kī tamām jamāt ke sāmne yih gīt shurū se le kar ākhir tak pesh kiyā,

32

Mūsā kā Gīt

¹ Ai āsmān, merī bāt par ghaur kar! Ai zamīn, merā gīt sun!

² Merī tālīm būndā-bāndī jaisī ho, merī bāt shabnam kī tarah zamīn par paṛ jāe. Wuh bārish kī mānind ho jo hariyālī par barastī hai.

³ Maiṇ Rab kā nām pukārūn̄ga. Hamāre Khudā kī azmat kī tamjīd karo!

⁴ Wuh Chaṭān̄ hai, aur us kā kām kāmil hai. Us kī tamām rāheṇ rāst haiṇ. Wuh wafādār Khudā hai jis meṇ fareb nahīn̄ hai balki jo ādil aur diyānatdār hai.

⁵ Ek ṭerhī aur kajrau nasl ne us kā gunāh kiyā. Wuh us ke farzand nahīn̄ balki dāgh sābit hue haiṇ.

⁶ Ai merī ahmaq aur besamajh qaum, kyā tumhārā Rab se aisā rawaiyā ḥīk hai? Wuh

to tumhārā bāp aur Khāliq hai, jis ne tumhein banāyā aur qāym kiyā.

7 Qadīm zamāne ko yād karnā, māzī kī nasloñ par tawajjuh denā. Apne bāp se pūchhnā to wuh tujhe batā degā, apne buzurgoñ se patā karnā to wuh tujhe ittalā deñge.

8 Jab Allāh T'ālā ne har qaum ko us kā apnā apnā maurūsī ilāqā de kar tamām insānoñ ko mukhtalif gurohoñ meñ alag kar diyā to us ne qaumoñ kī sarhaddeñ Isrāiliyon kī tādād ke mutābiq muqarrar kīn.

9 Kyoñki Rab kā hissā us kī qaum hai, Yāqūb ko us ne mīrās meñ pāyā hai.

10 Yih qaum use registān meñ mil gaī, wīrān-o-sunsān bayābān meñ jahāñ chāroñ taraf haulnāk āwāzeñ gūnjtī thīn. Us ne use gher kar us kī dekh-bhāl kī, use apnī āñkh kī putlī kī tarah bachāe rakhā.

11 Jab uqāb apne bachchoñ ko uṛnā sikhātā hai to wuh unhein ghoñsle se nikāl kar un ke sāth urtā hai. Agar wuh gir bhī jāeñ to wuh hāzir hai aur un ke nīche apne paroñ ko phailā kar unhein zamīn se ṭakrā jāne se bachātā hai. Rab kā Isrāīl ke sāth yihī sulūk thā.

12 Rab ne akele hī us kī rāhnumāī kī. Kisī ajnabī mābūd ne shirkat na kī.

13 Us ne use rath par sawār karke mulk kī bulandiyon par se guzarne diyā aur use khet kā phal khilā kar use chaṭān se shahd aur sakht patthar se zaitūn kā tel muhaiyā kiyā. *

* **32:13** Lafzī tarjumā: chūsne diyā.

14 Us ne use gāy kī lassī aur bheṛ-bakrī kā dūdh chīdā bheṛ ke bachchoṇ samet khilāyā aur use Basan ke moṭe-tāze mendhe, bakre aur behtarīn anāj atā kiyā. Us waqt tū ālā angūr kī umdā mai se lutfandoz huā.

15 Lekin jab Yasūrūn † moṭā ho gayā to wuh dolattiyān jhārne lagā. Jab wuh halaq tak bhar kar tanomand aur farbā huā to us ne apne Khudā aur Khāliq ko radd kiyā, us ne apnī najāt kī Chaṭān ko haqīr jānā.

16 Apne ajnabī mābūdoṇ se unhoṇ ne us kī ghairat ko josh dilāyā, apne ghinaune butoṇ se use ḡhussā dilāyā.

17 Unhoṇ ne badrūhoṇ ko qurbāniyān pesh kīn jo Khudā nahīn hain, aise mābūdoṇ ko jin se na wuh aur na un ke bāpdādā wāqif the, kyoṇki wuh thoṛī der pahle wujūd meñ ëe the.

18 Tū wuh Chaṭān bhūl gayā jis ne tujhe paidā kiyā, wuhī Khudā jis ne tujhe janm diyā.

19 Rab ne yih dekh kar unheṇ radd kiyā, kyoṇki wuh apne beṭe-betiyōṇ se nārāz thā.

20 Us ne kahā, “Maiṇ apnā chehrā un se chhupā lūṅgā. Phir patā lagegā ki mere bağhair un kā kyā anjām hotā hai. Kyoṇki wuh sarāsar bigaṛ gae hain, un meñ wafādārī pāī nahīn jātī.

21 Unhoṇ ne us kī parastish se jo Khudā nahīn hai merī ghairat ko josh dilāyā, apne bekār butoṇ se mujhe ḡhussā dilāyā hai. Chunāniche maiṇ khud hī unheṇ ghairat dilāūngā, ek aisi qaum ke zariye jo haqīqat meñ qaum nahīn hai.

† **32:15** Yānī Isrāīl.

Ek nādān qaum ke zariye maiñ unheñ ġhussā dilāūngā.

22 Kyoñki mere ġhusse se āg bhaṛak uṭhī hai jo Pātāl kī tah tak pahuñchegī aur zamīn aur us kī paidāwār haṛap karke pahāroñ kī buniyādon ko jalā degī.

23 Maiñ un par musībat par musībat āne dūngā aur apne tamām tīr un par chalāūngā.

24 Bhūk ke māre un kī tāqat jātī rahegī, aur wuh bukhār aur wabāī amrāz kā luqmā baneñge. Maiñ un ke ķhilāf phāṛne wāle jānwar aur zahrile sānp bhej dūngā.

25 Bāhar talwār unheñ beaulād kar degī, aur ghar meñ dahshat phail jāegī. Shirkhār bachche, naujawān laṛke-laṛkiyāñ aur buzurg sab us kī girift meñ ā jāeñge.

26 Mujhe kahnā chāhie thā ki maiñ unheñ chaknāchūr karke insānoñ meñ se un kā nām-o-nishān miṭā dūngā.

27 Lekin andeshā thā ki dushman ġhalat mat-lab nikāl kar kahe, ‘Ham ķhud un par ġhālib āe, is meñ Rab kā hāth nahīñ hai.’”

28 Kyoñki yih qaum besamajh aur hikmat se ķhālī hai.

29 Kāsh wuh dānishmand ho kar yih bāt samjheñ! Kāsh wuh jān leñ ki un kā kyā anjām hai.

30 Kyoñki dushman kā ek ādmī kis tarah hazār Isrāiliyon kā tāqqub kar saktā hai? Us ke do mard kis tarah das hazār Isrāiliyon ko bhagā sakte hain? Wajah sirf yih hai ki un kī Chaṭān

ne unheń dushman ke hāth bech diyā. Rab ne khud unheń dushman ke qabze men̄ kar diyā.

³¹ Hamāre dushman khud mānte hain ki Isrāīl kī Chaṭān hamārī chaṭān jaisī nahīn hai.

³² Un kī bel to Sadūm kī bel aur Amūrā ke bāgh se hai, un ke angūr zahrile aur un ke guchchhe kaṛwe haiń.

³³ Un kī mai sāńpoń kā mohlak zahr hai.

³⁴ Rab farmātā hai, “Kyā maiń ne in bātoń par muhr lagā kar unheń apne khazāne men̄ mahfūz nahīn rakhā?

³⁵ Intaqām lenā merā hī kām hai, maiń hī badlā lūngā. Ek waqt āegā ki un kā pāńw phislegā. Kyońki un kī tabāhī kā din qarīb hai, un kā anjām jald hī āne wālā hai.”

³⁶ Yaqīnan Rab apnī qaum kā insāf karegā. Wuh apne khādimoń par tars khāegā jab dekhegā ki un kī tāqat jātī rahī hai aur koī nahīn bachā.

³⁷ Us waqt wuh pūchhegā, “Ab un ke dewatā kahāń haiń, wuh chaṭān jis kī panāh unhoń ne li?

³⁸ Wuh dewatā kahāń haiń jinhoń ne un ke behtarīn jānwar khāe aur un kī mai kī nazareń pī liń. Wuh tumhārī madad ke lie uṭheń aur tumheń panāh deń.

³⁹ Ab jān lo ki maiń aur sirf maiń Khudā hūn. Mere siwā koī aur Khudā nahīn hai. Maiń hī halāk kartā aur maiń hī zindā kar detā hūn. Maiń hī zakhmī kartā aur maiń hī shifā detā hūn. Koī mere hāth se nahīn bachā saktā.

40 Maiñ apnā hāth āsmān kī taraf uṭhā kar elān kartā hūn ki merī abadī hayāt kī qasam,

41 jab maiñ apnī chamaktī huī talwār ko tez karke adālat ke lie pakar lūngā to apne mukhālifoṇ se intaqām aur apne nafrat karne wāloṇ se badlā lūngā.

42 Mere tīr khūn pī pī kar nashe meñ dhut ho jāeñge, merī talwār maqtūloṇ aur qaidiyōṇ ke khūn aur dushman ke sardāroṇ ke saroṇ se ser ho jāegī.”

43 Ai dīgar qaumo, us kī ummat ke sāth khushī manāo! Kyonki wuh apne khādimoṇ ke khūn kā intaqām legā. Wuh apne mukhālifoṇ se badlā le kar apne mulk aur qaum kā kaffārā degā.

44 Mūsā aur Yashua bin Nūn ne ā kar Isrāīliyoṇ ko yih pūrā gīt sunāyā. **45-46** Phir Mūsā ne un se kahā, “Āj maiñ ne tumheñ in tamām bātoṇ se āgāh kiyā hai. Lāzim hai ki wuh tumhāre dilōn meñ baiñh jāeñ. Apnī aulād ko bhī hukm do ki ehtiyāt se is shariyat kī tamām bātoṇ par amal kare. **47** Yih khālī bāteñ nahīn balki tumhārī zindagī kā sarchashmā haiñ. In ke mutābiq chalne ke bāis tum der tak us mulk meñ jīte rahoge jis par tum Dariyā-e-Yardan ko pār karke qabzā karne wāle ho.”

Mūsā kā Nabū Pahār par Intaqāl

48 Usī din Rab ne Mūsā se kahā, **49** “Pahārī silsile Abārīm ke pahār Nabū par chaṛh jā jo Yarīhū ke sāmne lekin Yardan ke mashriqī kināre par yānī Moāb ke mulk meñ hai. Wahān

se Kanān par nazar dāl, us mulk par jo maiñ Isrāiliyon̄ ko de rahā hūn. ⁵⁰ Is ke bād tū wahān mar kar apne bāpdādā se jā milegā, bilkul usī tarah jis tarah terā bhāī Hārūn Hor Pahār par mar kar apne bāpdādā se jā milā hai. ⁵¹ Kyoñki tum donoñ Isrāiliyon̄ ke rūbarū bewafā hue. Jab tum Dasht-e-Sīn meñ Qādis ke qarīb the aur Marībā ke chashme par Isrāiliyon̄ ke sāmne khaṛe the to tum ne merī quddūsiyat qāym na rakhi. ⁵² Is sabab se tū wuh mulk sirf dūr se dekhegā jo maiñ Isrāiliyon̄ ko de rahā hūn. Tū khud us meñ dākhil nahīn hogā.”

33

Mūsā Qabiloñ ko Barkat Detā Hai

¹ Marne se peshtar mard-e-Khudā Mūsā ne Isrāiliyon̄ ko barkat de kar ² kahā,

“Rab Sīnā se āyā, Saīr * se us kā nūr un par tulū huā. Wuh Koh-e-Fārān se raushnī phailā kar ribbot-Qādis se āyā, wuh apne junūbī ilāqe se rawānā ho kar un kī khātir pahāṛī dhalānoñ ke pās āyā.

³ Yaqīnan wuh qaumoñ se muhabbat kartā hai, tamām muqaddasīn tere hāth meñ haiñ. Wuh tere pāñwoñ ke sāmne jhuk kar tujh se hidāyat pāte haiñ.

⁴ Mūsā ne hameñ sharīat dī yānī wuh chīz jo Yāqūb kī jamāt kī maurūsī milkiyat hai.

⁵ Isrāīl ke rāhnumā apne qabiloñ samet jamā hue to Rab Yasūrūn † kā bādshāh ban gayā.

* **33:2** Adom. † **33:5** Isrāīl.

6 Rūbin kī Barkat:
Rūbin mar na jāe balki jītā rahe. Wuh tādād meñ baṛh jāe.

7 Yahūdāh kī Barkat:
Ai Rab, Yahūdāh kī pukār sun kar use dubārā us kī qaum meñ shāmil kar. Us ke hāth us ke lie laṛen. Muķhālifoṇ kā sāmnā karte waqt us kī madad kar.

8 Lāwī kī Barkat:
Terī marzī mālūm karne ke qur'e banām Ūrīm aur Tummīm tere wafādār khādim Lāwī ke pās hote haiṇ. Tū ne use Massā meñ āzmāyā aur Marībā meñ us se laṛā. ⁹ Us ne terā kalām saṁbhāl kar terā ahd qāym rakhā, yahān tak ki us ne na apne mān-bāp kā, na apne sage bhāiyoṇ yā bachchoṇ kā lihāz kiyā.

10 Wuh Yāqūb ko terī hidāyāt aur Isrāīl ko terī sharīat sikhā kar tere sāmne bakhūr aur terī qurbāngāh par bhasm hone wālī qurbāniyān charhātā hai.

11 Ai Rab, us kī tāqat ko baṛhā kar us ke hāthoṇ kā kām pasand kar. Us ke muķhālifoṇ kī kamr toṛ aur us se nafrat rakhne wāloṇ ko aisā mār ki āindā kabhī na utheṇ.

12 Binyamīn kī Barkat:
Binyamīn Rab ko pyārā hai. Wuh salāmatī se us ke pās rahtā hai, kyoṇki Rab din rāt use panāh detā hai. Binyamīn us kī pahāṛī ḍhalānoṇ ke darmiyān mahfūz rahtā hai.

13 Yūsuf kī Barkat:

Rab us kī zamīn ko barkat de. Āsmān se qīmtī os ṭapke aur zamīn ke nīche se chashme phūṭ niklen.

¹⁴ Yūsuf ko sūraj kī behtarīn paidāwār aur har mahīne kā lazītarīn phal hāsil ho.

¹⁵ Use qadīm pahāroṇ aur abadī wādiyoṇ kī behtarīn chīzoṇ se nawāzā jāe.

¹⁶ Zamīn ke tamām zakħīre us ke lie khul jāeñ. Wuh us ko pasand ho jo jaltī huī jhārī meñ sukūnat kartā thā. Yih tamām barkateñ Yūsuf ke sar par ṭahreñ, us ke sar par jo apne bhāiyōñ meñ shahzādā hai.

¹⁷ Yūsuf sānd ke pahlauṭhe jaisā azīm hai, aur us ke sīng janglī bail ke sīng haiñ jin se wuh duniyā kī intahā tak sab qaumoṇ ko māregā. Ifrāim ke beshumār afrād aise hī haiñ, Manassī ke hazāroṇ afrād aise hī haiñ.

¹⁸ Zabūlūn aur Ishkār kī Barkat:

Ai Zabūlūn, ghar se nikalte waqt khushī manā. Ai Ishkār, apne Ḳhaimoṇ meñ rahte hue khush ho.

¹⁹ Wuh dīgar qaumoṇ ko apne pahār par āne kī dāwat deñge aur wahān rāstī kī qurbāniyān pesh kareñge. Wuh samundar kī kasrat aur samundar kī ret meñ chhupe hue khazānoṇ ko jazzb kar leñge.

²⁰ Jad kī Barkat:

Mubārak hai wuh jo Jad kā ilāqā wasī kar de. Jad sherbabar kī tarah dabak kar kisī kā bāzū yā sar phār ḫālne ke lie taiyār rahtā hai.

²¹ Us ne apne lie sab se achchhī zamīn chun lī, rāhnumā kā hissā usī ke lie mahfūz rakhā gayā.

Jab qaum ke rāhnumā jamā hue to us ne Rab kī rāst marzī pūrī kī aur Isrāīl ke bāre meñ us ke faisle amal meñ lāyā.

22 Dān kī Barkat:

Dān sherbabar kā bachchā hai jo Basan se nikal kar chhalāng lagātā hai.

23 Naftālī kī Barkat:

Naftālī Rab kī manzūrī se ser hai, use us kī pūrī barkat hāsil hai. Wuh Galīl kī Jhīl aur us ke junūb kā ilāqā mīrās meñ pāegā.

24 Āshar kī Barkat:

Āshar beṭoṇ meñ sab se mubārak hai. Wuh apne bhāiyoṇ ko pasand ho. Us ke pās zaitūn kā itnā tel ho ki wuh apne pānw us meñ ḫubo sake.

25 Tere shahroṇ ke darwāzoṇ ke kunde lohe aur pītal ke hoṇ, terī tāqat umr-bhar qāym rahe.

26 Yasūrūn ke Khudā kī mānind koī nahīn hai, jo āsmān par sawār ho kar, hān apne jalāl meñ bādalooṇ par baiṭh kar terī madad karne ke lie ātā hai.

27 Azlī Khudā terī panāhgāh hai, wuh apne azlī bāzū tere nīche phailāe rakhtā hai. Wuh dushman ko tere sāmne se bhagā kar use halāk karne ko kahtā hai.

28 Chunānche Isrāīl salāmatī se zindagī guzāregā, Yāqūb kā chashmā alag aur mahfūz rahegā. Us kī zamīn anāj aur angūr kī kasrat paidā karegī, aur us ke ūpar āsmān zamīn par os paṛne degā.

29 Ai Isrāīl, tū kitnā mubārak hai. Kaun terī mānind hai, jise Rab ne bachāyā hai. Wuh terī madad kī dħāl aur terī shān kī talwār hai. Tere dushman shikast khā kar terī khushāmad kareñge, aur tū un kī kamreñ pāñwoñ tale kuchlegā.”

34

Mūsā kī Wafāt

1 Yih barkat de kar Mūsā Moāb kā maidānī ilāqā chhoṛ kar Yarīhū ke muqābil Nabū Pahār par chaṛh gayā. Nabū Pisgā ke pahāṛī silsile kī ek choṭī thā. Wahān se Rab ne use wuh pūrā mulk dikhāyā jo wuh Isrāīl ko dene wālā thā yānī Jiliyād ke ilāqe se le kar Dān ke ilāqe tak, **2** Naftālī kā pūrā ilāqā, Ifrāīm aur Manassī kā ilāqā, Yahūdāh kā ilāqā Bahīrā-e-Rūm tak, **3** junūb meñ Dasht-e-Najab aur Khajūr ke Shahr Yarīhū kī Wādī se le kar Zuğhar tak. **4** Rab ne us se kahā, “Yih wuh mulk hai jis kā wādā maiñ ne qasam khā kar Ibrāhīm, Is'hāq aur Yāqūb se kiyā. Maiñ ne un se kahā thā ki un kī aulād ko yih mulk milegā. Tū us meñ dākhil nahīn hogā, lekin maiñ tujhe yahān le āyā hūn tāki tū use apnī āñkhoñ se dekh sake.”

5 Is ke bād Rab kā khādim Mūsā wahīn Moāb ke mulk meñ faut huā, bilkul usī tarah jis tarah Rab ne kahā thā. **6** Rab ne use Bait-faġħūr kī kisī wādī meñ dafn kiyā, lekin āj tak kisī ko bhī mālūm nahīn ki us kī qabr kahān hai.

7 Apnī wafāt ke waqt Mūsā 120 sāl kā thā. Ākhir tak na us kī āñkheñ dhundlāīn, na us kī

tāqat kam huī. ⁸ Isrāiliyoṇ ne Moāb ke maidānī ilāqe men 30 din tak us kā mātam kiyā.

⁹ Phir Yashua bin Nūn Mūsā kī jagah khaṛā huā. Wuh hikmat kī rūh se māmūr thā, kyoñki Mūsā ne apne hāth us par rakh die the. Isrāiliyoṇ ne us kī sunī aur wuh kuchh kiyā jo Rab ne unheṇ Mūsā kī mārifat batāyā thā.

¹⁰ Is ke bād Isrāīl meṇ Mūsā jaisā nabī kabhī na uṭhā jis se Rab rūbarū bāt kartā thā. ¹¹ Kisī aur nabī ne aise ilāhī nishān aur mojize nahīn kie jaise Mūsā ne Firaun Bādshāh, us ke mulāzimoṇ aur pūre mulk ke sāmne kie jab Rab ne use Misr bhejā. ¹² Kisī aur nabī ne is qism kā baṛā iᜑkhtiyār na dikhāyā, na aise azīm aur haibatnāk kām kie jaise Mūsā ne Isrāiliyoṇ ke sāmne kie.

**Kitab-i Muqaddas
The Holy Bible in Urdu, Urdu Geo Version, Roman
Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30